

KIPIMO KYA KIMINO

KYA MUNTU WALUMBULUKA



Nakusachila, Mulongo Neville. Nkambo akupeshe.

Ke kintu kyawama kubwela mu tabbanako jibiji lukeelo luno. Ke “lukeelo lwawama,” lwa lusa kwi anweba bonse. Kabiji Naketekela mba jino jisakwikala ke juba jikatampe bingi kwi atweba bonse, mu—mu Kyeenyi kya Nkambo yetu. Kabiji pano Amiwa njina lufunjisho lukeelo luno. Amiwa mbeni kukeba kuyatu monka mu lufunjisho, mambo ke . . . Naketekela mba kyanema bingi. Kabiji ke . . . Kabiji pa kulama jibumba kubula kulubankana bingi, mwayukatu, kwikala kimye kyabaya, bavula kasa baimana. Amiwa nsakuya monka mu lufunjisho.

² Kabiji pano, bufuku buno, Nakeba kwamba pa mutwe wa *Ntangi Wa Bumi Bwami*. Kabiji Naketekela mba bavula bafwainwa, monka mo bavujila, basakutanwako pa kikye kimye, bufuku buno. Nangwa byonkabyo, inge uji na kipwilo kyobe, atweba . . . onkao mambo, tubena kukukeba obewa kutanwa ku—ku kipwilo kyobe. Ao ye mwingilo obe wakutanwako, apo paji kifulo kya mwingilo obe, kuuba mba kyeya kyobe kisame.

³ Pano, twatwajijila kuketekela mba, kimye kiji kyonse umvwe wabwela, tukekala na kifulo kyabaya muno. Bino tuji nalukatazho nakyu, oo, konse konse. Abo bakije kya matulasiti kine baeseka kuuba bitu byonse. Kabiji bakeba kifulo kimo, kyo baswisha; kabiji batuma kutu kumo, kabiji bavota. Kabiji be kibwezha jibiji, ne kwikiswisha konka *kuno*, ne kwi kibwezha. Oo, twaikala na kimye kyawama bingi! Bino, mwayukatu, Satana ulwisha byonse byawama. Vulukaitu, obewa kimye kyonse uji bulongo pa . . .

⁴ Amiwa naji kukumya mba kana wajingapi, Anthony. Najikukumona byo waji kukumanya bashobe. Kabiji Najikutala mubushaya, monka mu jibumba. Aye waji kwamba mba wajikwikala popa. Tuji nalusekelo kwikala noobe ne bashobe mukachi ketu, Mulongo Milano kufuma ku New York. Naketekela, kuya mu bushiyya bwatulunga twameema pakino kimye, Amiwa njina kimye kikwabo kya—mukisalo, kuya mu New York, ne kuya kuntu kukwabo, inge Nkambo waswa.

⁵ Kabiji nanchi tuji bingi nalusekelo pa yense wa mwi anweba. Ke—ke kintu kyawama anweba kutanwa kuno.

⁶ Kabiji twajinga na kimye kyawama bingi bufuku bwapita, nangwatu Amiwa naji kumvwa. Najinga na . . . [Kipwilo

kyaamba mba, “Amena.”—Waku.] “Kabiji Isaya mu tepo.” Kabiji nanchi anweba. . .

⁷ Kabiji lekeelo luno, twakeba kwamba pa yuwe mutwe, nangwa kufunjisha, byonkabyo, inge twakonsha, “Kushimika Tabbanako mumi; kushimika—kushimika Tabbanako mumi wa kwikalamo Lesa mumi, Muntu walumbuluka; Tabbanako mumi wa Lesa mumi, monka Aye mo ekala.” Kabiji inge. . .

⁸ Naumvwa mba baji na nyimbilo yawama bingi muno. Amiwa kechi ngikalako kuuba ne yumvwe ne. Kabiji bufuku buno, Amiwa nsakweseka kwikala muno. Bakazhi baami bambula na mambo akwa Mulongo Ungren, Naketekela jizhina janji byojajinga, kufuma kookwa ku—ku Tennessee. Bino, wajinga muno bufuku bwapita. Amiwa kechi na mumona lukeelo luno ne, bino Naketekela mba uji muno pantu pamo. Kabiji Nakonsha kutemwa kumumvwa bufuku buno, inge Nakonsha, kuuba mba, nangwa *Kufuma Ku Lukumo Lwanji*, nangwa *Yenu Mwine Wakukumya Anweba*. Nakonsha kutemwa kumvwa yoyo. Baanga bakonsha kutemwa kumvwa Mulongo Ungren? [Kipwilo kyaamba mba, “Amena.”—Waku.] Oo, Na—Natemwa kwimba kwawama. Kabiji waambile mba uji na bbalatoni. Kabiji kyavulula ne Mulongo wetu Baxter; aye ke nyimbi, ne aye, monka motwayukila. Kabiji *Kufuma Ku Lukumo Lwanji*, nangwa *Yenu Mwine Wakukumya Anweba*. Amiwa naketekela Namumona, kookwa. . . Akyo kijitu bulongo, Mulongo Ungren, bufuku buno, inge wakonsha, inge mwakonsha kutanwako? Musa kwikala, nangwa kweseka kwikalako ku kimye kya mpwijilo ya bufuku nyi? Kyawama, Na—Na. . . Kyawama, kechi. . . Amiwa ne mubuula, pa kikyee, inge aatweba. . . Amiwa kechi nakeba kulenga lukatazho ku muntu uji yense ne. Bino kika kyakubujila kwikyuba, nanchi, inge twakonsha, mu kimye kya *Atwa Tutetesho Tutanu natubiji*, inge twasapwila kyokyo, inge mwakonsha kwiiya. Nakonsha kutemwa kwibibiika pa tepu, mwamona, ne kubika, *Yenu Mwine Wakukumya Anweba*, kabiji, ne, *Kufuma Ku Lukumo Lwanji*, mu kyokya kimye.

⁹ Oo, bushe kechi kyawama kwingijila Nkambo nenyi? Amiwa kechi nayuka byo Nakonsha kuuba inge kechi Najinga Mwinakilishitu ne! . . . ? . . . Ke kintu kyawama bingi kwikala Mwinakilishitu. Amiwa natundaikwa kukeba kukilauka peulu-nyepanshi kabiji ne kubijika, na jiji jikatampe. Kwikala Mwinakilishitu, kilangulukai, byonse byaimenatu mwi Kilishitu!

¹⁰ Amiwa nayuka mba kimye kyonse kechi Ngita bulongo jizhina ja yuwe mwanamulume ne. Kiji kape S.T., nangwa T.S., nangwa kyapashako byobyoy. Sumners, Mulongo Sumner. Aye. . . Nasaka kumusachila ne mukazhanji walamba wachepa mubiji. Nalanguluka mba watailepo kimye nobe, kyamwekele nobe, pepi nobe bang’ondo sikisi, ku taipa yuwe *Mankulo Atanu naabiji Abipwilo*. Kabiji pano tuji naji kuno, watayipiwa,

kupembelela kupitulukamo, kabiji ne kumutwala mumusango wa buuku, *Mankulo Atanu naabiji Abipwilo*. Nyenga Sumner, kwepi koouji, kinetu witulipilishe pa kikye. Kya, kyasenda mingilo yabaya bingi. Kika, kyajita *byobya*. Kyakonsha nkusenda amiwa kape bang'ondo sikisi pakuuba mba tangemo kupwisha, nangwatu pakuuba mba kifume patepu, kabiji kumwalula ne kufumyamo ng'ambilo yakubwezhabwezhapo, kabiji kumulenga mu bu buku. Tukamupwisha ne kumutuma ku bakumupulita ponkapotu, mambo twalanguluka mba kyo kintu bantu kyo bafwainwa kwikala nakyo pakino kimye, kabiji mwakonsha kumutanga. Kabiji Billy wajikumweshanga, kimye kyo Najikutwela kunyuma kookwa, mamineti acheche apitapo, amba—amba—amba uji—amba wanengezhiwa kuya na kupulitwa. Nanchi, nyenga, tabbanako ikakufweta pa kikye. Amiwa kechi naketekela mba wakonsha kuuba kikye kyatutu ne. Kabiji—kabiji nangwa ne atweba. . . Inge twatambula buuku ne kubikapo mutengo, nangwa kintutu kikwabo, tukabika mutengo kya kuuba mba inge bapotesha ukatambulangapo ka kintu kamo, monse mo kikekela. Obewa wisambetu na kije, kije kya matulasiti, nangwa bamo bamwiaabo, kabiji bakonsha kwingijilapo. Aye Nkambo emupeshe bingi.

¹¹ Wachepa mubiji Mulongo mukote ne Nyenga Kidd baikala paapo, bajitu kipi na aduleendi, pachechetu. Kabiji Amiwa ne bakumenye kimye kicheche kyapita kunyuma, kabiji waambile mba, “Kyawama, akye kape kikekela kimye kyapelako kya kukumonapo, Mulongo Billy.” Waambile mba, “Amiwa nakota bingi.”

¹² Naambile mba, “Oo, ami! Amiwa kechi keba kumvwa anweba kwamba byobyo ne. Aneba mujitu pamo nobe bamaama ne bataata bakote bachepa mubiji.” Twatemwa Mulongo ne Nyenga Kidd. Atweba, yensetu, byoaji. Kabiji kijitu. . .

¹³ Kyubapo kintu kimo kwi amiwa inge ne Bamona batwela mu kipwilo, bakazhi ne balume bakote baji muyewa musango. Kabiji ndanguluka mba, basapwijilenga Mamboawama Amiwa kasa kyangye kusemwa ne. Kabiji pano Amiwa ne muntu mukulumpe. Ee, kilangulukaitu, basapwijilenga mu kimye Amiwa kasa kyangye kusemwa ne. Kabiji pano poji Amiwa, Amiwa twajijilatu nakulanguluka mba Mbena kukota bingi. Amiwa ndanguluka mba kyawama ne kuleka. Amiwa inge namona Mulongo ne Nyenga Kidd batwela, “Lukumo lwikale kwi Lesa! Aleluya!” Ng'amba namba, “Ine, Amiwa ngumvwatu bulongo.” Ee, mwane. Kwibamona, byo bakonsha kuuba, kine byo bapana lutundaiko!

¹⁴ Nanchi walanguluka mba, pepitu nobe myaka yami, jibiji, kabiji bakiyatu mu mwingilo. Bajikwiya lukeelo luno na kwimpuzha mabuuku, inge bakonsha kusenda mabuuku batwala na kupotesha. Baji kukeba matepu, pakuuba mba bayenga, na kwitabizha myeo kupichila mu kujizha aao

matepu, kasa baji pepitu myaka aduleendi. Pano bijikwepi “byapi byenu bibiji” byo twajikwambanga bufuku bwapita? Ee. Natatwilepo kulangulukapo namba, “Ngaami aji kwepi?” byo aambile byobyo—byobyo keesha. Muji na myaka inga, Nyenga Kidd? [Nyenga Kidd waamba mba, “Njina eite-wanu.”—Waku.] Eite-wanu. Uji na myaka inga, Mulongo Tom? [Mulongo Kidd waamba mba, “Eite-tuu.”] Eite-wanu ne eite-tuu myaka, kabiji bakingijishatu myapi byabo, mu mwingilo, bakiyatu kulutwe.

¹⁵ Kintu kyonse kilubakana mu Ohio, akyo Nyenga Kidd kyo ayuka, foni uvuma ku nzubo. Juba jikwabo, watumine, kabiji kamwaana kakacheche, nsongwakazhi mwaana ucheche, Naketekela byo kyajinga, wasemekelwe, kabiji bya munda byonse byajingatu pangye yanji. [Nyenga Kidd waamba mba, “Kisukwilo.”—Waku.] Kisukwilo, kyajinga pangye ya mwaana. Kabiji dokotala kechi wayukile byakuuba pa kikye ne, kabiji wajinga na moyo pakuuba mba amutumbule. Twalombele. [“Bamutumbwile, Mulongo Branham, wikibwezhezhe, mambo, baambile mba, ‘Kechi wakonsha kwikala na bumi ne.’ Kabiji babwezhezhetu byamunda mukachi.”] Babwezha byamunda mukachi, na kumutumbula, kabiji balangulukile mba kechi wakonsha kwikala na bumi ne. Kabiji waikele na bumi. [“Kechi pajinga pa kupichila bintu ne.”] Kechi pajinga pa kupichila bintu ne mambo—mambo a kuuba mba . . . kufuma kumula wamukatampe, pakuuba mba kajo kakonsha kupita. Kabiji Nyenga Kidd watumine jibiji. Twalombele ne jikwabo, kabiji pano uji najishinda. Kabiji awe uji paapo, nobe kamonyi; dokotala, ne aye. Mwamona? Ke bukamonyi bwakuuba mba Nkambo Yesu, Mulenga mukatampe! Monai Satana byo akebele kuuba? Kuchibakanya bumi bwa mwaana. Kabiji pano, monai, nanchi Naketekela mba inetu waishile kwi Nkambo. [“Aye wabwelele kwi Nkambo, konka ku nzubo yami.”] Wabwelele kwi Nkambo. Nyenga Kidd wamuntangijile kubwela kwi Kilishitu, panyuma ya kikye kyakukumya kyaubilwe pa mwaanani.

¹⁶ Najinga nafoni kufuma ku California, keesha, mulongo mucheche wamwingilo kookwa, bo najinga Naabo kimye kitanshi kyo Naile ku California, myaka yapita kunyuma. Mankanaji mucheche wamulume wasemekelwe na—na foolo . . . mishipeshipe isatu yanshikikile ku muchima wanji. Kabiji Namubuujiile mambo alolwa lukatazho. Naambile mba, “Yenka Lesa walengele akwabo kwikala bulongo, kine wakonsha kubuka munkanobe.” Mubuulaitu nsongwalume kwikala na lutundaiko lwawama.

¹⁷ Kabiji nsongwalume wajinga ne pampwijilo kimye kitanshi kyo najinga mu California, pepi nobe myaka eitiini yapitapo, myaka sikisitiini yapitapo, byo kyaikala. Kabiji Najinga mu California. Kabiji aye waji- . . . Akwa kupwila kwamongwele bingi awa nsongwalume posotu . . . Byo batambwile mwaana, kabiji wasemekelwe, kabiji bamwene mba kuji kintu kiyatama,

kyajinga kyakifufya, kabiji baesekele kumpoopa okosijini mwi aye, kabiji ne bikwabotu. Kabiji kyamekele obe ukekala na bumi ne, kabiji badokotala bapimine, ne kutana mapaipei asatu anshikika ku muchima. Kechi kwajinga kwasabakana nangwa pachechetu ne, monai, kujitu—kujitu mupaipi umo ubena kumpoopa. Kabiji waichiile bashanji, ne kwamba mba, “Taata, itai Mulongo Branham, ponkapotu. Mubuulai mba byonse. . . ‘Ipuzhatu Kilishitu. Aye wakonsha kwikyuba.’” Byokiji. Oo, ami! Abwa ke bongozhi, kyo bamwene, monai, twaambilepo, bufuku bwapita. Kintu kyaitabilwa pa kimye kyaitabilwa.

¹⁸ Kyawama, twatwajijilatu na kwamba, kechi twakonsha kutwela mulufunjisho ne, kechi ibyo nyi? Kijitu pamo nobe muzungwe wafuma kumyenge lukeelo lwamashika, bikala byaneema, mwayukatu, kabiji byonse bikwata pamo. Twaikala bingi nalusekelo pa kwikala nu lumvwang’ano lwa bupopweshi bibye. Ee, mwane.

¹⁹ Nanchi pano twayai tuzhindame atweba bene, pano, ne kuya mu lufunjisho pano. Kuya kape. . . Amiwa kechi nayuka kana anweba mwikimona nangwa ine, kiji pa bulakibondi. Kapepo inge Naambula kyokya *byobya*, mu kimyetu kicheche, kika, twakonsha kuuba, pano, anweba bamo, ku. . . [Mulongo Edgar “Doko” Branham waamba amba, “Twakeba kyeya pa kyokyo?”—Waku.] Kwamba ka? [“Anweba mubena kukeba kyeya pakikye?”] Ine, Amiwa kechi nalanguluka byobyo ne, ponkapano, Doko. Kapepo pachechetu. [“Ponka panshi, Nakonsha kubikapo kyeya pa kyokyo.”] Kyawama, tusa—tusa kuuba kyokyo inge Naikala na bicheche. . . Muji na kyeya papo? Kijitu bulongo. Twayai twikyambwile ponka. Mwakonsha kumona kunyuma koko nyi? Mwakonsha nyi? Inge mwakonsha kumona, sutulaiko kuboko kwenu, inge mwakonsha kumona awa bulakibondi, kutanga kyokya popa. Ine. Kijitu bulongo. Bikai kyeya. Pano, mu kimye kyo babena kunengezha kyokya. . .

²⁰ Amiwa natatulako kimye kyapwa lukeelo luno; nangwa, ine, ine, natatulako bukiji pepi nobe mamineti fifitini. Kabiji nanchi, pano, tusakusendatu kimye kyetu, mambo kechi tubena kukeba kuya lubilo ne. Inge twaikala mulubilo, nanchi kekonaunatu bintu byo wajikusakanga kwamba. Pano, Amiwa natelekelenga ku tepu, juba jikwabo, monka mo Naji kwi mubuuji, kabiji Naumwine bingi buvu ne amiwa mwine; kechi na mambo abyo Naambilenga ne, pakuuba byo Naambilenga lubilo lwabaya, kabiji ke jiwitu ja kuzakama. Amiwa naumvwa nobe kupembelelako. Kiji. . .

²¹ Na—Namwene juba jikwabo kifulo ko bakashimikila kipaka kyabaya mwakulamina banyama, muno pakachitu ka Louisville. Kabiji Mr. Brown, Naketekela byo kyajinga, kookwa, wapaine wanu milyoni dollars kuya ku kipaka kya kulaminamo banyama. Kyawama, inge Najinga nayo, Nakonsha kwibapa pakuuba mba banyama bebalekelako. Amiwa—Amiwa kechi naketekela mu

kubika banyama mu bipaka byobya ne. Amiwa jitu...Amiwa ngya ku kipaka kya kulaminamo banyama ne kwibamona banyama bakamulanda bakatampe, bambeyala, ne babonkwe, kabiji ne bikwabotu, kasa babena kwendaukatu kuya kulutwe ne kubwela lunyuma, babikwa mu kaleya bumi bwabo bonse, mwamona. Kikulengela kumvwa bibi. Nangwa byonkabyo, bakwatwa na bujumuku bwa muntu ao wajimuka kwibakila. Mwamona? Kabiji bebakwata ne kwibabika mufungwa.

²² Kabiji Amiwa ndangulukapo: diabola ye uba kyokya. Aye usenda bantu bawama bafwainwa kwendauka mu mampuzha akwa Lesa, kabiji ne mungye, ne—ne bintu biji byobya, nanchi ke kumubika mukaleya ka munzubo ka dinominesheni umo, nangwa mafunjisho a bantu, nangwa kintutu kimo, kabiji ne kumukashila moomwa. Kabiji ke kintu kyatama bingi.

²³ Kabiji kechi Natemwa bipaka mwakulamina banyama ne. Pakuuba Amiwa ngumvwa nobe umo wabooba banyama, umvwe wabikwa mu fungwa kabiji kasa ukeba kukasuluka, mwayukatu, amba—amba ufumemo ubepo kintu kikwabo.

²⁴ Pano, kasa tukyangye kufwenya ku Kyambo, twayai tufwenye ku Nsulo ya Kyambo, byo tubena kukunyika mitwe yetu mu milombelo.

²⁵ Walusa Taata wa Mwiulu, twapwila pamo lukeelo luno ne jikwabo mu Jizhina ja Nkambo Yesu, Wawama Mwanenu. Lesa, kwikala mu muntu, waishile pantanda, na mambo amfuto ya ubi bwetu, kabiji wafwile, aye Wabololoke; amba atweba, monka mu bololoke Bwanji, byo tuji bambulwa koloka, twikale balumbuluka mwi Aye. Twaiya na kwisolola amba atweba kechi twafikilamo ne, Nkambo. Kechi mujipo kyawama mwi atweba ne. Kabiji atweba bonse tuji mukaleya kakatampe kanzubo. Nangwa twimane mu koonu wabyepi, tukijitu mu kaleya. Umo kechi wakonsha kukwasha mukwabo ne. Pakuuba, Lesa, monka mulusa Lwanji lubula kupela, waishile panshi kabiji ne kunshikula bizhilo byakaleya, mu kwitukasulula. Atweba pano kechi twabikwa mufungwa ne. Atweba kechi tuji mu kipaka kya banyama kya muntanda ne, pakuuba pano twaikala bakasuluka. Atweba tuji pangye.

²⁶ Oo, byo twa Mutemwa kabiji ne ku Mufwalama! Byo twakonsha kwenda mu majimi akatampe a milaye Yanji, kabiji ne kwiimona yamwekanyika ku meso etu! Kabiji konka ku meso etu, tumona Lesa mukatampe wa Peenape wisolola Ayemwine ku meso etu, kabiji ne kwimweshu Ayemwine bukine, nobe byonka byo Aubile ku bangauzhi bakala. Byo twayuka mba, babena kukokoloka na luketekelo, amba juba jimo tukabwezhiwa jibiji, pakupita buno bumi, pa kimye kyalusanguko, kuya ku Bumi Bwapeenape aabo bukabula kupwa. Mibiji yetu kechi ikakota ne. Kabiji kechi tukafwa ne. Kabiji kechi tukafwa nzala ne. Kabiji kechi tukekala na bya kukabila ne. Bino tukenda Nanji.

Atweba tubena kukeba ku Muvwa kwamba mba, “Twelai mulusekelo lwa Nkambo, alo lwanengezhiwe anweba kufuma ku kitendekesho kya inontanda.” Kunyuma bubi kasa bukyangye kwikalako, Aye byo anengezhizhe jimo, nobe wakwa Adama ne Eva, kyakuuba mba kechi bakakolwa nangwa kwikala na lukatazho ne. Kabiji bino Aye wamunengezhizhe atweba, kabiji Aye wayukijile jimo mba tubena kwiya. Bubi bwalengejile kushikila kukatampe, kabiji pano bubi be bufumyako, na Mashi akwa Yesu. Pano, atweba twibakuya ku Ntanda ya mulaye, kupichila mu mulaye wakwa Lesa, ao wa Peenape.

²⁷ Tupeshai pano, Taata, byo tubena kufunda Kyambo Kyenu. Tubena kukeba kuyuka musango ka wa bantu ye twafwainwa kwikelamo, pukuuba mba Tukafikeko. Tukwashai leelo muyuwe sukuulu, kuuba mba twafwainwa kwikala na Nkambo Mufunjishi mukatampe, Mupashi Wazhila, ao wakonsha kwikala ne kwisolola Ayemwine kwi atweba, kupichila mu Kyambo Kyanji. Mambo twikimpuzha Mujizhina Janji kabiji ne ku lukumo Lwanji. Amena.

²⁸ Pano, kitanshi, Nakonsha kutemwa anweba kuzhikula pamo ne amiwa mu Petelo Wakibiji, kyapitala kyabu 1. Nasaka kutanga kibese kya kikye Kinembelo, Petelo Wakibiji, kyapitala kyabu 1. Kabiji pano kwi anweba baji na bipepala ne mapezulu. . .

²⁹ Kabiji Naketekela Naji kubuulwa lukeelo lunno amba—amba kimye kimo, kufumyako mutwe wami, kilengela tepu kushinshipela. Amiwa kine kechi ntazha mu kuuba mba kikale byobyo ne. Kabiji Naketekela mba, kimye kimo, inge twakonsha kulanguluka mba twikale na—na maiki watabakana, ne kumukobeka mwiulu mu siilingi mumwe. Nangwatu wikale kwepi, wakonsha kwikalatu bulongo. Kyakonsha kwikala kyalumbuluka, konse konse, maiki uji peulu ya siilingi.

³⁰ Kabiji pano, mu kimye kyo tubena kwamba; kabiji umvwe obewa, pakupwisha kupwila, nangwa ubena kukeba, mwakonsha kulemba kikye kikope. Kabiji ne apo Njinaakyo kyataipiwa papo. Amiwa nsakutola ne kipope kulutwe kuno, inge wakeba kwikyuba kimye kimo. Iyai bukiji bukiji mute uno, pakuuba mba tumvwishe.

³¹ Pano tubena kufwenya kwipi na *Tutetesho Tutanu na tubiji*. Twapwishatu *Mankulo Atanu na abiji Abipwilo*. Kabiji aye ke Mbila ya lufunjisho, lunungakanya muntu, aao ubena kuya na kukulwa ku Mashi a kwa Nkambo Yesu, kabiji ukekala mu yoya nkulo ya Kipwilo, aya nkulo ya Kipwilo ya Peenape kumpelo ya Tutetesho. Twayuka mba tuji na Matolopita Sebeni, Myalo Sebeni, Michiba, ne bikwabotu, abyo byakutwelamo, byo tubena kuya kulutwe. Bino tubena kupembelela mpuzha yabaya pakuuba mba bantu bakonsha kwikala.

³² Bino, kabiji Nalangulukile mba akye kyakonsha kukwatakana monka mo Naketekejilenga. Amiwa kechi naketekejilenga kulenga kikye kimiko ne, bino juba jikwabo Najinga na balunda bami bawama, Coxes, akwa ku Kentucky. Naile konka, nalangulukile mba kape nakonsha kuya juba jimo ja kusonsola tu baluyeye bimye byapewa kasa bikyanye kushinkwa. Kabiji Najinga mungye na mulunda nami, Charlie, kasa aimana byobya, ne Rodney, mulongo wanji. Amiwa kechi na mwenepo kaluyeye ne. Ndanguluka mba Yami ne tuchinishe tunyeme, byo Nalozelenga monkamwa mungye. Akye kyo kyaishile kwi amiwa, bansongwalume, kabiji—kabiji Nyenga Nellie ne Margie, kabiji byo Nemubuujile anweba amba nkemubuula Pamulungu inge Nafika pakikye. Akye kyo kyaishile kwi amiwa, pa mbila yo nasakilenga kwambapo. Kabiji ne byashala byo byanungakeene monka mwi aakyo! Kabiji, oo, Natemwa kyokyo. Najinga na—na mwiine—mwiine mupashi wa kubijika, monkamwa mungye.

³³ Nanchi pano, twayai tutange, Petelo Mutanshi, nangwa. . . Petelo Wabubiji, byonkabyo, kypitala kyabu 1, kibese Kyaakyo.

Shimona Petelo, kalume ne mutumwa wa Yesu Kilishitu, kwi abo batambula lwitabilo lwa buneme pamo ne lwetu lwa monka mubololoke bwa Lesa wetu ne Mupulushi Yesu Kilishitu:

³⁴ Natemwa jishinda mo kyaambilwa papo, mambo mutwe wami yense lukeelo luno waimena pa lwitabilo. Mwamona? Lekai tange kyokyo ne jikwabo. Telekeshai bulongo.

Shimona Petelo, kalume ne mutumwa wa Yesu Kilishitu, kwi abo batambula—batambula lwitabilo lwa buneme. . . monka mu bololoke bwa Lesa. . . Mupulushi wetu ne Yesu Kilishitu:

³⁵ Monai, aye ubena kwamba, mba, “Amiwa natambula lulwe lwitabilo, kabiji Amiwa mbena kwamba bibye kwi abo batambula lwitabilo lwa buneme pamo ne lwetu.” Amiwa nakeba. . . Kechi ke ntanda ya pangye ne. Akye ke ku Kipwilo, monai, aba baji mwi Kilishitu.

Bupe ne mutende bi muvujile anweba mu maana a kuyuka Lesa, ne (kupichila) ne akwa Yesu Kilishitu Nkambo yetu,

Bulume bwanji bwa bulesa bwitupa byonse bya kwitukwasha. . . bulume bwanji bwa bulesa pano bwitupa bintu byonse byakwitukwasha mu buno bumi. . . bulesa, monka mu maana a kumuyuka aye witwichele mu lukumo lwanji ne mukulumbuluka:

mo monka mo etupejile. . . milaye yanji ya buneme ne ikatampe iine: monka mu ino (aye milaye) atweba bonse wikale bakutambulako muchima wa bulesa, . . .

³⁶ Pano lekai kyokyo kitweele mwine mukachi. Kechi kusapwila lukeelo luno ne; tubena kufunjishatu lufunjisho. “Wabulesa muchima.” Lekai tange veeleshi wabu 4 ne jikwabo, pakuuba mba anweba mubule kwikilubako. “Mo monka mo etupejile. . .”

Mo mo etupejile milaye yanji ya buneme ne ikatampe iine: amba monka mu ino (aye milaye) atweba twikale bakutambulako wabulesa muchima, byo twapuluka ku bubole buji panopantanda na mambo alwiso.

³⁷ Monai, “ntanda,” atweba twafumamo pano. Aye ubena kwamba kikye ku Kipwilo. Oeene mambo o twaikela muno lukeelo luno, ke kukeba jishinda, kibena kukeba Lesa kyo kika. Kechi kujipo untu muno, aao watemwa Lesa, kanatu wa—wakeba kwikala pamo ne Kilishitu. Bino kyaashikwa muno. Yense Mwinakilishitu! Amiwa ne wakala wapitamo. Talai pe Mulongo ne Nyenga Kidd muno, abo kape bo bajimo na myaka yavujisha muno mu kishimikwa. Pakuuba inge Nakonsha kwibempuzha, “Kukabila kwa muchima wenu kuka?” Kyakonsha kwikala, “Kubwela pepi kwi Lesa.” Umvwe mwafunda Kilishitu, pajipo kintu kimo na mambo Aaye akyo kya temwikwa bingi, obewa usakatu kuuba bulongo kwi Aye.

³⁸ Mundekeleko pa iye ng’ambilo. Nabujile bakazhi bami, kuno kechi papita kimye kyabaya ne, aye. . . bonse babiji babena kukoma, kabiji Naambile kwi aye, Naambile namba, “Bushe watemwa nobe byonka byo watemwe?”

Aye waambile mba, “Amiwa kine byonji.”

³⁹ Kabiji Naambile mba, “Mwayukatu, Nakutemwa bingi kyakuuba mba Nakonsha kutemwa kukutola ne kukundoosela mukachi kami, pakuuba mba twakonsha kwikala, kine, umotu, pa baishatu.”

⁴⁰ Pano, akyo, mvuzhai kyokyo na aduleendi milyoni, kabiji nanchi mukatana mba waitabila, wikala na butemwe ne Kilishitu, ukeba kutwela mwi Aye, mambo ke butemwe. Kabiji paapo Aye usakwitumweshwa yokyo, kupichila mu iye milaye, twafwainwa kwikala bakutambulako muchima wa Bulesa wa Kilishitu. Aye, mibiji ifwa, twakonsha kwikala byepi ba kutambulako lubaji.

⁴¹ Nakonsha kwambapo kintu kimo papo. Eene mambo o Naketekela. . . Bino muntu umo wang’umvwijile mungi, konka kuno kechi papita kimye kyabaya ne. Amiwa njina kalata kufuma ku kipamo kya basapwishi, baambile mba Naketekela mba kwajinga. . . “Atweba twajinga balamakana-myeo. Kabiji amba twafwainwa kusha batemwe bentu inge kechi twakwatakana-myeo ne, ne kuya na kusongola mu kwabo ao ye twakwatakana nanji-myeo.” Oo, ami!

⁴² Naambile mba, “Amiwa kechi nazhatwapo ku myendeleko iji byo byo ne.” Amiwa kimye kyonse ngikala wakana kyokyo.

Amiwa—Amiwa kechi naketekela mu kyokyo ne. Kechi ibyo ne. Amiwa naketekela mba Lesa witupa mutemwe. Akyo kine. Kabiji nanchi po twikala wa kulubaji lwa mukwabo. Abyo ibyo. Kabiji mwanamulume kasa akyangye kusongola, wafwainwa kulanguluka pa bibye bintu, ne kupitulukamo.

⁴³ Nsongwalume umo wangipwizhe juba jikwabo, waambile mba, “Walanguluka mba Nakonsha, nafwainwa kusongola, Mulongo Branham, kwi *kananga-ne-kananga* nsongwakazhi?”

Naambile mba, “Umulanguluka byepi?”

Aye waambile mba, “Oo, ami, Amiwa na mutemwa.”

Naambile mba, “Kyawama, inge kechi wakonsha kwikala kwakubula aye ne, kyawama kumusongola. Bino inge wakonsha kwikala kwakubula aye, kyawama kubula kwikyuuba. Nanchi, pakuuba inge kyakonsha kukwipaya, kyawama—kyawama kupitaizha ku musongola,” byo Naambile. Kabiji nanchi kyo Nakebelenga kuuba mba namubuule, ke kikye, kya kuuba mba, inge wamutemwa bingi!

⁴⁴ Pano, ponkapano, kasa mu kyangye kusongola, bintu byonse bijitu bulongo kabiji ne mvwajilo ijitu bulongo. Bino panyuma ya kusongola, nanchi bya lumanamo ne meseko a buno bumi bitwelamo. Apo po wafwainwa kwikala na butemwe bingi mambo wamuyuka mukwenu. Inge walengeshiwa buvu nanji, ne aye walengeshiwa buvu ne obewa, nangwa byonkabyo mwiuyuka umo ne mukwabo.

⁴⁵ Abyo byobyo kiji ne Kilishitu. Mwamona? Twafwainwa kwikala bingi mu butemwe ne Aye, poso umvwe twaipuzha kintu kimo, kabiji Aye wabula kwikipana kwi atweba, akyo kechi kitusukanya nangwa pachechetu ne. Mwamona? Mwamona? Kika? Kabiji jishindatu jimo ja kwikyubilamo, ke kwikala ba kutambulako muchima Wanji wa Bulesa, nanchi po ukayuka eene mambo Aye kyo abujila kwi kipana kwi obewa. “Bakutambulako muchima Wanji wa Bulesa.”

⁴⁶ Kabiji talai kuno, “Byo mwanyema bubole bwa inontanda kupichila mu lwiso.” Mwiilunyema! Monai kokibena kuya? Ke ku Kipwilo, abo baji mwi Kilishitu, basutulwa kukila pa bintu byonse. Kechi mambo a kuuba mba witumbijika aye mwine ne, pakuuba Kilishitu ye wamuleta peulu.

⁴⁷ Ku balongo bami bachiluluka ne banyenga baji muno lukeelo luno, Amiwa kechi naleta kikye kuuba mba kilete lukatazho ne. Bino, najinga mu mpwijilo kimye kimo kunyuma, Amiwa kechi Nayuka ne kana ne kyambapo kala mu tabbanako. Amiwa ne kyambapo kala mu mampuzha avula. Kwajinga nyenga wachiluluka waambile mba, “Bushe Nakonsha kupana lushimuno, nangwa kushimuna nyi?”

“Kyakine, nyenga, twajijila.”

48 Waambile mba, “Nasaka kupana lulwe lushimuno ku lukumo lwa Lesa.” Aye waambile mba, “Mwayukatu, Amiwa—Amiwa kechi nji byo Nafwainwa kwikala ne,” kabiji aye waambile mba, “Amiwa—Amiwa kechi nji byo Nafwainwa kukeba kwikala ne, bino,” aye waambile mba, “kintu kimo kyakine, Amiwa kechi nji byo Naikalanga kala ne.” Mwamona? Aye wafumine kutu kumo. Aye wakomejiile.

49 Abyo byo tuyuka mba atweba twafuma kulufu kuya ku Bumi. Tutala kunyuma ku kimbo ku twafumishiwe. Mwamona? Atweba kechi tuji byo tukeba kwikala ne; kabiji atweba kechi tuji byo twafwainwa kwikala ne; bino kuji kintu kimo kyo twasachila, atweba kechi tuji byo twaikalanga ne. Abyo ibyo. Tuji mu jishinda.

50 “Kabiji byo twapuluka ku bubole buji panopantanda.” Byo twapuluka byobya, lwiswo ne bubole buji panopantanda, obewa uji peulu ya byobyoy. Pano awo—awo ye musango wa muntu Ye abena kwambako, muntu wapuluka ku bibye bintu, mwamona, bubole buji panopantanda.

Kabiji na onka ano mambo, anwe bene mubikepo kutesha muchima konse, namba mu lwitabilo lwenu mubikepo bulume; kabiji pa bulume mubikepo maana;

Kabiji pa maana mubikepo kwikanya;...mu kwikanya mubikepo butekanye;...mu butekanye mubikepo bulesa;

Kabiji mu bulesa mubikepo butemwe bwa kutemwa balongo; kabiji pa butemwe bwa kutemwa balongo mubikepo butemwe bwa kutemwa bonse.

51 Pano Aye witupa mwakulondela na byo twafwainwa kuuba, kuyuka mwakwikyubila. Pano, byonka byo Najikwamba, atweba tubena kweseka kubwela kwipi na Lesa. Oene mambo o Nakusajila iye Mbila lukeelo luno, ya kipwilo, byo twayuka mba bantu baji palwendo. Bufuku bwapita, Najikwamba mba, “Baanga muno, bafuma-mu-tauni ungi?” Pepi nobe naite-eiti paseti wa bantu, bafuma-mu-tauni ungi. “Baanga baji muno bafuma ku aduleendi mailoshi?” Kika, yajikukilapo, Naketekela mba, eite paseti. “Baanga muno bafuma kukila pa faivi aduleendi mailoshi?” Kabiji pepitu nobe—nobe bibese bisatu bya bantu bajinga muno bafumine kukila pa aduleendi, faivi aduleendi mailoshi kuleepa. Kilangulukaitu, bantu kwenda. Kyawama, aba bantu kechi beyatu ku kipwilo mba betumone ne. Kechi kujipo...nobe ntanda ya pangye byo bakonsha kumona buwame buji pa kino kifulo ne. Ke bantu babula kuyukanyikwa, bakumulanda, mvwajilo imvwala bantu bonse. Kechi kujipo nyimbilo ikatampe kufuma ku befwanyikizha-kwikala-nobe kwaaya wa ba Malaika, byombesha bya mipaipi, kabiji ne mawido aji na magalashi alezhima. Anweba mushupikwa pa kuuba mba mumone pakwikala pa mbechi kabiji ne kwimana

ku kibumbulu. Abo kechi beeya ku byabyobyoye ne. Pakuuba abo beeya mambo mukachi kabo muji kintu kimo kimonamo buwame akyo jiso ja ku mubiji kechi jikimona ne. Kanatu jiso ja bumupashi jimonamo buwame bwa Kilishitu. Kyo kine kintu kyobeshila.

⁵² Nanchi, pa moba avula kasa tukyangye kwikala na kupwila ne, Amiwa ndomba kimye kyonse. Ngya mungye, nasenda mu pokochi wami...Nabuula bakazhi, "Amiwa mbena kuya na kwipaya tu baluyeye lukeelo luno." Kabiji Nabika ne pezulu ne kipepala mu pokochi wami. Inge kyeya kyaikalatu kyawaina bulongo kumona, Amiwa ngikala mushi wa kinchi kuntu kumo, maboko asutulwa mulwelele, kasa ng'amba mba, "Nkambo, kika kyo Nakonsha kuuba leelo? Kika Anweba kyo mwakonsha kuupa kya baana Benu?"

⁵³ Nanchi inge Nafika pa kintu kimo kyamweka nobe kibena kupya, kwaiya kintu kimo bibye. Inge Kyeenyi Kyanji kyafwenya peepi, Amiwa tatula kumvwapo kintu kimo palepa, kintu kimo mu uno musango. "Tuu eye jibiji ke foolo." Kyafwenya pepi, "Tuu eye jibiji ke foolo. Tuu eye jibiji ke foolo. Tuu eye jibiji ke foolo." Kuyatu, kuyatu, kuyatu, byonkabyotu. Ke Kyeenyi Kyanji kibena kwiya.

⁵⁴ Wipana obewa mwine, kabiji pakupitapo ka kimye wachibikako ku bumuntu bobe. Ponkapo kwaiya kimonwa, "Yanga ku *kananga-ne-kukananga* ku mpuzha, kabiji ku *kananga-ne-kananga* kintu." Mwamona? Kitatwilatu, pa kulanguluka languluka maana obe pe Lesa, afumamo muntanda, afumishakotu ku ntanda, waya mungyetu, obewa mwine.

⁵⁵ Kabiji Kyatatula ke kiye, "Wanu, wanu..." Naamba, nambala iji yonse, nangwa kintu kiji kyonse, kintu kimo kitatulatu pacheche, jiwi jicheche kasa jiiya. Pano ke jiiye bukiji, bukiji. Waikala popa kabiji ne kusutulako maboko obe, kwakubula kwambapo ne kyambo, wakwachijijilatu maboko obe mwiulu. Kintu kitanshi mwayukatu, bumuntu bobe bonse busendwa. Nanchi watatula kumona bintu Aye byo abena kukeba obewa kuyuka, ke kukumwesa bintu bikeya.

⁵⁶ Kimye kimo kiiya kyafika pantu pamo, poso pantu pamo, kabiji kyaleka. Kechi kiya mu kimwesho ne. Nanchi Binembelo ke biiyetu pamo. Amiwa ntola pezulu wami, pakuuba mba kechi Nalubamo ne, kabiji nebinemba, ne binemba.

⁵⁷ Kabiji Nabwela ku nzubo ne kupitulukamo, kabiji ne kwibifunda. Kabiji kimye kimo kechi bimweka byamaana kwi amiwa ne inge Namonapo. Kabiji pano, pakupitapo ka kimye, ke kiiye! Akya kifika, kabiji kyabwela kyaya jibiji. Nanchi Amiwa ntola ka buuku kakacheche nobe *bibye*, kabiji ke kutatula kunemba, monka mo Nakonsha kuubila, byonka Aye byo aambula. Amiwa ndanguluka mba, "Nkambo, Amiwa mbena kuya ku tabbanako na kwibabuula. Ami... 'Naiya nafika.'

Amiwa nji na kintu kimo kyabo.” Kyawama, abyo byoabyo kiiya. Abo byokiji. Poso, patanshi, Aye wikipana kwi amiwa, Amiwa kechi nakonsha kwikipana ne.

⁵⁸ Nanchi, pano, pa tookatwe twanembwa tuheche to mumona ami kasa ntalapo. Kabiji kikye, patanshi, Natatwile, Amiwa kechi natambwile lulwe lubaji ne poso pepi nobe juba jimo nangwa abiji apitapo, monka mungye.

⁵⁹ Pano, abo bantu baji—baji. . . Petelo ubena kwamba, papo, byo twafwainwa kwikala bakutambulako muchima Wanji wa Bulesa. Bino, yense mwi atwenba ubena kweseka kukoma mu kipimo kya kimino kya Lesa.

⁶⁰ Pano, panyuma ya kupwisha na Tutetesho Tutanu na tubiji, nanchi, pa kyokya kimye kya kwamba Tutetesho Tutanu na tubiji, nangwa kukasulula. . . Mambo, twayuka katetesho kyokika, ke kukasulula nyingijilo, ku kasulula Tutetesho Tutanu na tubiji. Kabiji tusakumona ponka pa kyanembwa. Ke kukasulula Mbila, kintu kimo kyabikwapo katetesho.

⁶¹ Mulungu wapwa bufuku, Nasapwijile pa, “Ba Kii.” Kabiji ba kii ke lwitabilo. Lwitabilo lo lukwata ba kii, kabiji ba kii ke Kinembelo. Kabiji Kilishitu ye Kibelo. Mwamona? Nanchi lwitabilo lutola tubitu twakobama twa mu Kinembelo kabiji ne kushinkula bya mulukumo ne buwame bwakwa Lesa, ku bantu Banji. Mwamona? Nanchi, ke, lwitabilo lulama ba kii aba bashinkwila Kilishitu ku bantu; wiikishinkula, wiikisolola.

⁶² Nanchi, leelo, tubena kweseka kutola awa kii umotu, kunshinkula jishinda ja kwikelamo Mwinakilishitu wa bulume uji na kipimo kyakimino kya Lesa, kuuba mba, waikala Tabbanako mumi mwakwikala Lesa mumi.

⁶³ Vulukai, Lesa wisolola Ayemwine mu mashinda asatu. Kimye kitanshi, Aye wisolola Ayemwine mu Mumbulungwa wa Mujilo, awa watelelwenga mba Butaata. Nanchi awa Lesa umotu, wisolwele mwi Kilishitu Yesu, ao Ye ashimikile mubiji, walengele yuwe mubiji. Kyabusatu, kupichila mu lufu lwa yewa mubiji, Aye witokenshisha Kipwilo kyo Akonsha kwikalamo. Wajinga Lesa peulu yetu; Lesa ne atweba; Lesa mwi atweba; Lesa umotu.

⁶⁴ Ao oene mambo kyo achijilwe mba Taata, Mwaana, Mupashi Wazhila. Kechi ba Lesa basatu ne; maofweshi asatu a Lesa umo. Abo bekilangulukiletu pa Kije kya Nikeya, ige kechi twalubilamo ne, twakonsha nyi? Abo ibyo. Kechi balesa basatu ne. Bantu kechi bakonsha kwi kyumvwa Yesu byo aambilenga kuba Shanji, kabiji Aye ne Bashanji bajitu Umo. Kyakine, abye bintu byonse po byaimena. Kine, bimweshatu abyo bine. Kyakine. Mwamona? Kechi ba Lesa basatu ne. Maofweshi asatu! Kusatu kuso- . . .

⁶⁵ Kyokika? Lesa kwibwezha panshi ku kilengwa Kyanji. Lesa ukeba kupopwelwa. Kyambo kya Lesa kyalumbulula mba

“kintu kipopwelwa.” Kabiji ke Lesa ubena kweseka kunengezha bantu Banji, pakuuba mba Aye atambule kufuma kwi abo kyo Ebalengejile. Aye kechi wakulengele kwikala kintu kikwabo kyapusanako na mwaana wamulume ne mwaana wamukazhi wakwa Lesa. Inge obewa wapusa kyokyo, kya kwikala mwaana wamulume ne mwaana wamukazhi wakwa Lesa, obewa wapusa kimiko.

⁶⁶ Kabiji “kutupila,” kyambo kya *b-u-b-i* kyalumbulula mba “kutupila kimiko,” kutupila kimiko. Nanchi, inge Amiwa mbena kuloza pa kimiko, kuloza kipolopolo palepa mamita fifite, kabiji Naloza; natola buta bwami ne kuloza, kabiji Nekitupila, foolo nangwa maichezi faivi, kika kimweka? Buta bwami bukebewa koololwa. Pajipo kintu kimo kyatama. Kabiji umvwe Natupila lwitabilo mwi Lesa, inge Natupila kwikala Mwinakilishitu. . . Lesa wakubikile kwikala kuno amba wikale Mwinakilishitu. Inge wafumamo ne kuya ku lubaji lumo, bwelatu na koololwa. Kabiji kujitu kintu kimo kyakonsha ku koolola, akyo ke Kinembelo. Aye Mupashi Wazhila mu Kinembelo, ukoolola, ne kukubwezha monka mundonda ya kimiko jibiji. Abyo ibyo.

⁶⁷ Pano, tusa kufunda Kyambo Kyanji. Sepetena waambile mba, mu Byubilo 7, kabiji ne mu. . . Twayai tutangetu kikye. (Pano tubena kwamba, tubena kwamba pa Tabbanako wa Lesa.) Pano, Sepetena waambile mba. . . (Byokiji, kuuba wa kisakwikala Tabbanako mumi wa Lesa mumi.) Sepetena waambile mba, mu Byubilo kyapitala kyabu 7, kabiji Naketekela atweba. . . mu Byubilo 7, kutatwila pa veeleshi wa 44:

Bashakulu betu bajinga na tente wa lushimuno mungyetu, monka mo atongwejile, pa kwamba kwi Mosesa, amba amulenge pamotu na akya kipashang’ano kyo amwene.

Ye bajinga nanji bashakulu betu, bashakulu betu bapingilepo batwezhezhe mu. . . Yoshiwa mu kyaalo kya Bagetila, abo Lesa bo apangile ku meso abashakulu betu, kufika ne ku myaka ya Davida;

Ye wamwene butemwe ku meso akwa Lesa, kabiji waipwizhe luusa lwa kumumwena mwakwikala Lesa wa Yakoba.

Bino Solomoni ye wamutungijile nzubo.

Byonkabyo aye Mwine wakila kechi wikala mu mazubo o batunga ku maboko ne; monka mwaambijile ngauzhi,

Mwiulu jo jitanda jami, kabiji panshi kyo kipuna kya maulu ami: ng’anyi musango wa nzubo ye mukatungila ami? byo byaamba Nkambo: nangwa po nakokolokela po pepi?

68 Pano mu...Pano, “tabbanako,” ke, onkao mambo, ke mpuzha pa kukokolokela, bino, mwatambula bipya, kabiji ne bikwabotu, nobe ku kokoloka kufuma mutulo, nangwa bikwabotu. Pano, Bahebelu 10, ne veeleshi wabu 5, Paulo wi kitwezhamo.

Onkao mambo byo aishile panopantanda, aye waambile mba, Bitapisho... (Ao ye Kilishitu)... Bitapisho ne milambo anweba kechi mwibiswile ne, pakuuba mwanengezhezhe jimo mubiji:

69 Nga Tabbanako kyokika pano? Ke Mubiji, Lesa kwikala mu Mubiji.

70 Lesa kimye kimo, mwine mwiulu, Aye byo aishile pa mutumba, nangwatu inge ye—ye ng’ombe mulume nangwa ng’ombe mukazhi wakwata ku mutumba, wafwainwa kufwa. Lesa wazhila.

71 Bufuku bwapita, kimye aba Bamalaika po bamvwetele bilungi Byabo. Baselafi Bazhila na bilungi byazhila, kechi bayuka ne bubi byo bwalumbulula ne, kabiji Bakebewa kumvweta bilungi Byabo, mu Kyeenyi kya Lesa; bamvweta maulu Abo, mu kwikepesha.

72 Pano, Lesa wazhila kechi uswisha bubi ne, nanchi kechi kwajinga nangwa kintu kimo kyakonsha kukwata ku mutumba kwajinga Lesa ne.

73 Pano Lesa walengelwe ke muntu ne kwikala waikelenga mukachi ketu, mu musango wa Yesu Kilishitu, Mwaana Wanji, kilengwa Kyanji. Nanchi awa Mwaana wapaine bumi Bwanji, kabiji kakishi ka Mashi a kwa Lesa kalajikile, pa kuuba mba Bumi bufumemo mu Mashi, bwiye kwi atweba.

74 Kupichila mu oa Mashi twatokeshiwa. Kabiji pano mashi etu, bumi bwetu, aabo bwaishile kupichila mu masongola, bwaletele bumi bwetu panopantanda. Aa Mashi akwa Yesu Kilishitu etutokeshiwa atweba, apipula kisemwa kyetu, kupichila mu kutuma Mupashi Wazhila pe atweba; apo potwikala bakutambulako muchima wa Bulesa wakwa Lesa, popo twikalala kifulo kyakwikalamo Lesa. Yesu waambile mba, “Pajoja juba po mukayuka mba Amiwa nji mwi Bataata, ne Bataata baji mwi Amiwa; Amiwa mwi anweba, ne anweba mwi Amiwa.” Mwamona?

75 Yukai mba Lesa uji mu Kipwilo Kyanji. Akyo Kipwilo kyafwainwa pano kutolanga kifulo kya kwa Kilishitu, na kutwajijila mwingilo Wanji. “Aye waitabila mwi Amiwa, mingilo yo ngubapo Amiwa ne aye ukeyuba. Kwashala pacheche, bapanopantanda kechi bankamona Amiwa ne; nangwa byonkabyo anweba mukamona Amiwa, mambo Amiwa kekala ne anweba, monka mukachi kenu, kufika ne ku mpelo ya ntanda.” Mwamona? Abyo byokiji, kutwajijila na mwingilo Wanji.

⁷⁶ Bino, Lesa, nangwa Baibilo waamba papo, kyokyo. Sepetena waambile pe Solomoni na mambo kushimika nzubo yazhila, “Amba Mwine Wakila kechi wikala mu manzubo azhila ashimikwa na maboko abantu ne. ‘Mambo Mwiulu jo Jintanda Jami, kabiji ntanda kyo kyakutulapo maulu Ami. Pano nga kifulo kyakukokolokelapo Amiwa kyepi?’ ‘Pakuuba Mubiji Ye mwaneengezhezha jimo Ami.’” Amena. Byobyo kiji.

⁷⁷ “Awe Mubiji Ye mwaneengezhezha jimo Ami.” Lesa wikala mu kipimo kya kimino kya muntu, kupichila mu kwimweshwa Ayemwine muyewa Muntu. Bupopweshi bwalumbuluka! Lesa mwi atweba, kwikala Tente Wanji, Lesa kasa abena kwimweshwa. Oo, nakonsha kwikala pa kyokyo poso mwafika pa kipimo kyakupelelwa monka muno, namambo a kyuya. Monai, amba, Lesa bimye byonse, kimye byose, kasa abena kwimweshwa Ayemwine mu muntu.

⁷⁸ Awa wajinga Lesa mwi Mosesa. Monai pe aye, wasemekelwe ntangi; Kilishitu. Mu kimye kyo asemekelwe kwajinga kumanyikwa kwa baana, na kumukeba; pamotu byo kyajinga kwi Kilishitu. Kabiji aye wa—wapokolwelwe mu kyokya kimye; byo kyajinga ne kwi Kilishitu. Aye wajinga wakupana—mizhilo; ne Kilishitu byo ajinga. Mosesa waile, mooba foote, kabiji wakatambwile ne mizhilo, ne kubwela wabwela. Kilishitu waile mungyetu, pa mooba foote, ne kubwela wabwela, kasa aamba mba, “Anweba mwaumwine byo kyaambilwe mba, ‘Kechi ube bukende ne.’ Pakuuba, Amiwa ne mwambila namba, awa utala mwanamukazhi, na lwisu lwa kumukumbwa, waubila nanji jimo bukende monka mu muchima wanji.” Mwamona? Byonse bye bintu byapusanapusana, kuuba mba, Lesa wimwesheshenga Ayemwine.

⁷⁹ Monai pe Yosefwa, wasemekelwe nsongwalume wabumupashi mukachi ka—ka jibumba ja baana. Bajinga bonse banabalume bawama, bonse bashakulu. Bino, Yosefwa byo aashile, wajinga wapusanako. Aye wakonsheshe kumona bimwesho, kulumbulula biloto, kabiji bamushikilwe balongo banji mambotu akyokyo. Mambo ayenka mwingilo Lesa yeambukila pantanda amba obe, balongo banji bamushikilwe pa kyonkakya. Mwamona? Kabiji byonse bya byatongwelenga ku musalabo. Kabiji, monai, aye bamupoteshe pa mali a masiliva makumi asatu, ku balongo banji. Bamutaile mukimbo, nobe wafwa, ku balongo banji. Bamushikwile kumufumya mu kimbo, ne kuya kabiji wakekala ku kuboko kwa kilujo kwa kwa Felo. Kabiji kechi kwajingapo muntu wakufika kwi Felo ne, ye watangijile ntanda pa kyokya kimye, kapaji wakwiya kwi Felo ne, kanatu mwi Yosefwa. Kafwako muntu wakwiya kwi Lesa ne, kanatu kupichila mwi Kilishitu. Kabiji Yosefwa byo ashiile kipango, kasa akyengye kufumako, kwajinga tolopita yavumine, kabiji ba kumunyemena baishile koaji, kasa babijika, “Ne kumufukamina manungo! Yosefwa ubena kwiya!” Nangwatu

uji kwepi, nangwa paji kyo ubena kuuba, nangwatu mwingilo obe wanema byepi; wafwainwa kufukama manungo obe poso Yosefwa wafika.

⁸⁰ Kabiji umvwe Tolopita yavuma, juba jimo jibena kwiya, manungo onse akafukama ne jimi yonse ikashimuna. Kimye Kilishitu, Yosefwa wetu, byo akafuma Mulukumo ne kwiya, mwingilo obe kechi ukekala wanema pakyokya kimye ne. Manungo onse akafukama, ne kumushimuna mba Aye ye Mwaana wakwa Lesa. Abyo ibyo.

⁸¹ Oo, Aye twakonsha kumumona mwi Davida! Aye Davida, mfumu ye bakana, wafumine pa jitanda janji, ku balongo banji, mwaana wani mwine, waikela pa Mutumba wa Olobeta, aye byo akajijile, peulu ya Mutumba wa Olobeta, watajile panyuma ya Yelusalema ne kubijika; mambo bantu banji, bonka bo apulusha ne kwi bafunjisha bya kwa Lesa, kabiji bantu banji bamukaine ne kutaya bintu pe aye, kumushipila mate kabiji ne kumwendeleka, byo atatwile kuya peulu ya mutumba kabiji kasa bamukana. Oo, byo kyalumbuluka kya Mwaana wa Lesa, myaka eiti aduulendi palutwe; Mfumu ye bakana, mu bantu Banji Mwine, waikela pa mutumba ne kujila mambo a Yelusalema, nobe Mfumu ye bakana.

⁸² Kyajinga kika? Lesa kwimwasha Ayemwine mu booba bangauzhi, na kumwasha Kilishitu.

⁸³ Nanchi kwaishile Umo ao wajinga kulumbuluka kwa Lesa. Wajinga Lesa mukachi ketu.

⁸⁴ Kabiji kufuma ku kyokya kimye, Aye wimwasha Ayemwine mu Kipwilo Kyanji, kuluno lubaji lwa Kalvali. Nanchi, mwamona, atweba bonse tubena kukeba kufika kukikye kyakwikalamo, Tabbanako wa Lesa mumi. Pano kuji bantu bamo . . .

⁸⁵ Twamona papo, waambile mba, “Patanshi tuji na lwitabilo, bulume, maana, kwikanya, butekanye, buwame nangwa bulesa, kabiji butemwe bwakutemwa balongo.” Kijitu bulongo. Butemwe bwa kutemwa balongo, kabiji ne kubikapo butemwe. Lekai ntange kikye, byonse, ne jikwabo, nanchi mumone mba mwibitambula. Pano tusakutapila pa veeleshi wabu 5.

Kabiji na onka ano mambo, muteshako muchima, amba pa lwitabilo lweni mubikepo bulume; ne pa bulume mubikepo maana;

Kabiji pa maana mubikepo kwikanya; ne pa kwikanya mubikepo butekanye; ne pa butekanye mubikepo bulesa;

Kabiji pa bulesa mubikepo butemwe bwa kutemwa balongo; kabiji pa butemwe bwa kutemwa balongo mubikepo butemwe bwa bonse, bo butemwe.

. . . umvwe bino bintu byaikala mwi anweba, ne kuvula byavula, kechi mukekalatu ne nangwa kubulwa

kupanga bipangwa bya maana a kumuyuka Nkambo yetu Yesu Kilishitu ne.

⁸⁶ Pano, Petelo ubena kwitulondolwelapo kintu kimo, byo twakonsha kufika kokwa.

⁸⁷ Pano Nasaka kwamba kikye, namba, kuji bantu bamo baji na kibese kya bubwe bulume, maana, milangwe, butekanye, kabiji ne bikwabotu, ku booba babula Bwinakilishitu. Pano tujitu. . . tubena kufunjisha sukuulu wa Pamulungu. Kabiji akyo kyabukine. Kuji bantu bamo baji na lubaji lwa kikye, abo babula ne kwifwanyikizha kwikala Benakilishitu. Bino akyo kechi. . . Akyo kechi kikekyuba ne. Kijitu pamo nobe ng'onyi ufita ubena kukeba kwikala na mayona anduba ku byapi byanji, pakuuba mba ekale nduba. Ayemwine wilengeshatu buvu. Kyawamatu kwikala ng'onyi ufita. Mwamona? Inge waeseka kuuba bibye bintu kwakubula kwikala Mwinakilishitu ne, aye ujitu wabula pakifulo.

⁸⁸ Kijitu pamo nobe kinchi kya mukuyu kibena kweseka kulenga ma epozi. Kechi kyakonsheka kubikwa ne, monai, nangwatu nakyo kinchi. Bino kuuba kyalenga maepozi ne.

⁸⁹ Kijitu pamo nobe mbongolo ubena kukeba kulenga booya, kweseka kwikala mukoko bino kasaaji booya, nangwa, kasa aji mbongolo. Mwamona, aye kechi wakonsha kulenga booya ne. Aye kuuba wikyuba ne. Booya ke kyabupe kya mukoko, kechi mbongolo ne. Wakonsha kweseka kuuba byubilo nobe mukoko, nangwa byonkabyo ukijitu mbongolo. Mwamona? Nanchi, aye waamba mba, “Kyawama, Nakonsha kuja nobe mukoko. Nakonsha kuuba *kikye* nobe mukoko.” Kabiji nangwa ubetu byepi, wafwainwa kwikala mukoko pakuuba mba wikale na booya.

⁹⁰ Kabiji lekai ngimane ponkapano kamineti kamo. Mukoko kechi ulenga booya ne. Aye uji na booya mambo akuuba mba aye ye mukoko. Bantu bavula bingi beseka kwamba mba, “Kyawama, Nsakweseka kwikala wawama. Nsakweseka kuuba *kikye*.” Kafwako nangwa kimo kyo wakonsha kulenga ne. Ine, kuuba wikyuba ne. Mukoko kechi wikyuba ne, kechi wimpuzhiwa ne, kechi uketelwa kulenga booya ne. Wikala na booya, kabiji wikyuba mambo ye mukoko.

⁹¹ Kabiji umvwe wi Mwinakilishitu, obewa wikalatu na kipangwa kya Mupashi. Obewa kechi—obewa kechi wikilenga ne. Obewa kechi wakonsha kwikilenga ne. Obewa weseka. . . Kechi wakonsha kwilenga obewa mwine kwikala kintu kyo wabula ne. Obewa wikalatu muyenka musango ye wafwainwa kwikalamo, kabiji kilamawizhatu akyo kine. Mwaumvwapo kala bantu kebambe mba, “Kyawama, Amiwa na kubuula. Amiwa. . . Amiwa natwela mu kipwilo. Ami—Ami kine nafwainwa kuleka kubepa bubela”? Obewa ubena kweseka kulenga kintu kimo ne jikwabo, pano. Obewa kuuba wikyuba ne, nanchi kechi

kifwainwa ne kweseka ne, byonka byakonsha kubula—kubula—mbongolo kwilenga ayemwine kwikala na booya. Aye kuuba wikyuba ne.

⁹² Nangwa, kikwangala kukeba kuja pamo na nkunda, kikwangala kukeba—kikwangala kukeba kwikala nkunda. Mwakonsha kulanguluka kikwangala kokwa, kwamba mba, “Mwayukatu, Amiwa ne nkunda,” kabiji wabikapo ne mayona acheche pa mubiji, amba, “Monai, Amiwa mbena kumweka nobe. . .” Mwamona? Wakonsha kwikalatu mumusango ungi. Ao ye—ye muntu wamba mba njibibye bino kasa wabula muyeo musango. Monai, kechi wakonsha kwikyuba ne.

⁹³ Obewa kechi wakonsha kwamba mba, “Pano monai, Amiwa nafwainwa kwikala na bulume, nanchi Nafwainwa kwikala na bulume. Amiwa nafwainwa kwikala bulesa, nanchi Amiwa kekala muyeo musango.” Kika, obewa ubena kwesekatu kwibika mayona. Nangwatu mayona aji pepi ne obewa, bino kuuba wabika mayona ku ng’onyi ungi ne. Mwamona? Kechi kyakonsha kwingila ne. Kabiji kimweshatu bukafutufutu bwa yewa ng’onyi. Mwamona? Mwakonsha kuketekela mba kikwangala wakala kwikala na mayona a nkunda, kwamba mba, “Talai kuno, monai, Amiwa ne nkunda”? Mwamona? Kika, atweba bonse twayuka mba ye kikwangala. Mwamona? Mwamona? Byo byonka. Twakonsha kubuulang’ana mba awe kikwangala.

⁹⁴ Kyawama, pano abyobyoby kiji, kweseka ku—kulenga Bwinakilishitu. Kuuba mwikyuba ne. Kintu kitanshi kyo wafwainwa kuba, ke kusemwa jibiji. Obewa wafwainwa kupipulwa. Mwamona? Kabiji umvwe wapipulwa, wikala ke kilengwa kipya. Pano ubena kuuba bulongo, pano. Mwamona? Pano kechi wakonsha kusakamana na mambo mayona ne, kikeingijila akyo kine, inge—inge wasemwa jibiji. Ee, mwane.

⁹⁵ Nobe monka Mong’ambila kimye kyonse. Anweba mwatola awa—awa ngulu, mwamomvwa kabiji ne kumumvika suti wawama, nangwa suti ufita, byokabyo, pa mubiji wani, kabiji ne ku mulekelako; aye uji na sambu ya kubwela mu kimbo kya mateshi na kwalang’ana. Mambo, mwayukatu, kechi kyakonsha kuubapo kintu kyawama ne. Aye ke ngulu. Akya kyo kusemwa kyanji. Kwikata mumateshi kyo kusemwa kyanji. Obewa wafwainwa kupipula kusemwa kyanji, kabiji (aye) byashala bikengila abyobyoby bine.

⁹⁶ Pano, monai. Mwafwainwa kusemwa jibiji, ko kuuba mba, kupipulwa. Pafwainwa kwikala lupipu.

⁹⁷ Mwamba mba, “Kyawama, Mulongo Branham, Amiwa nayuka yuwe mwanamukazhi uji papo, kika, kechi waubilepo kintu kyatama ne. Aye ke mwanamukazhi wawama. Nangwa mba, awe *kananga-ne-kananga* mwanamulume, ke muntu wawama. Aye kechi ubapo kintu kikwabo ne. Mwayuka kechi uji na lukatazho na muntu ne.” Akya kechi kijipo na kilumbululo ne.

Wakonsha kwikala muntu wawama ye twalamakana nanji, bino aye kechi Mwinakilishitu ne kanatu wasemwa jibiji.

⁹⁸ Yesu waambile mba, “Inge muntu ne kusemwa jibiji ne,” Yoano Wazhila 3, amba, “aye kechi wakonsha kumona Bufumu ne.” Pano, aky a kyalumbulula mba, *monai*, kyalumbulula mba “kukwatakanya.”

⁹⁹ Mwatala pa kintu kimo, mwaamba mba, “Amiwa kechi ne kimona ne.” Anweba mwatazha mu kuuba mba kechi mwikikwatakanya ne.

¹⁰⁰ Muntu kechi wakonsha kukwatakanya kilengela bantu kubijika ne. Muntu kechi wakonsha kukwatakanya kika kilengela mulaka wa muntu wapipulwa kabiji waamba mulujimi ungi ne. Muntu wabutushi kechi wakonsha kumona lukumo lwa Lesa byo lwakonsha kwiya ku meso a muntu ne, kabiji wakonsha kumona kimwesho ne kubuula muntu kitu kimo, kabiji ne mwakwikyubila; kwibabuula bintu byafwainwa kumweka, kabiji ne kuuba bintu byafwainwa kufikizhiwa, nobe byonka byauble Nkambo muno bufuku bwapita, neapo. Mwamona? Mwamona? Aa—aa maana a bumuntu eseka kulanguluka mo kyatala. “Kyawama, wauble byepi? Nangwa, musangoka wa kintu kyo abena kwingijisha? Ng’anyi bujimuko boanji nabo?” Kumona muntu keambe mujimi, bakonsha kwamba mba... kabiji muntu umo walumbulula ne kubuulang’ana monka mo kyaikela ku membala umo wa Mubiji byo auba, kabiji ne byo akonsha kubula kuuba. Mwamona? Mwamona? Balanguluka mba ke kintu kimo kiji nobe kyabujimbijimbi. “Pajipo kintu kimo kyo bauba pakachi kaabo.”

¹⁰¹ Abo kechi bakonsha kwikikwatakanya ne kanatu awa muntu wasemwa jibiji. Nanchi pano umvwe wasemwa jibiji, nanchi pano poaji mu ndoonda ya bupopweshi, mambo aye ke kilengwa kipya. Awa musango wakala wakufwanyikizha, byubilo bya kuzhinauka byo ajinga nabyo, byafwa. Pano, aye ke kilengwa kipya. Nanchi, mwamona, aye kechi wakonsha kubikapo kintu kiji kyonse kulubaji lwanji ne, bino, mambo kikeyatatu akyo kine kubikwako.

¹⁰² Monai, wafwainwa kusemwa jibiji. Kabiji umvwe wasemwa jibiji, kuuba wasemwa jibiji kwakubula lwitabilo ne. Abyo ibyo. Nanchi, mwamona, pa ntachiko yami yakumwenako papo, Amiwa njina kine kintendekesho, lwitabilo kyo kintendekesho kya byonsetu. “Mambo kwakubula lwitabilo kechi kyakonsheka kutokeshwa Lesa pamuchima ne. Aye wiya kwi Lesa wafwainwa ku ketekela mba Iye, kabiji mba ye Ufweta bonse bamukebeshwa Aye.” Mwamona? Aye byo afwainwa kwikala. Kabiji umvwe obewa wazhinauka Baibolo, inge waikala waluzhinauko na Kyambo amba kiji bulongo, obewa wafwainwa kukikalatu poso patanshi wikitabila.

103 Bubi kyo kika? Kubula lwitabilo. Kujitu bintu bibiji bitangijila bumuntu. Kokuuba mba luzhinauko nangwa lwitabilo, kimo nangwa kikwabo. Obewa ujipo na kimo akyo kyaikala bunkambo mu bumi bobo. Kyaikelatu pa kuvula kwa lwitabilo lo unji nalo, kyo kyonka kyakonsha kukulengela kuya peulu po wafwainwa kufika.

104 Bino, kitanshi, kyafwainwa kwikala lwitabilo. Lekai ngikaleko pa kyokyo kintendekesho pa kimye kicheche. Pano, lwitabilo ke kyokya kyo wafwainwa kuketekela. Lwitabilo ke kyokya. . . “Lwitabilo ke luketekelo lwa bintu byaketekelwa kumweka.” Kiji mba, uji nakyo kala ingetu waikala na lwitabilo, mambo kisololwa monka mu lwitabilo. “Lwitabilo ke luketekelo lwa bintu byafwainwa kumweka,” Bahebelu 11, monai, “bukamonyi.” Kyo kika? Musangoka wa bukamonyi? Bukamonyi bwazhila.

105 Onkao mambo, inge mwaamba mba, “Mulongo Branham, Naketekela mba Lesa Ubuka.” Kyawama, inge waketekela kyokyo, kabiji pano wamutambula Aye kwikala Lubuko lobe, kabiji kechi kubepa bubela, bino kine kasa tubena kuketekela mba monka mubipumo Byanji motwabukilwa, kafwako nangwa kimo kyakonsha kukwalulula kufuma kukikyene. Ke kintu kyaikajikwa. Bino wafwainwa kwikala na luketekelo, watwajijilatu na kunyemena ku *kikye* kabiji kunyemena ku *kyokya*. Bino umvwe uji na lwitabilo, wikiyuka, mambo ke bukamonyi. Obewa wikitambula kala. Amiwa najinga. . .

106 Baanga, baji bonse, bajikumvwapo Oral Roberts lukeelo luno, byo akusapwilanga lukeelo luno, Oral Roberts? Na—Najikumumvwa kasa amba kintu kimo nangwa kikwabo mba kuji lwitabilo, lwa bupokolweshi, na kulomba lulombelo lwa lwitabilo, lwa bupokolweshi. Aye wajikwamba mba, “Unungakane pa kukwata ku waileshi, unungakane kupichila mukukwata kintu kimo, pakuuba mba. . .” Awa muntu wajikuubanga kyokya, pakuuba mba kipane ku bantu kintu kimo kyo bakonsha kukwatapo maboko. Kintu kimo, mwamba mba, “Amiwa njinakyo, mambo wambula mba kwate ku waileshi. Njinakyo.” Mwamona? Pano, akyo kijitu bulongo. Bino, pano, lwiine lwitabilo kechi luuba mba kana wakwata ku kintu ne. Pano, Amiwa kechi mbena kuzhachisha Mulongo Oral, nangwa pachechetu ne. Aye ubena kuuba mwingilo wabaya bingi, kabiji muntu wa bulesa, kabiji Ami—Ami kine namulanguluka bingi Oral Roberts. Kyatama bingi kechi tuji na bavula bamuyewa musango ne.

107 Bino kyo Mbena kweseka kwamba, mba—mba, lwitabilo kechi lukeba kintu kiji kyonse ne. Mwamona? Lwitabilo luketekela Kyambo kya Lesa. Mambo lwitabilo lwiya pa “kukwata”? Ine. “Lwitabilo lwiya pa kumvwa, kabiji kumvwa nako kwa Kyambo kya Lesa.” Akyo kikwachijila byonse. Kiji byo. Mwamona? Kabiji lwitabilo, nobe byo kyaambiwa, kechi

lujipo namusinso ne. Lwitabilo luji ponkapano. Lwitabilo luji pano. Pano nobe inge kuji muntu umo . . .

¹⁰⁸ Awa maana mucheche, juba jikwabo. Awa inanji Nyenga Kidd ne bakwabo ye baambilepo, awa wajinga namila yalupukile pangye, kechi wajinga na pashikuka ku mula wamukatampe ne, pakuuba mba kajo kapite. Pano, awe inetu, byo aumvwine Nyenga Kidd ne bakwabo bapana lushimuno, waketekejile mba inge wakonsha kukwatakana, kabiji Nalombelela awa mwaana. Pano, monai, Lesa witupa bantu . . .

¹⁰⁹ Atweba bamo tuji na byotwapitamo na Lesa, ki—kikala kitutulu kyakuuba mba Lesa wikalatu nobe kuya papo, kijitu nobe, kwamba ku Mulongo Neville nangwa muntu mukwabo ye wiyuka nanji. Kabiji bimye bimo twipuzha bobo bantu mba betulombeleleko. Abyo byo twafwainwa kuuba. Nanchi inge tuji na lwitabilo lwa kuuba mba awe mwanamulume nangwa mwanamukazhi, yense ubena kwitulombelela, ubena kwamba kwi Lesa, apo lwitabilo lwetu po lukwata. Kikala kyakwatwa. Kikala kyapwa.

¹¹⁰ Apo. Aye Mwinaloma waile na kumukumanya Yesu. Kabiji aye waambile mba, “Amiwa—Amiwa kechi nafikilamo mba Anweba mwiye mushi ya mutenge wami ne. Amiwa ne. Amiwa—Amiwa kechi nafikilamo ne. Kabiji Ami—Ami kechi . . . Ami—Ami kechi nebala kwikala byo byo ne. Bino,” waambile mba, “mwanami wamulume wakolwa bingi. Kabiji Anweba aambaitu Kyambo, monai, ne mwanami usa kwikala na bumi.”

¹¹¹ Kyajinga kika? Musinso kechi waletelopo lupusano ne. Mwamona? Mambo, Lesa utanwa konse konse. Lesa ye Wabulume bonse. Kabiji konse konse Lesa uji konka, bulume buji konka. Kabiji Lesa, byo aji utanwa konse, akyo kyo kilengela Lesa kutanwa konsetu, konse konse. Mwamona? Lesa ujitu pamo mukatampe mu Germany, mu Switzerland, kabiji ne moomwa mu Africa, pa kyonka kino kimye, byonka byo Aji kuno. Oo! Byo byo kiji.

¹¹² Nanchi pano aye waambile mba, “Amiwa kechi nafikilamo kyakuuba mba Anweba mwiye mushi ya mutenge wami ne. Ambaitu Kyambo.” Kyajinga kika? Kyajinga lwitabilo lwa Mwinaloma. Aye waji wikiketekela.

Kabiji Yesu waambile mba, “Yanga mu jishinda jobe. Mwanobe uji na bumi.”

¹¹³ Kabiji waile, lwendo lwa mooba-abiji. Kabiji jalondejilepo, kasa a kyangye kufika ku nzubo, wakumenye bamo bamingilo yanji na kwiya. Kabiji baambile mba, “Mwanenu uji na bumi.”

¹¹⁴ Kabiji Mwinaloma wajinga bingi nalusekelo, poso waambile mba, “Kimye ka kya mujuba po atatwile kumvwako bulongo? Kimye ka kya mujuba?”

Aye waambile mba, “Pepi nobe awala wa bujikumi na kamo, popo atatwile kumvwa bulongo.”

115 Kabiji Mwinaloma wayukile mba kyajinga kyonka kimye Yesu kyo aambile mba, “Mwanobe uji na bumi,” kabiji waketekejile. Amena.

116 Wabulume bonse, utanwa konse onse, wayuka bintu byonse, wabula mpelo, ye Lesa. Nanchi, inge baita pa foni ne kwamba mba, “Lombai!” Akwa kukwatakana! Kabiji lwitabilo lobe luleta Lesa. Kyo kintu kileta milombelo ne Lesa, pamo, pa kyokya kifulo. Milombelo! Lwitabilo lupipulwa kufuma *papo* kuya *papo*. Kibileta pamo.

117 “Ambaitu Kyambo. Kyonse kyombena kukeba Anweba kuuba ke kwambatu Kyambo, kabiji bintu byonse bijitu bulongo.” Monai, Aye kechi wafwaijilwe kutanwako ne. “Ambitu Kyambo.” Kika? Lesa uji konse konse. Aye Wabulume-bonse. Aye ujitu nangovu pamo byonka byo aji panshi yantanda byonka byo Aji peulu ya ntanda, nangwa ku lubaji lukwabo. Aye ye Lesa. “Kabiji kintu Anweba kyo mwakonsha kuuba ke kwambatu Kyambo,” byo aambile.

118 Kabiji, pano, lwitabilo luuba byonse byashala. Lwitabilo luuba byashala. Nanchi wafwainwa kwikala na lwitabilo lwa kwikala na kintendekesho. Bonse Bwinakilishitu, bo muji nabo bonse, bonse bo mukekala nabo, bwaikelatu pa lwitabilo mu Kyambo. Ao oene mambo o Naketekela Kyambo. Mwamona?

119 Amiwa kechi nakonsha kubika lwitabilo mu kintu kikwabo ne. Inge Nakonsha kubika mu kipwilo, ng’anyi kipwilo kyo Nakonsha kubikamo: Katolika, Lutheran, Methodist, Baptist, ba Pentekosito nyi? Kwepi ko Nakonsha kwilubikamo? Amiwa kechi nayuka ne. Bonse bobatu bingi kabiji ne byonse byashala, kuzhobakanya milaini, kabiji ne byonse byashala.

120 Pakuuba umvwe Nabika lwitabilo lwami mu Kyambo Kyami, kyaikajikwa. Kafwako wakonsha Kwikilumbulula ne. Abye byokiji, ABYO BYOBYAAMBA AYE NKAMBO. Nanchi Naketekela Kyokyo. Apo po paikajikwa byonse.

121 Dokotala wachepa mubiji wawama monka muno mu muzhi, mulunda nami, Dokotala Sam Adair. Twajingatu bansongwalume pamo. Anweba bonse mwayuka Sam. Kabiji waambile kwi amiwa, waambile mba, “Bill...” Panyuma yakwiba kwa kyokya kimwesho, wabujilwe pakushimikala mpuzha yanji, ne byo ikamweka. Pano twelaimo, mwimpuzhai kimye kimo inge kechi kyakine ne. Myaka ibiji nangwa isatu kasa kikyangye kubiwa ne, wabujilwe kwepi ko kikekela. Naambile mba, “Obewa ukasenda lubaji lumo lwa kyokya kishimikwa.” Kabiji kechi pajipo bintu byavula pakachi kaji ne kyokya, kabiji akya ke kifulo kya kubwezheshamo buntutulu bwa bantu. Dokotala Adair uji nabyashala, kabiji ne byakupana michi. Byo byonka. Dokotala Adair wayuzhizhe byobya monka

mwaikela, akya kimonwa. Kwepi, mpuzha yo aambile mba, “Kechi kyakonsheka nangwa kukwatako pa myaka tweti-faivi ne. Kiji mukije kyamambo.”

¹²² Naambile mba, “Dokotala, Lesa wikipana kwi obewa, mambo a kwikepesha kobe.”

Aye waambile mba, “Amiwa kechi nawama ne.”

¹²³ Naambile mba, “Obewa wi nkovu. Obewa uji na kibabulwa pangye, kibabulwa kyo utala pa balunda nobe kuno, bino mukachi koobe wi mwanamulume. Lupukamo mu kyokya kibabulwa.” Naambile mba, “Lesa wikipana kwi obewa.”

¹²⁴ Aye waambile mba, “Amiwa kechi na kikuzhinaukapo obewa ne, Billy, bino Nazhinauka kyokyo.”

Naambile mba, “Yangatu ku ofweshi obe.” Kabiji nanchi byo aile.

¹²⁵ Lukeelo lwalondejilepo, wangichile, ne kwamba mba, “Amiwa naumvwa mashika akungipaya.”

¹²⁶ Naambile mba, “Lukatazho lwepi?” Mwajinga mu Makumbikumbi. Naambile mba, “Lukatazho lwepi, Doko?”

¹²⁷ Waambile mba, “Napota kala aya mpuzha, Billy. Bajinga na mbung’eno bufuku bwapita mu Boston, kabiji Amiwa napota kala yoya mpuzha lukeelo luno.”

Naambile mba, “Nakubujile.”

¹²⁸ Najinga kokwa juba jikwabo, kasa ng’amba kwi aye, kimye buta po bwalajikile mu kilungi kyami. Aye waambile mba, “Nalanguluka mba Amiwa nabulang’ana kyokyo ku sauzande wa bantu beya muno, byonka byo.” Kyo kika? Pano, inge Lesa waamba kiji kyonse, kyafwainwa kubiwa.

¹²⁹ Bufuku bwapita balunda bamo baishile batwela. Baumvwine mba kimwesho kya aambilwe na mambo kalimbu wajinga na masengo maichi-foote-tuu, kabiji ne mbeyala wachiluluka uji nakipela-kya siliva. Amiwa kechi nayuka ne bantu baanga baiya ku nzubo, nakukeba kumona bibye. Naambile mba, “Awe tepu wakupiminako. Yai ku jisengo.” Aye wikyumvwine kyaambiwa kasa kikyanye kumweka ne. Mwamona? Kika? Inge Lesa waamba kintu kiji kyonse, kyafwainwa kumweka. Ao oene mambo, po kyaimena.

¹³⁰ Pano, *uno* ye mutanchi walupulukilo. Kabiji umvwe kimonwa Kyanji kyafikizhiwa bulongo, monkatu mo baambila mba mo kikobilwa, kabiji kino kipwilo kyayuka mba ibyo, pano byepi na Kyambo Kyanji? Mwamona? Akye kyaikala kya bukine kukila ne kimwesho. Inge kimwesho kechi kyaambile Kyambo ne, nishi akya kimwesho kyatama. Pakuuba ke Kyambo, patanshi, mambo Kyambo ye Lesa. Mwamona? Nanchi, Aye uji konse konse. Aye waambile kikye kuno, kabiji kyaishile

kufikizhiwa mu Canada. Amena. Mwamona, Aye uji konse konse. Kijitu bulongo.

¹³¹ Kitanshi, wafwainwa kusemwa jibiji. Kabiji umvwe wasemwa jibiji, uji na lwitabilo; obewa waketekela Kyambo. Poso wasemwa jibiji, obewa ukapachikanga Nakyo. Inge obewa ujitu kulubaji lwa bupopweshi, kabiji—kabiji uji na—na—na maana acheche a bumuntu mba wakonsha kuubatu bulongo, obewa kechi ukaswa Kyambo kya Lesa ne. Obewa kechi ukeyuba ne. Obewa wafwainwa kusemwa jibiji. Kabiji, kusemwa jibiji, kuleta lwitabilo. Kijitu bulongo. Nanchi, panyuma yakwikala na lwitabilo, apo ponka *pano*, l-w-i-t-a-b-i-l-o, lwitabilo, nanchi ujitu mu kifulo kya kukoma.

¹³² Pano, bantu bavula baya ku kitapisho, ne kulomba, ne kwamba mba, “Nkambo, ndekelaiko mambo.” Kabiji ne ng’umvino ya kutokeshiya iya peabo, kabiji ne bikwabotu. Nanchi anweba mwikala na kimye kyawama, bemana kukitapisho, kasa babijika. Anweba mwabwela kunyuma, na kwamba mba, “Apeshiwe Lesa, Amiwa ne kitambula.” Ine, po watatulatu kufika pa kifulo kya kukoma. Obewa kafwako nangwa kimo kyo wauba ne. Mwamona? Kintutu kyo wauba ke kwaalatu kintendekesho.

¹³³ Pano usa kushimika nzubo, kabiji wabikapo kintendekesho, ne kwamba mba, “Nsongwalume, Amiwa na mutambula.” Mwamona? Obewa uji na kintendekesho kya kushimikapo nzubo yobe. Pano wafwainwa kushimika nzubo.

¹³⁴ Pano apo ipo akye kintu po kyatwelelamo, lukeelo luno, kyo tubena kwambapo pakino kimye. Kijitu bulongo. Nzubo, akye kintendekesho kyo kitanshi. Kintendekesho kya Bwinakilishitu kyo kika? Lwitabilo mu Kyambo kya Lesa. Akyo kyo kintendekesho kyobe. Pano watatula kukoma. Pano watatula, watatula kubikapo pa kiky kintendekesho.

¹³⁵ Pano, kushimika nzubo, obewa wafwainwa kubika bintu bulongo ne byonse byashala. Mulongo Wood, ne bamo boo bakapeta kabiji ne makontalakita baji muno bakonsha kwitubuula byo bashimika manzubu abo. Mwamona? Bino Amiwa nsakwimubuula byo bashimika nzubo ya bumupashi, moakonsha kwikala Lesa. Aye ukeba kwikala mwi obewa. Aye ukeba kukwalula obe nobe Ayemwine. Aye ukeba obewa kumwekana, kumwekanyika, byonkabyo, Musango Wanji.

¹³⁶ Anweba mwayukatu, mu kimye kyakala byo babundanga golonde, kasa byakyangye kwikala na simeluta wakusungulwilako, abo bampumanga golonde, na kufumyako ndochi, kyela kya kapotwe ne mukuba ne bintu bikwabo, kwibifumyako, kabiji ne ku mwalula, na kumpumapo. Abo ma Indian booba kyokyo ne kino kimye, kumpuma golonde, kabiji ba mumpuma. Mwayuka byo bakonsha kubuulang’ana mba kyela kya kapotwe kyafumako, kabiji ne ndochi yonse ne

bintutu bikwabo, kabiji ne byapeulu byonse mba byafumako? Inge awa ubena kumpumapo wimona kilungi kyanji aye mwine, nobe galashi, monka. Yajinga yabula ndochi kabiji yatoka poso yamwesa kilungi kya ubampumenga.

¹³⁷ Abyo Lesa byobyo oba. Aye utola golonde Ye atana mu mushiji, kabiji Aye umumpuma, na Mupashi Wazhila, ne ku mwalula, ne kumwalula, ne kumwalula, kabiji ne kumumpuma poso (Watambula) Aye wakonsha kwimona Mwine. [Mulongo Branham wapopwela maboko anji bimye byavula muyuwe mukuku wabyambo—Waku.]

¹³⁸ Kabiji abye byo twafwainwa kuuba, kasa tumwesa Mwaana wa Lesa. Kabiji pano twafwainwa kuuba mwingilo Wanji. Aye waambile mba, “Aye wangitabila Amiwa...” Yoano Wazhila 14:7, “Aye wangitabila Amiwa, mingilo Yonguba ne aye ukeyuba.” Obewa ubena kutatula kumwesa mingilo ya Kilishitu.

¹³⁹ Bino bavula ba mwi atweba tweseka kwingila mingilo ya Kilishitu kumwekanyika kwa kwa Kilishitu kasa kukyangye kubiwa mwi atweba ne. Pano apo popaji lukatazho. Tumona byobyo bintu kasa bibena kumweka. Anweba mwikiyuka. Amiwa ne kiyuka. Tumona bibye, twituntula byo tubena kuya mujishinda. Tutana mulumba wa bamwingilo, ba Bwinakilishitu, kasa bayula mwaya mukwakwa, mambo a kuuba mba kechi batwelelemo bulongo ne.

¹⁴⁰ Kabiji oene mambo Amiwa kyo naishila lukeelo luno, na mambo a kweseka kufunjisha kino kipwilo kya kicheche, ne amiwa mwine, byo twakonsha kwikala kifulo kya kwikalamo Lesa mumi. Baanga batemwa kwikala byobyo? Kifulo kya kwikalamo Lesa mumi!

¹⁴¹ Pano bino byo tuuba. Kintu kitanshi kika? Kwikala na lwitabilo ne kusemwa jibiji. Ako ko kwaala kintendekesho.

¹⁴² Nanchi, panyuma ya kwaala kintendekesho, kya bubiji ke kubikapo pa kintendekesho kyenu. “Bikaipo pa lwitabilo lwenu,” Petelo waambile papo. Bikaipo pa . . . Kitanshi kwikala na lwitabilo, nanchi mubikepo bulume pa lwitabilo lwenu. Aye yo ndonda yalondelapo. Kitanshi, kwitulwilapo kintendekesho, lwitabilo. Nanchi, ku lwitabilo lwenu, bikaipo bulume.

¹⁴³ Pano, ponkapo bavula ba mwi atweba po bakakelwa. Ee, mwane. Ee. “Bikaipo bulume pa lwitabilo lwenu.” Akyo kechi kyalumbulula mba kwikala bumi bwa bukisungu ne, mwayukatu, nobe mwanamukazhi nangwa mwanamulume, kabiji ne bikwabotu. Akyo kechi kijipo na kintu kimo kyakuuba na kyokyo ne.

¹⁴⁴ Aye Baibolo waamba mba, tutanga papo mu Buuku wa Luka, apo po Kyaamba mba, “Bulume bwafumine mwi Aye.” Abyo ibyonyi? Inge twakonsha kwikala nobe Aye, twafwainwa kwikala na bulume, nanchi. Twafwainwa kwikala nabo, kwikala

nobe Aye. Ke lwimbo mutanshi Ye natememwe, mu—mu nyimbo ya mubuuku, umo wakila bingi, wajinga, *Kwikala Pamo Nobe Yesu*. Kyawama, inge Amiwa nsakwikala nobe Yesu, Nafwainwa kwikala na bulume, kabiji ne kupita kyakonsha kupita kuya kulutwe kufuma kwi amiwa kuya ku bantu. Mambo, “Bulume bwa fuminemo mwi Aye kuya ku bantu.” Bulume! Kabiji kasa bukyangye kufumamo ne, wafwainwa kwikala nabo patanshi. Obewa kechi uji nakyo ne, kechi bukafumemo ne. Kechi mujipo kintu kyakonsha kufumamo ne.

145 Pano byepi inge muntu umo waeseka kufumya bulume mwi atweba, kabiji kipepala kya kufumishapo mali kikala “kyabulwamo mali”? Mwamona? Ine, ine, kechi mujipo mwakufumisha ne, kipepala kya mali kechi kyaitabilwa ne. Muntu umo ubena kukumona nobe Mwinakilishitu, kabiji keesha ba kumona ke ube nobe ndengamambo, kechi mujipo bulume bwa kufumya mu kyokyo ne. Mwamona? Ibyo.

146 Bulume bwafwainwa kwikala mwi atweba. Kabiji kana twaikala na bulume... Nanchi inge twaikala na bulume bwakine, twakonsha kwibubikapo pa lwitabilo lwetu. Ayo yo ndonda yalondelapo pa kibumba kya kintendekesho. Pano, kitanshi wafwainwa kwikala na lwitabilo. Lwitabilo pa buke bwalo kechi lwakonsha kwingila ne. Obewa wafwainwa kwikala... Petelo waambile mba, “Nanchi bikaipo bulume pa lwitabilo lwenu.” Mwafwainwa kwikala na bulume, pakuuba mba mwibubike pa lwitabilo lwenu.

147 Pano, nanchi, kyafwainwa kwikala, oene mambo kyo wabujila kwikala nakyo, mambo bipwilo byavula bya leelo bimufunjisha mba kechi mwakonsha kwikala nabo ne, nangwa mba mooba abibye apita. “Kechi bafwainwa kwikala nabo ne. Kintutu kyo wafwainwa kuuba ke kutwelatu mu kipwilo. Ee, mooba apita.”

148 Bulume, muntu yense wayuka byalumbulula kyambo kya bulume, monai, kabiji twafwainwa kwikala nabo. Inge bulume bwafuminemwi Aye, pakuuba mba abule awa mwanamukazhi wakolelwe, Aye ubena kuketekela bulume bumotu mu Kipwilo Kyanji, mambo Aye wajinga kya kumwenako kyetu. Kabiji Aye inge wajinga na bulume bwakupana ku bantu, Ubena kuketekela atweba kwikala na bulume bwa kupana ku bantu. Kabiji bulume bobuka? Bulume ke ngovu, ngovu.

149 Bamo ba mwiabo kechi baketekela ne mu ngovu yakwa Lesa ne. Baamba mba, “abya—abya—abya byapita. Kintutu kyo wakonsha kuuba ke kunembatu jizhina jobe mu buuku, kabiji ne kusaswa meema, nangwa kwichila, nangwa ku batizhiwa, nangwa kyonse kikwabo. Kabiji byo byonka byo mwafwainwa kuuba.”

150 Bino Petelo papo waambile mba, “Bikaipo bulume.” Bino, Petelo ubena kwamba pa kushimika Nzubo yakwa Lesa, monai,

Tepo ya Lesa, kwiibika pantu pamo. Kabiji panyuma ya kwikala na bulume, wafwainwa kwikala. . . Panyuma yakwikala na lwitabilo, wafwainwa kwikala na bulume. Abyo ibyo. Ikalai na bulume bwa ntanda yonse.

¹⁵¹ Nasapwijile mutwe pepi nobe myaka tweti yapita, Naketekela, pa Rev. Mr. Lily. Lily, aye kafunga. Nekifumishe pa kibaba kyaambile Yesu mba, “Monai kikwibu, byo kibuula kujima nangwa kunowa. Nangwa byonkabyo Nemwambila namba, Solomoni buya bwanyi bonse kechi bujipamo nobe akyo ne.”

¹⁵² Monai pa kikwibu. Kifuma pene panshi mu mateshi. Kabiji kila mineti wa pajuba ukoka kufuma mu mushiji. Mwamona? Kabiji kyuba byepi na bubwe bulume bokikoka? Kibupana. Kikala na mwekelo yabuya ku yewa ukumbwa. Kishikula akyo kine mambo abuki, pakuuba mba lunyuki eye na kutola lubaji lwanji. Kechi wijizhanye ne. Ujitu nakyo, kya kupana. Byepi inge lunyuki waiya momwa; mali kechi afikilamo ne, kafwamo buki? Lunyuki mucheche wakonsha kukwanya mutwe wani ne kwamba mba, “Ng’anyi musango wa kikwibu kyo?”

¹⁵³ Inge muntu ubena kwiya, na kukeba lupulukilo, waya ku kipwilo kyaketekela mba mooba abya kukumya apita nyi?

¹⁵⁴ Nobo byaambile Jack Coe kimye kimo. wailenga mwakujila, kabiji mwajinga kyabaya patachikwa bya kuja; watatwile kutangapo, musunyi Wa-kukikupa ne bintutu bikwabo. Ne kwamba mba, “Amiwa nsakusenda musunyi Wa-kukikupa.”

“Kyawama, akyo kyajinga kya juba japita. Atweba kechi tuji nayo ne.”

¹⁵⁵ Ne abo bafwaina kutachika pa kipepala bya kuja, mwamona, abyo ibyo, mambo kechi bajipo na byakuja ne, nangwa byonkabyo. Nanchi ne anweba mwakonsha kuya munzubo mobajiila bino kasa mwabula byakuja.

¹⁵⁶ Kabiji muntu wabumupashi, ubena kukoma, ukebewa bya kuja. Akyo kyo Kyambo kya Lesa. Naketekela Kyambo kyonse Kijimo.

Lesu watachika tebulu pa kujiila bazhijikwa
ba kwa Lesu,

Aye ubena kwita bantu Banji basalululwa,
“Iyai muje.”

Na manna Anji Aye wibajisha, Aye upana ku
bya kubila byetu byonse,

Oo, ke kyawama kuja ne Yesu kimye kyonse.

¹⁵⁷ Abyo ibyo. Ee, mwane. Aye uji Nanji. Akyo Kipwilo kiji Nakyo, kipwilo kya Lesa mumi, akyo kyashimikwa muyuwe muntu walumbuluka, wa mu maana akwa Kilishitu. Pano, pano wafwainwa kwikala na bulume.

158 Naambile pa kyokya kimye, kintu kitanshi mwayukatu, kuji muntu umo watenwa kunusha bwema. Aye kechi witemwa ne. Aye uji na bwema. Kasa akyangye kupana bwema, wafwainwa kwikala nabo. Kasa akyangye kupana mali, wafwainwa kwikala naawo. Kasa akyangye kupana buuya, wafwainwa kwikala naabo.

159 Kasa ukyangye kupana bulume, wafwainwa kwikala naabo. Nanchi, bikaipo pa lwitabilo lweni, bulume. Amena. Mwikyumvwanji? Twakonsha kwikala pa kyokyo kimye kyabaya, pakuuba kimye kyetu kyakonsha kwitupwila. Bikaipo bulume pa lwitabilo lweni. Pano, kitanshi ke lwitabilo, palondela bulume.

160 Kabiji pano, kya busatu, bikaipo maana. Maana, pano, akyo kechi kyalumbulula maana a muntanda ne, mambo abo ke bumbulwa maana kwi Lesa; pakuuba maana a kupima bintu, kupima (ka?) kyawama ne kyatama. Mwakonsha kwi kipima byepi, nanchi, inge muji na maana a Bwinakilishitu na bulume bweni ne lwitabilo? Anweba mupima Kyambo kana kiji bulongo nyi nangwa ine. Kabiji inge wakonsha kufumyamo mafunjisho obe onse, kabiji ne kubula lwitabilo kobe konse, bintu byonse byo umona mba wibyuba, nanchi uji na maana a kwitabila mba Lesa kechi wakonsha kubepa bubela ne. "Lekai byambo byonse bya muntu bikale byabubela, pakuuba Byami bikale bya kine." Mwamona? Pano mubena kutambula maana. Awo o maana akilapo. Obewa kechi wakabilwa kwikala na madigili foolo a kufuma ku koleji umo, nangwa kintu kimo kya mubyobyo, pakuuba mba wikale nawo ne, mambo bonse bwe bulume bupewa kwi anweba kufuma kwi Lesa, pakuuba mba mubike pa kintendekesho kya lwitabilo lweni, mwafwainwa kufika ku kipimo kya kimino kyapwijijika, kya muntu mumi wakwa Lesa. Ee, mwane.

161 Bikaipo, bikaipo maana, mambo, oo maana a Kyambo Kyanji. Obewa wafwainwa kwi kiketekela mu jije jishinda. Kiji nobe bibye, obewa wafwainwa kuketekela leelo amba aye... kabiji ne kwikiswa, amba mooba abya kukumya kechi apwa ne. Maana akuuba mba byaambile Lesa, Lesa wakonsha kwi kyuuba.

162 Abulahama waketekejile kyokyo. Kabiji kimye kyo ajinga na myaka aduleendi, aye kechi wazhinaukile milaye yakwa Lesa na mambo akubula lwitabilo ne. Monai akya Kyambo byo kyamwekele kubulamo maana. Uno ke muntu, uji na myaka aduleendi, na kupembelela mwaana mba asemwe munzubo yanji, na mwanamukazhi uji na myaka naite. Mwamona? Pepi nobe myaka fifite yapichile, waikele nanji kufuma kasa a—anjitu nsongwakazhi, nangwa kasa ajitu mwanyike. Kabiji uno ye iye, bumi bwanji bwafwile. Kabiji ne munda mwakwa Sala mwaumine. Kabiji ne luketekelo lonse lwapwile, nobe mwaila luketekelo. Bino, nangwa byonkabyo, mwabula kufwainwa

luketekelo, aye wajinga na luketekelo, mambo wajinga na maana a kuuba mba Lesa wakonsha kulama byonse Aye byo alaile.

¹⁶³ Pano, umvwe uji nabo byonkabyo, nanchi kibikai pa lwitabilo lwenu. Inge muji na bulume bwakine, bubikai pa lwitabilo lwenu. Inge mwakonsha kwenda mu mukwakwa, mwaikala nobe Mwinakilishitu, ne kuuba byubilo bya Bwinakilishitu, ne kwikala Mwinakilishitu, bikaipo kyokyo pa lwitabilo lwenu. Inge uji na maana . . .

¹⁶⁴ Mwamba mba, “Kyawama, Amiwa kechi nayuka ne pakino kimye *akye* Kinembelo kana kijitu bulongo. Pano papo mu Byubilo 2:38, Amiwa kechi nayuka ne mwakubila na Byubilo 28:19. Amiwa kechi nayuka ne.” Kijitu bulongo. Anweba kafwapo—kafwapo kyo mwakonsha kubikapo ne, mambo anweba kechi muji Nakyo ne. Mwamona? Kika kyo usakuuba? Mambo, obewa kechi uji na maana afikilamo bulongo a kuyuka Lesa ne, nangwa byonkabyo, amba Baibolo kechi wipachika Ayemwine ne. Kilekaitu buke bwakyo. Kechi mwambepo bikwabo pa kikye ne. Mwamona? Kilekaitu buke bwakyo.

¹⁶⁵ Bino inge wakonsha kumona mba Kinembelo kechi kipachika ne, kyakuuba mba wakonsha kwamba mba; kabiji ne kumona, kyokyo, kupichila mu lumwekesho lwa kwa Lesa, Kyambo kyonse kyanembwa mu byafyamika, kabiji maana onka akwa Lesa oakonsha kusolola Kikye; nanchi inge mwafika ne kwamba mba, ikajikai Kyambo kyonse kya Lesa na “amena,” nanchi bikapo kikye pa lwitabilo lobe.

¹⁶⁶ Oo, obewa watatula kwikala muntu wawama bingi pakyonkake kimye. Mwamona? Obewa watatula kwiya bingi bulongo, mwamona. Na ka? Na lwitabilo, ne na bulume, nanchi ne maana. Monai awe muntu byo abena kushimikwa? Obewa wakonsha kumona kechi pajipo—pajipo mwakwikinyemena ne. Aje jo jishinda ja kwikelamo kipimo kya kimino kypawijijika kya Kilishitu. Ee, mwane.

¹⁶⁷ Kupima, kupima bulongo. Kupima kana kiji bulongo nangwa kyatama, kuketekela Kyambo kya kwa Lesa. Kupima kana kiji bulongo nangwa kyatama, kana Nakonsha kwingijila mafunjisho a bantu nangwa kwingijila Lesa. Pimai kana kiji bulongo nangwa kyatama, Nafwainwa kusemwa jibiji nangwa kwinunga ku kipwilo. Apo po watatula. Pimai bulongo, inge musapwishi wamba mba, “Mooba a byakukumya apita kala.” Aye Baibolo waamba mba, “Yesu Kilishitu ujitu pamo keesha, leelo, ne myaka yonse.” Pano kyepi kyowakonsha kwitabilapo?

¹⁶⁸ Inge waaamba mba, “Amiwa nsakutolapo Lesa.” Pano, obewa kechi wakonsha kwamba kyokyo mambotu akukeba kwamba ne, “Kyawama, Amiwa—Amiwa ne kisenda,” kufumatu mu muchima obe. Bino, kintu kimo mwi obewa, lwitabilo lobe lushijika kulupula pangye. Abyo byo kiji. Lwitabilo lobe lwaamba mba, “Nayuka Aye ujitu pamo. Amena. Amiwa

naikala Nanji na bukamonyi mba ujitu pamo. Kechi kuji kintu kyakonsha kwikifumya kwi amiwa ne. Amiwa nayuka mba Aye wakine.” Amena. Pano bikaipo kyokyo pa lwitabilo lwenu. Kibikaipo pa kintendekesho. Ubena kwiya pano, ubena kwiya kuya ku Bufumu. Pano wafika pantu pamo. Kijitu bulongo.

¹⁶⁹ Pano, kikwabo kyalondelapo, musapwishi wakonsha kukubuula, kabiji bantu bavula baamba mba, “Aye. . . .Abye bintu byo mutanga mu Baibolo, byajinga bya juba jikwabo. Pano, Amiwa ne mubula kyo kyaikela byobyoy. Mambo, kechi tukeba byobyoy bintu leelo ne. Atweba kechi twibikeba ne. Mwamona? Atweba kechi twafwainwa ne. Atweba kechi twafwainwa kuuba byobyoy bintu ne, lubuko lwa Bulesa. Atweba kechi tufunda kwamba mujimi ne, mu kipwilo, pakuuba—pakuuba mba tulame kipwilo kyetu bulongo. Kabiji kechi tuuba *bibye ne.*”

¹⁷⁰ Kyawama tusakufika kukyokyo. Amiwa njina Kinembelo kyalembwa papo na mambo akyokyo, mwamona, kyakuuba mba kana twakonsha kwi kyuba nangwa ine, pano.

¹⁷¹ Bino papo aye waambile mba, “Amiwa kechi nayuka ne. Atweba kechi twafwainwa kuuba kyokyo leelo ne. Kintu kimo kyo Nalanguluka kyo twafwainwa kuuba, twafwainwa kufunda kwamba bulongo kumeso ajibumba. Twafwainwa kuya na kupima butuntulu bwa milanguluko yetu, pakuuba mba bamone kana twafwainwa kwimana bulongo atweba bene, inge IQ wetu wasutulwa kyafwainwa pakuuba mba kyubiwe, kabiji—kabiji ne bikwabotu bya musango yekao. Nalanguluka. . . .Kabiji tuji na bipwilo bikatampe bingi. Twashimika kabungwe ketu.”

¹⁷² Atweba kechi tubena kushimika kabungwe ne. Amiwa kechi nji kuno lukeelo luno mu kuuba mba nshimike kabungwe ne. Kilishitu kechi watumine amiwa mba nkashimike kabungwe ne. Kilishitu watumine amiwa na kushimika muntu umo umo kwikala kipimo kya kimino kya Yesu Kilishitu, kuuba mba bekale nzubo yabulume kabiji ne kifulo kya kwikalamo Mupashi, monka mu Kyambo Kyanji. Monka mu Kyambo Kyanji, monai, kushimika muntu umo umo kufika mu kyokya kifulo. Kechi kushimika kabungwe kwikala dinominesheni mukatampe ne, kana kushimika muntu umo umo kwikala baana babalume ne babakazhi bakwa Lesa. Ao ye mwine mulanguluko. Mwamona? Bikaipo pa lwitabilo lwenu, bulume; pa bulume bweni, bikaipo maana. Kyawama, pano ubena kwiya pa kifulo.

¹⁷³ Pano umvwe batatula kwamba mba, “Kyawama, kechi twafwainwa kuswa kyokyo leelo ne. . . .” Wafwainwa kuuba. Byo kyafwainwa kwikala.

¹⁷⁴ Abyo Binembelo kechi byakonsha kubepa bubela ne. “Kabiji Abo kechi bafwainwa kwikala na kulumbulula kwa pabuke bwabo ne,” byo byaamba Baibolo. Obewa wafwainwa Kwikiketekela monka mo Kyanembelwa Momwa. Mwamona? Obewa wafwainwa kwikala na bibye bintu. Kabiji jishindatu jo

wakonsha kwikelamo naabyo, ke kwikala na maana asemwa-Mwiulu. Kabiji maana asemwa-Mwiulu akashinikisha Kyambo. Mwamona?

¹⁷⁵ Obewa wafwainwa kwitabila, kechi kitabila-mbijinga ne. Kafwako nangwa kimo kya mu bibye kya bukitabila-mbijinga ne, monai, inge waeseka kwamba mba, “Amiwa nji nakyo.” Kechi wikale ng’onyi ufita wamvwala mayona a nduba mwi obewa mwine ne, monai, mambo akaponapo. Kechi amenapo na kistemwa ne. Abikwapotu.

¹⁷⁶ Nalanguluka Davida po aambile popa, Masalamo 1, “Aye ukekala nobe kinchi kyajimbwa ku mikola ya meema.” Anweba mwayuka, paji lupusano pa kubyalwa ne kusupwa, kuntachikwa. Nobe kinchi kyakala kya maoka, kyajimbwa, kitwela panshi ne kukwata bulongo. Musapi wa mucheche wasumpwa popa, kechi mwayuka kyakonsha kumweka kwi akyo ne. Kechi kiji na mizhazhi ne. Kechi kiji na kintendekesho ne. Mwamona?

¹⁷⁷ Akyo kijitu nobe bantu bamo babena kufuma ku sukuulu wamambo awama nangwa kintu kimo, monai. Kechi baji. . . “Kyawama, Dokotala *Kananga-ne-kananga* wampesheshe mu mwingilo.” Kechi kijipo na lupusano na byajinga kyokya ne.

¹⁷⁸ Kilishitu wakusemene mukikye, mwamona, mwamona, monka mu lwitabilo lobe. Mwamona? Obewa wasangululwa kabiji ne kusemwa monka. Kabiji panyuma ya kusemwa monka, abye byo bintu Aye byo akuketekela kubikapo. Twajijilatu na kubikapo. Pano tubena kuya monka mu ndoonda.

¹⁷⁹ Kabiji paji kintu kikwabo pa aao maana, kyo twafwainwa kwambapo, maana a bulesa. Mwamona? “Bushe Baibolo mujino juba wataya kilumbululo Kyanji nyi?” Monai, abo, bantu bavula be mubuula mba, mba Baibolo kechi walumbulula kyokyo ne. Inge Lesa ubena kukenketa amiwa, kabiji ungolola mu bubi bwami, kabiji Amiwa inge ne mwaana wakwa Lesa, Aye uba kyokyo. Aye ukuubila mujojo jishinda, baana babalume ne [Kafwapo kiji pa tepu ne—Waku.] baana babakazhi. Inge wauba kintu kimo kyatama, Aye ukolola. Nanchi inge Lesa wakuta muchima, kyakuuba mba Aye ukukenketela kabiji ukoolola, pano ibyepi Aye kukilapo na Kyambo Kyanji, akyo kyokyaikala kya kumwenako, aao ye Ayemwine!

*Mu ntendekelo mwajinga Kyambo, ne akya Kyambo
kyajinga na Lesa, ne kyokya Kyambo kyajinga Lesa.*

*Kabiji. . . aalukile ke muntu, ne kwikala waikajilenga
muno mwetu, . . .*

¹⁸⁰ Akye Kyambo ke lumwekesho lwa Yesu Kilishitu, Baibolo ye waamba byoabyo, Kilishitu kasa abena kusololwa mu Kyambo Kyanji. Kabiji umvwe Aye ukukenketa kimye kyo uzhilulula aaye mizhilo, Aye ukuzhachisha na mambo aayo, pano ibyepi

Aye kukilapo byo Akenketa muzhilo Wanji awa ukuzhachisha! Amena.

¹⁸¹ Yangatu, nsongwalume, kechi wakonsha kumbula byobyoby bintu ne!

¹⁸² Amiwa naketekela mu akine, maana a Mupashi Wazhila. Mupashi Wazhila maana anji kimye kyonse etabizha Kyambo na “amena.” Inge obewa wamona bintu bimweka nobe bibena kwipachika abyo bine, mu Babilo, waikala panshi ne kupitulukamo, kabiji ne kulombapo. Kabiji kintu kitanshi mwayukatu, Mupashi Wazhila utatula kwenda. Pakupitapo kimye kicheche kikasa pamo, kabiji popo wikitambula. Mwamona? O maana.

¹⁸³ Bantu bamo baamba mba, “Kyawama, pano, Baibolo waamba mba Aye ujitu pamo keesha, leelo ne myaka yonse.”

¹⁸⁴ Kabiji kipwilo kyaamba mba, “Ku lubaji lumo, Aye ujitu pamo.” Uu-uu! Uu-uu! Obewa waasha mpuzha, ponkapotu. Mwamona? Ee, mwane. Ine, mwane. Aye ujitu pamo. Ee, mwane.

¹⁸⁵ “Yesu Kilishitu ujitu pamo keesha, leelo, ne myaka yonse.” Kechi mujipo lupusano mwi Aye, nangwa pacheche ne. Aye wikala mu Kipwilo Kyanji, na kuuba kintutu kimo. “Pa kimye kicheche,” nobe byo Nakwambula kimye kicheche kyapitapo, “mu kimye kicheche ne bapanopantanda kechi ba Nkamona ne, pakuuba anweba mukamona Amiwa.” Mambo, Aye waambile mba, “Amiwa kekala ne anweba, monka mwi anweba, kufika ne kumpelo ya ntanda.” Ne jikwabo, Aye waambile mba, “Mingilo yo nguba Amiwa ne anweba mukeyuba.” Ne jikwabo, Aye waambile mba, “Amiwa kekala Kinchi. Anweba mukekala misapi.” Kabiji musapi wikala na Bumi bonka bwa Kinchi. Byonse biji mu Kinchi biya kupita mu musapi. Lukumo! “Kilishitu ujitu pamo keesha, leelo, ne myaka yonse.” Kilipula Bumi bwa Nkambo Yesu Kilishitu. Amena.

¹⁸⁶ Maana; kechi a muntanda ne (atatula kulangulukapo). Misango yonse ya maana a muntanda alanguluka pa kintu. Mwamona? Pakuuba lwitabilo kechi lulangulukapo ne. Lesa wikisolola kwi obewa *kintu-kintu* kimo kikamweka, yense saayatisiti uji muntanda wakonsha kukubula, “Ke kintu kyapusanko. Kechi kyakonsha kumweka ne.” Obewa wakitabila, nangwa byonkabyo. Mwamona? Ee, mwane. Kechi lulangulukapo ne. Aye Baibolo waamba mba, “Tukundula milanguluko ingi.” Obewa kechi wakonsha kulanguluka na lwitabilo ne. Lwitabilo kechi lulanguluka ne. Lwitabilo luyuka pokiji. Lwitabilo lwingila. Lwitabilo lukwachijila. Kechi lwakonsha kusukana ne. Kafwako wakonsha kwi lusukanya ne. Amiwa kechi natako muchima ne nangwatu kyambe *kikye, kyokya, kikwabo*. Kechi kisukana, nangwa pacheche ne. Lwikala ponkapa, na kupembelela, na kupembelela, na kupembelela, na kupembelela. Kechi kijipo na lupusano ne. Kikalatu ponkapa.

¹⁸⁷ Lesa wabuujile Nowa amba abye bintu bikamweka. Aye wikiketekejile. Mwamona? Lesa wabuujile Mosesa amba bibye bintu bikamweka. Aye wikiketekejile. Lesa wabuujile banababwanga mba bintu bimo bikamweka, “Yainga kokwa ku Pentekosita na kupembelela.” Baikele ponkapa. Ee, mwane. Kijitu bulongo.

¹⁸⁸ Pano, maana, bino, kechi maana a muntanda ne, kana maana a Mwiulu. Kabiji maana a Mwiulu, inge Lesa ye nsulo ya maana, kabiji Lesa ye Kyambo, nanchi, inge uji na maana a Mwiulu, waketekela ne Kyambo, kabiji bintu byonse ke ulanguluke nabyo na Kyambo.

¹⁸⁹ Kabiji ao mambo a musoko ajingamo kipwilo, nangwa oo Najingamo. Umo wa mwiabo kimye kimo, pa kutotolola mambo, baambuujile. Mba, Naambile mba . . . “Abo kechi batainepo kintu kyatama ne.” Kabiji nanchi batatwile ku . . .

¹⁹⁰ Naambile mba, “Kyawama, nanchi, inge kechi pajipo kintu kyatama ne, kika kyo mwabuujila kufuma panyuma yami?” Mwamona? Mwamona? Kabiji Natwajijiletu kuya kulutwe, na nkumubuula Binembelo.

¹⁹¹ Aye waambile mba, muntu mukatampe wajinga na kasanga mu kuboko kwanji, waambile mba, “Mr. Branham, Amiwa ne wafunda Baibolo.”

Naambile mba, “Nasekela pa kumvwa kyokyo.”

¹⁹² Aye waambile mba, “Pano Nasaka kuyuka bibye bya kufwanyikizha, obewa ulipilisha tutwe tutambala toutuma, abya byakufwanyikizha bya ku lombelela tutambala kabiji ne kwitutuma, abya ‘bisapi byashingwa manyi,’ mwi bitela mba, ‘kisapi.’” Aye waambile mba, “Mwabwela kemulipilishe pa bibye.”

Amiwa naambile mba, “Ine, mwane. Kechi pajipo kulipilisha pa bibye ne.”

Kabiji aye waambile mba, “Kyawama, pa kikye kya kufwanyikizha.”

¹⁹³ Amiwa naambile mba, “Obewa wibiteela mba byakufwanyikizha, mwane. Obewa wajikumbula mamineti acheche apitapo mba obewa wafunda Baibolo.”

Aye waambile mba, “Amiwa.”

¹⁹⁴ Naambile mba, “Ng’ambwile Byubilo 19:11.” Maana! Aye mwine witwezhezhemo, wakebele kupipula mutwe. Naambile mba, “Nanchi ng’ambwile Yoano 5:14.” Kechi wikyubile ne. Naambile mba, “Nanchi Yakoba 5:14.” Aye kechi wikyubile ne. Naambile mba, “Bushe mwayuka Yoano 3:16?” Mwamona? Maana, kujimuka, ntanda! Bino kimye . . .

¹⁹⁵ Aye waambile mba, “Bino, Mr. Branham, obewa ubena kweseka kwamba aao mambo na Baibolo. Atweba tubena kwiaamba na mizhilo ya ntanda.”

196 Naambile mba, “Mwane, bushe mizhilo ya ntanda ke yaimena pa Baibolo ne? Nanchi ke buchibishi bwa mambo bwaoloka.” Amena! Kine.

197 Maana; kechi a muntanda ne. Bumupashi bwa maana a Kyambo, kuyuka byaambile Lesa, ubai byaambile Lesa, abyo ibyo. Nanchi inge obewa uji na kyokyo kabiji wakonsha kuketekela bibye bintu, amba Aye ujitu pamo, kabiji byonse bye bintu Kyambo kyaamba mba bya kine, obewa witabizha byonse bye na “amena.” Akyo kijitu bulongo. Bikaiipo kyokyo pa lwitabilo lwenu. Abyo bijitu bulongo. Ee.

198 Inge muntu umo wimubuula, mba, “Aye Baibolo wataya ngovu yanji. Kechi kujipo kintu kya kwamba mba lubatizhilo lwa Mupashi Wazhila ne.” Uu-uu. Keci ubikepo kyokyo ne. Kuuba kyaingila ne. Kyakonsha kufumapo. Kijitu pamo nobe kubika buchimba pa jibwe, kechi kyakonsha kwimana ne. Kyakonsha kupalang’ana.

199 Nanchi bantu be mubuula anweba, “Aye Baibolo kechi twakonsha ku muketekela ne leelo. Wafwainwa kwikala wajimuka pa kino kimye. Kechi wakonsha kuya kasa waketekela kyokyo ne. Kechi kyakonsha kwikala kya kine ne.” Anweba mumvwa kyokyo kimye kyonse. Ng’ambilo icheche, “Obewa kechi wakonsha kuketekela Baibolo ne.” Kyawama, inge—inge uji na kyokyo mu milanguluko yobe, obewa kechi—kechi wakonsha kwikibikapo ne, mambo kechi kyakonsha kwingila ne. Kishimikwa kyonse kyakonsha kuponena ponkapa.

200 Aye wafwainwa kupewa ngovu ku Mupashi Wazhila. Nalumbulula kukwatakana pamo, kikombola kibikapo katetesho. Kabiji kyonka kintu kimo kibikapo katetesho... Anweba mwayuka jishinda...

201 Chumbu wabikwa na mashinyi ubanda kukila walamikwatu-na kikamba. Kyuya kicheche kilengela kukwata pa kikamba kyakala kya pa taila, kintu kitanshi mwayukatu, mukabishaiko pacheche, ne kumunyemesha lubilo pacheche, kabiji kyakonsha kusunguluka. Ee, mwane. Mwamona?

202 Kabiji alo lo lukatazho luji mu bantu bavula leelo. Kabiji beseka kulamika maana abo pa maana amutanda, na nsulushonyi wakala mucheche wapantanda, kabiji, umvwe meseko aiya, “Kyawama, kape Najinga mungi.” Mwamona? Kabiji ne mwela ufumamo, upopoloka mu mamineti acheche. Konse kubijika kobe ne kukilauka peulu-ne-panshi kechi kwaingijile buwame kwi obewa ne. Bantu bakumona kubwela mu musango umotu ne jikwabo. Mwamona? Abyo ibyo.

203 Bino umvwe waikala popa na kyuuya kyabaya kya Mupashi Wazhila, poso mwaikala ke kimotu obewa ne kyupu. Abyo byokiji. Obewa ne kyupu mwaikalatu ke umo. Inge waikala popa poso obe ne mulaye yense wakwa Lesa mwaikala ke umo, pano

bikapo kyokyo ku lwitabilo lobe. Inge wabula kwikyuba, kechi wikibikepo nangwa pachechetu ne.

Anweba mwamba mba, “Akyo Kyambo kechi wakonsha kwikiketekela ne.” Kechi wakonsha kweseka kubikapo pa kyokyo ne.

²⁰⁴ Anweba mwamba mba, “Milaye iji mumwe, ya lubatizhilo lwa Mupashi Wazhila, lwajingatu ke lwa batumwa twelufu,” byonka byamba bipwilo bimo leelo, kechi ubikepo ne. Apo po paji kintendekesho kyabo, kyaonaika. Mwamona? Nobe byonka byajinga Uziya, bufuku bwapita, byo amwene kintendekesho kyayuwe mwanamulume ye aketekejile, kyonse kyakunduka, wakwachilwe na mbumba, kechi kyawamine ne. Pano, “Kyajingatu kya batumwa twelufu, bonkatu batumwa twelufu.”

²⁰⁵ Najinga kwi Mulongo Wright...Naketekela mba baji kunyuma kokwa kutu kumo. Bufuku bumo, kwajinga wamwingilo konka kwa, Nasapwijilenga, basapwishi foolo nangwa faivi bajinga pamo. Awe musapwishi waimene ne kwamba mba, “Bino, Nasaka kwimubuula batemwe kintu kimo. Oo, Naketekela mba anweba mwi bantu bawama bingi.”

²⁰⁶ Naambile mba, Nabuujileko muntu umo, Naambile mba, “Awa—awa waikala popa. Talai.”

²⁰⁷ Nanchi, Junior Jackson, kunyuma kokwa, po napwishishetu kwamba. Kabiji waambile mba...wasapwijilenga pa lusa lwakwa Lesa. Oo, ami!

²⁰⁸ Aye watemenenga, kupembelela. Aye waimene konka kwa kabiji waesekelenga kukwatakanya. “Bino, Nasaka kwamba mba Mr. Branham papo, Nakubuula obewa, ke antikilishitu.” Kabiji watatwile kuya byobya, bufuku bonse.

²⁰⁹ Bamo basapwishi batatwile...Naambile mba, “Pembelelaiko mineti umo. Bino, kwambapo nangwa kintu kimo ne, balongo. Aye ujitu bunke bwaji kabiji atweba kasa tuji bavula.” Naambile mba, “Mulekaitu bunke. Aye watoleletu amiwa.” Amiwa ne kikebelenga, amiwa mwine, kyabaya bingi, Amiwa kechi nayukile kya kuuba ne. Mwamona?

²¹⁰ Nanchi, waambile mba, “Mr. Branham ke antikilishitu,” kabiji watwajijiletu na kwamba byonse, mwayukatu, pepi... Aye waambile, “Aye waambile popa, ‘Pa lubatizhilo lwa Mupashi Wazhila.’” Waambile mba, “Aye Babibolo waambile mba kwajingatu twelufu batambwile lubatizhilo lwa Mupashi Wazhila.” Pa kwamba pa lubuko lwa Bulesa, “Bookatu batumwa twelufu bo bajinga na lubuko lwa Bulesa.” Aye waambile mba, “Atweba twamba ponka paamba Baibolo, ne kuzhindama ponka pazhindama Baibolo.” Namupembejiletu waamba pepi nobe afu awala.

²¹¹ Naambile mba, “Pembelaikotu mineti umo. Nanemba byavula papo,” Naambile mba, “mpaiiko lubaji lwa kukumbula

bimo.” Kabiji byo Naimene, Naambile mba, “Anweba mwane, wajikwamba mba ‘wambatu ponka pamba Baibolo,’ kiwpilo kyanji byo kyuuba, ‘ne kuzhindama ponka po Azhindama.’ Anweba bonse mwi bakamonyi. ‘Ee.’” Naambile mba, “Pano, wajikwamba mba ‘Kwajingatu twelufu batambwile Mupashi Wazhila.’ Wami Baibolo waamba mba kwajinga aduleendi ne tweti, kimyetu kitanshi.” Amena! Tayai musango wa oo maana, mwamona, kuuba mba aye waesekelengatu.

212 Naambile mba, “Nanchi Nalanguluka mba Paulo kechi watambwile Mupashi Wazhila ne byo aambile mba watambwile.” Mwamona?

213 Naambile mba, “Akwa ku...Byo aile Filipa kookwa na kusapwila ku bena Samaliya. Ba batizhilwetu mu Jizhina ja Yesu. Kanatu, Mupashi Wazhila ye wabujile kwiya pe abo. Kabiji batumenye na kuleta Petelo ne Yoano, waishile kobaji ne kubika maboko pe abo, kabiji Mupashi Wazhila waishile pe abo. Nalanguluka mba aba bajingatu twelufu?”

214 Naambile mba, “Mu Byubilo 10:49, kimye Petelo kyo ajinga peulu ya nzubo, kabiji wamwene kimwesho kasa baya kwi Koneleusa. Kimye Petelo kyo a kyambilenga bibye byambo, Mupashi Wazhila wibaponejile aba baumvwine Kyambo.” Naambile mba, “Aye Baibolo ukyambatu. Kipwilo kyobe kijipi?” Kiji kunyuma ya byo-kyafwainwa. Abyo ibyo. Mwamona?

215 Naambile mba, “lubuko lwa Bulesa, wajikwamba mba, ‘Bonkatu batumwa twelufu bo bajinga na lubuko lwa Bulesa.’ Aye Baibolo waamba mba Sepetena waile ku Samaliya kabiji wa kapangilemo bademona ne kubuka bakolwa, kabiji mwajinga lusekelo lukatampe bingi mu muzhi. Kabiji aye kechi wajinga umo wa batwelufu ne. Aye kechi wajinga mutumwa ne. Aye wajinga dikoni.” Amena. Amena.

216 Naambile mba, “Kabiji Paulo kechi wajinga umo wa mubooba twelufu batainwe pa nzubo ya peulu ne, bino wajinga na kyabupe kya lubuko.”

217 Naambile mba, “Pano monaitu pa bya bupe bya lubuko! Kabiji kuyatu, myaka sate kulutwe, aye wakijingatu mu Kolinda, kubika kyabupe kya lubuko mu Mubiji wa Kilishitu.” Oo, ami!

218 Pano, awa musango wa maana o mufuda kufuma mu buuku umo, kyawama kwiataya mu kikopo mu taiwa ndochi. Iyai ku aao maana. Inge Lesa waamba mba, “Aye ujitu pamo keesha, leelo, ne myaka yonse,” kwamba mba, “Amena.” Ee, mwane. Ee, mwane. Kechi ku bonka twelufu ne; ke kya bonse. Inge waikala na yewa musango wa—wa lwitabilo, inge lwitabilo lobe lwikiswisha, kyonsetu, na “amena,” nanchi waamba mba, “Kijitu bulongo,” bikako ku kyokyo.

219 Kya buna. Tusa kupelawizhako, mambo Amiwa jitu... Kyumvwanyika bingi bulongo pa kwimana kuno ne kwamba pa

kikye. Amena. [Mulongo waamba mba, “Tubena kwikyumvwa bulongo.”—Waku.] Ee. Kya buna . . . Nakusachila.

220 Bikapo “kwikanya.” Oo, ami! Twafika pa kwikanya. Pano, mwaikala na lwitabilo; mwafwainwa kwikala na kyokyo, kya kutatwilapotu. Nanchi wabikapo bulume pa lwitabilo lobe, inge ye musango wa bulume wawama. Nanchi wabikapo maana, inge ye musango wa maana waitabilwa. Pano musa kubikapo kwikanya.

221 Kwikanya kechi kyalumbulula mba, “kuleka kutoma malwa,” kuno, ne ako. Ine, ine. Kwikanya kechi kyalumbulula mba muchi wa malwa ne, kechi muyuwe musango ne. Akwe ke kwikanya kwa mu Baibolo, kwikanya kwa Mupashi Wazhila. Alo ke lukumbwatu lwa mubiji, pakuuba tubena kwamba pa kwikanya kwa Mupashi Wazhila. Akyo kyalumbulula, byo wakonsha kukanya lujimi obe, kechi kwikala kyabauki ne; byo wakonsha kukanya bukaji bobo, kechi kuzhingila kimye kyonse muntu kyo akonsha kwamba kwi obewa ne. Oo, ami!

222 Nsongwalume, bavula ba mwiatweba basakuponako kasa tukyangye kutapa, kechi byotuji nenyi? Mwamona? Nanchi twikala ba kumya bingi Lesa kyo abujila kwikala mu Kipwilo Kyanji ne, ne kuuba bya kukumya ne bintu byo aubanga kala. Ee, mwane. Mwamona?

223 Bikaipo bibye bintu. Bikaipo kwikanya pa kikye. Oo, kwikanya, bya kukumbula na muchima watekanya nangwa bakwambila na bukaji. Muntu umo wamba mba, “Anweba jibumba ja booba kyongo-kyazhila kookwa!” Kechi ukilukemo ne kufumamo ne. Mwamona? Kechi kyokyo ne. Pakuuba kwamba na butemwe bwa bulesa, kwikanya, muchima walusa. Jojishinda jo ueba kwikelamo nyi? Inge wa endelekwa, kubwezha myendeleko ne. Lekai Aye ekale kya kumwenako.

224 Byo baambile mba, “Inge Obewa wi Mwaana wakwa Lesa, alula ao mabwe ke shinkwa,” Aye wafwaijilwe kwi kyuba, ne kumweshwa mba Aye Lesa. Pakuuba Aye wajinga na kwikanya. Byo ba mwichile Aye mba, “Belezebuba,” Aye waambile mba, “Amiwa nkakulekela mambo pa kyokyo.” Abyo ibyo nyi? Bandosele maboko a yula myevu kufuma mu kilungi Kyanji, ne kushipila mu kilungi Kyanji, ne kwamba mba, “Mfumapo pa musalabo!”

225 Aye waambile mba, “Taata, balekelaiko mambo. Abo kechi bayukile byo baubilenga ne.”

226 Kimye ka, Aye wajinga na kya bupe, Wayukile bintu byonse, mambo mwi Aye mwajinga kuyula konse kwa Bulesa mu mubiji. Abo bamumwene Aye kasa oba byakukumya, na kubuula bantu byatama byo baji nabyo, kabiji ne bikwabotu. Babikile jiponda ku mutwe Wanji byo bya, pa meso Anji, kabiji ne Kumupuma ku mutwe na kinchi, kabiji waambile mba, “Aula, tubuule

ng'anyi waji Kukupuma. Atweba tusa ku kuketekela Obewa." Mwamona? Aye wajinga na kwikanya.

²²⁷ Pano, inge uji nakyu nobe byoobya, kibikaipo pa lwitabilo lwenu. Inge obewa ukizhingila ne kwamba aamba, ne kwendeleka, kabiji ne bushikwe, ne byakutwajijilatu, uu-uu, obewa kechi uji na... Obewa kechi wakonsha kubikapo kyokyo ne, mambo kechi kyakonshaeka ku bikwapo ne. Mwamona? Kechi kyakonsheka kulamachila ne. Obewa kechi wakonsha kutola kipimvwa kya labba ne, mwayukatu, kabiji ne kwikilamika ku kipimvwa kya kyela kya kapotwe. Kechi kyakonsha kwingila ne. Ine, kyafwainwa kwikala kyanekena, byonka biji labba. Mwamona? Kabiji umvwe lwitabilo lobe ne kwikanya kobe kwaikala musango umo wa kwikanya kwa Mupashi Wazhila Aye ko ajinga nako, popo kyafwainwa kulamachila kwi Aye. Obewa wabikwapo pe akyo.

Inge bulume boobe bwaikala nobe bulume Bwanji, popo kikabikwapo pe akyo.

²²⁸ Inge maana obe aikala pamo nobe maana Anji, "Naiya na kuuba kyaswa muchima Wanji, Anweba Lesa." Mwamona? Na Kyambo kya Bataata, Aye washijile yense diabola. Meulu ne ntada bikapita, pakuuba Kyambo kechi kikapita ne. Mwamona? Inge waikala nayewa musango wa maana, kikalamachila ku lwitabilo lobe.

²²⁹ Inge waikala na musango waitabilwa wa kwikanya, nobe Aye ko ajinga nako, kikalamachila. Inge kechi uji nanji ne, ujitu na musango wa kichika walengwa-na bantu, luketekelo lwa-nengezhiwatu, nangwa kwikanya, "Oo, Nafwainwa ku mwimbamo lupi, bino—bino kape kyawama Nabula kwikyuba, mambo bakonsha kubika jizhina jami mu pepala wa byambo pa kikye." Awo kechi ye musango wa kwikanya Ye abena kwambapo ne. Kechi mubikepo kyokyo ne. Kechi kyakonsha kwingila ne. Bino ine kine wakonsha, na buwame bwakufuma mu muchima obe, kulekela mambo muntu uji yense, wakwachijilatu, lekaitu kiyenga, mwamona, nanchi kyakonsha kulamachila. Obewa kechi wakonsha kubikapo kyokyo ku lwitabilo lobe ne. Wii!

²³⁰ Kechi kya kukumya ne kipwilo kyaipipa bingi. Kechi ibyo nyi? Kechi kya kukumya ne. Nakonsha kwamba mba, "Lapilai ne ku batizhiwa, Baibolo waamba mba, mu Jizhina ja Yesu Kilishitu." Kabiji aba bakosesha bya ba Lesa basatu mu umo kechi baketekela kyokyo ne, baamba mba, "Awa antikilishitu wakala. Aye ye Jizhina ja Yesu. Aye ye Yesu Yekatu." Talai pano, nsongwalume, Amiwa kechi nayuka kwikanya kobe ponka pano ne. Mwamona? Kika kyo wabujila kwiya, kwamba mba, "Twayai tulangulukile pamo, Mulongo Branham. Nasaka kumvwisha pa Kikye kulondololwa?" Mwamona? Nanchi waiya na kutelekako ku Kikye. Kabiji nanchi Kyabikwa ku meso obe, ne kufumapo wafumapo; Tusa—tusa kufika ku kyokyo

mu mamineti acheche, mu “bulesa,” mwamona. Pakuuba umvwe obewa—obewa wazingila, wakeba kunyemena pa byafumamo, uu-uu, abyo—abyo kechi ibyo ne. Mwamona? Obewa ukyangye kwikala na kwikanya kwa mu Baibolo; byo wakonsha kukumbula. Nanchi umvwe uji na byonse bye, wakonsha kubikapo kikye ku lwitabilo lobe.

²³¹ Nanchi, panyuma ya kyokyo, kya buna, wafwainwa kubikapo butekanye pa lwitabilo lobe. Inge uji na lwitabilo, “bwingila kuleta butekanye,” byo byaamba Baibolo. Mwamona? Nanchi, *abwe* bo butekanye. Pano, akyo kyo kintu kyalondelapo kya kushimika kipimo kyakimino. Mwayukatu, Lesa uji na bingijisho biine mu Kishimikwa Kyanji.

²³² Monai byo twapelelwa, mulongo, nyenga? Mwamona? Mwikimona kine kintu, tuji pepi? Ee, mwane. Mwamona? Tuji na lukumo, bya kubijika, ne bintutu, mambo tuji na lwitabilo. Pakuuba umvwe twafika ku bibye bintu *papo*, Lesa kechi wakonsha kwi tushimika mukyokya kipimino kya kimino ne. Mwamona? Aye kechi wakonsha ne. Aye kechi wakonsha kwitulenga mukyokya kifulo ne. Tuji na bibye bintu bikwabo. Atweba tupona, tutezhimuka nakyo. Mwamona? Aye kechi wakonsha kushimika Kipwilo Kyanji ne.

²³³ Butekanye naka? Musango ka wa butekanye? Kintu kitanshi, kwikala na butekanye na Lesa. Inge obewa uji na lwiine, lwitabilo lwa kine, obewa ukekala na butekanye bwa kine, mambo lwitabilo lwingila butekanye. Inge Lesa waamba kintu kimo, obewa wikitabila. Byo byonka. Obewa uji na butekanye.

²³⁴ Kwamba mba, “Kyawama, Namwipwizhe Aye bufuku bwapita amba ambuke, kabiji Amiwa kijitu wakolwa lukeelo luno.” Oo, ami! Ng’anyi butekanye?

²³⁵ Lesa wabujile Abulahama, bino myaka tweti-faivi palutwe kechi pajingapo ne kiyukilo kimo ne. Aye watwajijiletu na kuketekela. Aye wajinga na butekanye na Lesa. Uu-uu.

²³⁶ Mubikai Aye kimye kyonse palutwe yenu. Mulekai Aye ekale ke kintu kyalondelapo ku kilang’anya palutwe. Obewa kechi wakonsha kumukilang’anya Aye ne, nanchi mulamaitu Aye kulutwe yenu. “Aye wikyambile, kabiji kikobiwa.” Mwamona? Mulamaitu Aye kulutwe yenu. Abyo ibyo.

²³⁷ Nowa wajinga na butekanye. Ee. Nowa wajinga na bwine, butekanye bwa bulesa. Lesa waambile mba, “Amiwa mbena konauna inontanda na mvula,” kabiji Nowa wasapwijile myaka aduleendi tweti, nangwa byonkabyo. Butekanye bwavula. Kechi kwajingapo nangwa kime kufuma Mwiulu ne. Kwajinga kafwako. Kwajingatu lukungu byonka byo kimye kyonse, pa myaka aduleendi tweti, bino aye wajinga watekanya.

Nanchi, Lesa weseka butekanye bobo. Abyo ibyo. Lesa wibeseka.

238 Panyuma ya Nkubuula Nowa, pano Aye waambile mba, “Nowa, Nakeba mba uye ukatwele mu bwato. Amiwa mbena kutwezhamo banyama, kabiji Na—Nakeba mba utwele mukachi. Nkajila peulu, pakuuba mba, wakonsha kukeketa, pa windo wapeulu. Pano, Nakeba mba obewa utwele mukachi. Nakeba mba obewa ubuule baabo bantu, ‘Keesha, byo Nabasapwilenga pa myaka aduleendi tweti, bisa kubiwa.’ Kijitu bulongo, obewa yanga ukebabuule.”

239 Kiyukilo kitanshi kyajinga kika? Nowa watwelele mu bwato. Kechi kwajinga mvula ne. Nowa winengezhezhe, ne kumwala konchi wamvula, ne bintu byonse, pakuuba mba wakonsha kutala pangye, pa kimye pa kimye. Winengezhezhe. Pakuuba juba jalondejilepo. . .

240 Naketekela mba wafwaijilwe kubuula kisemi kyanji, ne bako-banji-babakazhi kabiji ne bonsetu, amba, “Oo, ami! Keesha mukamona kintu kimo kyo mukyangye kumonapo. Mambo, jiulu jonse, jikekalatu jafita. Ne bilulumo kabiji ne kubesha besha ku kubiwa. Lesa poko yanji ikatampe ikapita mwiulu. Aye ukazhachisha aje jibumba ja bandengamambo abo betekana, pa myaka aduleendi tweti. Anweba talaingatu ne kumona.” Mwamona?

241 Bamo baitabila lubaji lwa-afu, mwayukatu, baimana imanatu ne kutwela mukachi ne, mwayukatu. Anweba—anweba mukiji naabo, mwayukatu. Nanchi abo—abo baishile na kwamba, mba, “Kyawama, awe mwanamulume mukote wajingatu bulongo, nanchi tusakuya na kupembelako moba acheche, nangwa kupembelelako ma awala acheche mu kimye kya lukeelo, tukamone.”

242 Juba jalondejilepo, mukifulo kya jikumbi jifita, juba jasamine nobe byonka byo kyaikalanga kimye kyonse. Nowa watajile pangye. Waambile mba, “Aa, kechi kujipo jikumbi ne.”

243 Awa mwanamulume waishile, ne kwamba mba, “Aa, Nayuka mba obewa wajinga umo wa mwi abo. Mwamona, obewa waimanatu kuno.”

244 “Kyawama, ndekelaiko mambo, mwane. Ha-ha. Kapepo Ami—Ami—Ami najinga, mwayukatu, wasangalala, mwayukatu. Nobe, monai. Ha-ha-ha.”

245 Bino, Nowa, wajinga na butekanye. Waambile mba, “Inge yabula kwiya leelo, ikeya keesha.” Kika? Lesa byoabyo aambile.

“Kimye ka Aye kyo akubujile kyokyo, Nowa?”

246 “Pa myaka aduleendi tweti yapitapo. Amiwa naiya kufika pano, nanchi Amiwa mbena kupembelelatu.” Mwamona kyokyo nyi? Pa kupitapo ka kimye. . .

247 Twatana mba, Lesa waiya kufika pano, kupembelela Kipwilo, ne akyo, bino Ikekalako. Kechi musakamane ne. Aye Wikilaile.

248 Wapembelela lusanguko kyonse kye kimye. Lukekalako lumo. Kechi musakamane ne. Lesa wikilaile. Anweba pembelelaingatu na butekanye. Anweba mwalala tulo, akyo kechi kikobiwa. . . Anweba kape mukalalako pacheche kasa kikyangye kubiwa, bino mukabuuka pa kyokya kimye. Aye wikilaile, mwamona. Kulala pacheche, monai, kyotutela mba tulo twa lufu, mwayukatu. Kyo tutela mba lufu, ke kunkunuka kucheche, nangwa kulala mwi Kilishitu. Kafwako kya kwamba mba kufwa mwi Kilishitu ne. Bumi ne lufu kechi bitanwa pamo ne. Mwamona? Atweba tukunukatu, kunkunuka kwa kuuba mba balunda netu kechi bakonsha kwitubuusha ne. Aye Ye yenka wakonsha kwita. “Aye uketa, kabiji Amiwa ka Mwitaba,” byaambile Yoba. Yoba pano walala ke myaka biumbi bina. Kechi musakamane ne. Aye u—aye ukabuuka. Kechi musakamane ne. Aye ubena kukipembela.

249 Nowa wapembejile. Juba ja buna japichile. Kafwako mvula. Akyo kijitu bulongo. Kikamweka.

250 Nakonsha kumvwa Mrs. Nowa kwiya ne kwamba mba, “Taata, mwashinikisha ky- . . . ?”

“Kechi mwambe byobyo ne.”

251 Aye wajinga na butekanye, mambo wajinga na lwitabilo. Ee, mwane. Aye wajinga na bulume. Aye wajinga na maana mba Lesa ujitu bulongo. Aye wajinga wa kwikanya. Aye kechi wazhingijile, ne kwamba mba, “Kyawama, Amiwa kechi nayuka byo kiji ne. Nataya nkuwa yami konse konse.” Ine, ine. “Bantu kechi bantamuchima ne. Amiwa nkaya kokwa na kutapa jibiji, kipya jibiji.” Ine, ine. Aye wajinga na butekanye. Lesa walaile. Lesa ukekyuba. Lesa ukekyuba, mambo Lesa ye wikyambile.

252 Kabiji Nakonsha kumona mwaana wanji waiya, na kwamba mba, “Taata, mwayuka. . .” Wakwachile kuboko kwanji mu suku yamvwi ya lepa, mwayukatu. Kabiji wajinga na myaka ma aduleendi, mwayukatu, waikela byobya. Waambile mba, “Nayuka mba anweba mwi mushakulu mukote. Amiwa—Amiwa ne mutemwa, taata. Bushe kyakonsheka kuuba mba anweba mwaya mungi pacheche?”

“Oo, ine. Ine.”

“Kika?”

“Leso ye waambile byobyo!”

253 “Kyawama, taata, ano ke mooba sikisi o twaikala muno. Kwikala mu kino kyabaya, kyakala, bwato bwauma bwaikala pano. Kabiji bonse bwabikwa manenekela, mukachi ne pangye. Kabiji pa yonse ye myaka kasa tushimika. Kabiji anweba mwaimenenga na kusapwila, poso suki yaaluka ke mvwi kabiji ne jibala. Kabiji muji pano, kweseka kwamba mba *kikye-ne-kikye* kikananga. Kabiji bantu babena kuseka, ne kutaya tomato

waboola ne bikwabotu ku lubaji lwabo. Talai kika kyo mubena kuuba. Kika, mwayukatu. . .”

“Tekanyaitu, mwanami wamulume.”

“Kyakine nyi?”

“Ika noka!”

Muko-wanji-wamukazhi waambile, “Taata, mwayukatu. . .”

“Ika noka!”

²⁵⁴ “Bino pa yonse ye myaka, tubena kupembelela. Twaji kwinengezhanga. Kabiji ne anweba mwi tubuujile mba ikanoka, mulungu umo wapitapo. Kabiji tuji muno mukachi, kabiji ne bizhilo byonse byashikiwa, kabiji tubena kwendaukatu muno, kabiji juba jibena kusama na bulume byonka byo jajingatu.”

“Bino ika noka!”

“Mwayuka byepi?”

“Lesya ye waambile byobyo!”

²⁵⁵ Pano inge mwatambula mu jojo jishinda, kibikaipo. Pakuuba inge kechi mwikitambula muyewo musango ne, kechi—kechi mweseke kwikibikapo ne. Kuuba kyaingila ne. Kechi kyakonsha kwingila pa lubuko ne. Kechi kyakonsha kwingila paji ponse ne. Mwamona? Kyafwainwa kukwatakana na byakwingijisha bimo byo bekilamikako. Abyo ibyo. Wafwainwa kwi kibikako. Butekanye na mulaye wakwa Lesa. Ee, mwane. Nowa wikiketekejile. Kabiji wajinga na butekanye na Lesa, pa myaka aduleendi tweti.

²⁵⁶ Mosesa, wajinga na butekanye na Lesa. Ee, mwane. “Mosesa, Naumvwa kujila kwa bantu Bami. Amiwa namona kumanama kwabo. Amiwa mbena kwiya na kwibapokolola. Amiwa mbena kukutumako.”

²⁵⁷ Kabiji paji lupusano lucheche pakachi kaji ne Lesa, kabiji Lesa wamumwesheshe lukumo Lwanji. Waambile mba, “Pano Naya.” Kimye kyo amwene lukumo lwa Lesa, mwamona, aye wajinga na lwitabilo.

Waambile mba, “Kika kyo mu maboko obe, Mosesa?”

Aye waambile mba, “Mukombo.”

Aye waambile mba, “Mutaye panshi.”

Waalukile ke muloolo. Aye waambile mba, “Oo, ami!” Aye watatwile. . .

²⁵⁸ Waambile mba, “Mutoole, Mosesa. Inge Nakonsha kumwalula ke muloolo, Nakonsha kumwalula jibiji.”

²⁵⁹ Aa! Amena! Inge Lesa wakonsha kuuba buno bumi, Aye wakonsha kuupa Bumi bwa bumupashi! Inge Lesa wampele kusemwa kutanshi, Aye wakonsha kuupa Kusemwa kwa bubiji! Amena! Inge Lesa wakonsha kubuka *kikye*, kupichila mu lubuko

Iwa Bulesa, Aye wakonsha ku musangula ne jikwabo ku lukumo Lwanji, mu juba jikapelako. Abyo ibyo.

²⁶⁰ “Nakonsha kutaya mukombo panshi ne kumwalula ke muloolo. Nakonsha kumwalula ke mukombo. Mutolele ku lumizo.”

²⁶¹ Mosesa waile panshi ne ku mutoola. Kyabwela ke, mukombo. Aye watatwile kubikapo maana ponkapo. Mwamona?

“Lukatazho lwepi na kuboko koobe, pano, Mosesa?”

“Kafwako ne.”

“Kubiike mukwapa koobe.”

²⁶² “Kijitu bulongo. Pano kika. . .” Kwatoka na mbumba. “Anweba Nkambo, talai pa kuboko kwami!”

“Kubwezhe mu kwapa kobe, Mosesa.”

²⁶³ Aye wikubwezhezhe nobe *byobya*, kwabweleletu. . . Aye watatwile kubikapo nobe *bibye*, nanchi, mwamona. Ee, mwane.

²⁶⁴ Aye wafikile panshi popa. Kabiji kintu kitanshi kyapusanako. . . Aye wafikile popa. Waile kokwa ne kwaamba mba, “Aye Nkambo waamba mba, ‘Lekai bantu bami bayenga.’ Felo, Nasaka mba obewa uyuke kikye. Amiw naiya nobe ntomesha wakwa Lesa. Obewa wafwainwa kunkokela.”

²⁶⁵ Felo waambile mba, “Kunkokela? Bushe wangyuka Yami ng’anyi? Amiwa yami Felo. Kunkokela obewa, muzha?”

²⁶⁶ Waambile mba, “Obewa ukankokela, nangwa ne ukonaika. Obewa ukobapo kimo kyo ukeba kuuba.” Kika? Aye wayukile kyo aambilengapo. Aye wajinga na mwingilo. Aye wajinga kookwa. Aye waambile na Lesa. Aye wajinga na lwitabilo. Aye wayukile po aimene.

“Obewa ubena kukeba ami ku kunkokela? Mfuma kuno!”

“Amiwa kakumweshi.”

“Mweshopo kiyukilo.”

Aye wataile mukombo panshi; waalukile ke muloolo.

²⁶⁷ “Kika,” aye waambile mba, “ao maminimini akwa majishani! Iya kuno pa kaminetitu. Iya kuno, Yenesi, obewa ne Yambalesa, tayai mikombo yenu panshi.” Be atayile panshi, kabiji aalukile ke miloolo.

²⁶⁸ Waambile mba, “Pano, obewa kintu kyakukaishatu, iya kuno kwi amiwa, mwina Ijipita, felo waku Ijipita. Kabiji waiya kuno na maminimini obe a majiki, na bujimbijimbi bobo,” wayukatu, kutanga-milanguluko. Anweba mwayuka Monekitazha. Naketekela mba mubena kutanga pa kikye. “Kutanga milanguluko ya bantu nangwa kintutu kikwabo, mwamona, ee, iya kuno na bimo bya mubyobyoyo.” Waambile mba, “Kyawama, twakonsha kuuba bintu bimo byo ubena kuuba.”

269 Mosesa wajinga Kika? Aye kechi waambile mba, “Oo, Mr. Felo, Amiwa—Amiwa undekeleko mambo, mwane. Amiwa kekala muzha wenu.” Ine, mwane.

270 Aye waimenetu zoo. Amena. Ikala ponka pano. Lesa waambile mba, kechi wikale na luzhinauko mu muchima obe ne, “Zhindamaitu. Amiwa nsakukumweshapo kintu kimo.” Inge obewa wauba monka mo Akwambijile mba ube, kyamwekele nobe kyaya mungi; imana zoo, ikala watekanya.

271 Mosesa waambile mba, “Anweba mwayuka, byo Naajile kyokya kintendekesho, pajinga butekanye bwabikilwepo, nanchi Amiwa nsakupembelelatu ne kumona Lesa byoakonsha kuuba.”

272 Awa muloolo wakala wa, wazhokolokelenga, na kufomashika, ne kwita kaswelele umo kumukwabo. Kintu kitanshi mwayukatu, muloolo wakwa Mosesa waile, “Wamina, wamina, wamina,” kabiji waminine byonsetu. Aye wajinga na butekanye.

Bapembelela pe Nkambo, bakamvwikwa
bulume bwabo,
Ba katumbuka na byapi nobe bya mpungu.

Abyo ibyo nyi? Mwamona? Ee.

Bakanyemanga kechi bakakoka ne, bakenda
kechi bakapungila ne.

Mwamona, pembelelaitu pa Nkambo. Ikalai na butekanye. Mwamona? Ee, mwane.

273 Nanchi Isalela bamulupwilengamo. Lupusano lukatampe lwaishile, kabiji Mosesa wapembelejile.

274 Pano wafikile mungye. Ke lwendo lwafwainwa asatunangwa moba-foolo. Pajingatu ma mailoshi makumi ana po baabukijile, ponka po baabukijile ji. Bino, Mosesa, monka mungye, bapembejile myaka makumi ana. Butekanye. Amena. Abyo ibyo. Aye wapembejile myaka makumi ana. Oo! Ee, mwane.

275 Kabiji twafwainwa kwikala na butekanye umo na mukwabo, ne apo. Mwamona? Kimye kimo. . . Twikala—twikala babula ba kwitekenya umo ne mukwabo. Twalanguluka mba twafwainwa kwikala nobe Mosesa. Mosesa wajinga na butekanye na bantu. Talai, akyo kyo kyalengejile kubula kwabuka mubushiya. Mwamona? Inge mubena ukeba kuuba kintu kimo. . .

276 Nobo, Naeseka kuleta ino Mbila ku tabbanako, kumona mba kila membala wa tabbanako wafika ku *Kikye*. Kyashupa kwikyuba. Naeseka kwikala na butekanye; aye ke myaka sate-fiili. Mwamona? Ikalai na butekanye. Banabakazhi bakitenda suki yabo, bakijitu pamo. Bino ikalaitu na butekanye. Mwamona? Ikalaitu na butekanye. Pembelaitu. Kimufwainwa

kwikala. Inge kechi muji nabo ne, kechi mweseke kushimika *papo ne*. Ikalai na butekanye.

²⁷⁷ Kabiji kimye kimo, aja jibumba ja bantu basatuka butekanye bwakepele, balengejile Mosesa wauba kintu kyatama. Bino, nangwa byonkabyo, byo kyafikile pa kwikyombesha, Lesa wakolelwe na byubilo byabo. Aye waambile mba, “Ifungeko obewa mwine, Mosesa. Amiwa mbena kwipayaya jibumba jabo jonse, ne kutatula jipya.”

²⁷⁸ Aye wibikile mwine pakachi kabo, ne kwamba mba, “Lesa, kwikyuba ne.” Kika? Butekanye na bantu bamusatukijilenga.

²⁷⁹ Nakumya kana twakonsha kuuba kyokyo nyi? Inge kechi wakonsha kwikyuba ne, kechi weseke ne kushimika pa *kikye*, mambo kechi—kechi kipipulwa ne, mwayukatu. Ajo jojishinda muntu mutanshi jo anungakejilemo mu *kikye*, kabiji ajo jojishinda muntu yense jo afwainwa kunungakenamo. Inge wabula kuuba kyokyo, obewa kechi wakonsha kufika pa kipimo kya kimino kya kwikalamo Lesa mumi, inge kechi uji na butekanye ne, butekanye, umo ne mukwabo. Kijitu bulongo.

²⁸⁰ Baana ba Kihebelu bajinga na butekanye. Kine, bajinga nabo. Lesa wibalaile, wibambijile mba, “Anweba kechi mwakonsha kufukamina kilubi ne.” Bino bajinga na butekanye. Waambile mba, “Lesa Wetu wakonsha. Bino, nangwa byonkabyo, atweba kechi tukafukamina kilubi kyenu ne.” Butekanye, bayukile kikye, amba Lesa ukamusangula mu moba akapelako jibiji.

²⁸¹ Buno bumi kechi buji na kilumbululo kyabaya ne, nangwa byonkabyo. Mwamona? Lesa ukamusangula jibiji mu moba a kapelako. Pakuuba inge kyaiya na mambo a kufukamina kilubi, kechi twakonsha kwikyuba ne. Pano, tukapana kwi Kesala byakwa Kesala, bino, inge kyafika mu kuuba mba Kesala watatula kulubakanya na Lesa, Lesa wikala mutanshi.

²⁸² “Lesa waambile mba, ‘Kechi mwafwainwa kufukamina kilubi ne.’ Kabiji Amiwa kechi nakonsha kwikyuba ne. Lesa Wetu wakonsha kwitupokolola. Inge Aye wabula, Amiwa kechi kafukamina kilubi ne.”

Waambile mba, “Kijitu bulongo, akya kisha kyamujilo.”

²⁸³ “Kyawama,” aye waambile mba, “oo, Naketekela mba, mvula a noke kyabaya bufuku buno a zhimye mujilo.” Bino kechi wikyubile ne. Bajingatu na butekanye.

²⁸⁴ Lukeelo lwa londejilepo, byo baletelwe ku kije kya mambo, kwaikele Nebukaneza. Aye waambile mba, “Kijitu bulongo, bansongwalume, mwinengezha nkumvuluka amiwa nobe mfumu wenu nyi?”

“Kyakine. Ikalai myaka, Anweba mfumu.”

“Pano mfukaminai kikishi.”

“Oo, ine.”

²⁸⁵ “Kyawama, anweba mubena kusokwa. Anweba mwi banabalume ba maana. Anweba mwi bantu bajimuka. Anweba mwaikala na bukwasho bwabaya bingi kwi atweba. Anweba mwaikala mapesho ku bufumu bwetu. Kechi mwakonsha kuyuka mba Amiwa kechi mbena kukeba kuuba kikye ne? Bino Amiwa—Amiwa nabijika kala papo, kabiji kyafwainwa kubiwa. Amiwa kechi mbena kukeba kwimutayamo anweba ne. Oo, banabalume, lukatazho luji pepi ne anweba?”

²⁸⁶ “Nayuka mba abyo byaumvwanika bingi bulongo. Bino, Lesa wetu wakonsha kwitupokolola. Bino nangwa byonkabyo . . .” Bajinga na butekanye.

²⁸⁷ Batatwile kwenda kuya konka. Umo watajile ku mukwabo. “Akyo kijitu bulongo. Kijitu bulongo.” Bajinga na butekanye. Baendeleko lutapulo umo, Lesa kechi wajinga popa ne. Tapulo ibiji, Aye kechi wajingapo ne. Tapulo isatu, tapulo foolo, tapulo itanu, batwajijiletu na kuya, nangwa byonkabyo Aye kechi wajinga popa ne. Kabiji aye watapukijile monka mukisha kya mujilo. Bajinga na butekanye. Bino Aye wajinga ponka. Mwamona? Mujilo wafwainwa wibaponejile, wakonsha kusoka minyololo ku maboko ne ku mauulu abo. Kabiji byo bafikile panshi ya kimbo, Aye wajinga monka. Mwamona? Bajinga na butekanye.

²⁸⁸ Danyele naye kyajingatu musango umo. Danyela wajinga na butekanye. Kine. Aye kechi wibwelelemo ne. Ine, mwane. Waubile byepi? Aye washikwile mawindo na kulomba, nangwa byonkabyo. Kyajinga kipimo kya Lesa. Aye wajinga na butekanye. Aye wapembelejile pe Lesa, byo ayukile mba Lesa wakonsha kulama Kyambo Kyanji. Bamutayile mu jiyengo ja mabokwe, waambile mba, “Tusakuleka ba bokwe bamuje.”

²⁸⁹ Aye waambile mba, “Abyo kijitu bulongo.” Aye wajinga na butekanye. Kika? “Kyawama, Amiwa na pembelela kyonse kye kimye, pe Lesa. Inge Nakonsha kupembelela myaka ikwabo icheche kiumbi kimo, Amiwa nkasanguka jibiji mu juba jikapelako. Nanchi, uji na butekanye, pembelaitu.”

²⁹⁰ Paulo wajinga na butekanye. Ee kine. Monai Paulo byoaabule. Ambai pa butekanye!

²⁹¹ Pano ibyepi nga bantu baki pentekosito? Kikulutu baji na mwingilo, “Pembelaitu poso,” monai, “pembelelai posotu mu kayulwe na Bulume.” Bimye biinga? Abo kechi bajingapo na jipuzho ne, “Pa kapita bimye biinga?” Abo bajingatu na mukumbu, “Pembelelai posotu.”

²⁹² Baile popa peulu ne kwamba mba, “Kijitu bulongo, bansongwalume, kapepo mamineti fifitiini kufuma pa kino kimye Mupashi Wazhila usakwikala pe atweba kabiji tusakwikala na ng’ingijilo yetu.” Mamineti fifitiini a pichile,

kafwako nangwa umo ne. Juba jimo ja pichile, ine; ja bubiji, ja busatu, foolo, faivi, sikisi, sebeni.

²⁹³ Bamo mwi abo bafwajilwe kwamba mba, “Anweba, kechi mwalanguluka mba Tuji nanji kala ne?”

“Ine, ine, ine, ine.” Byokiji. Ine. Abyo ibyo.

²⁹⁴ “Anweba kyawamatu iyai, bansongwalume.” Diabola waambile mba, “Anweba—anweba—anweba mwayuka mwatambula kala kyo mubena kukeba. Yaingatu, mukatatule mingilo yenu.”

²⁹⁵ “Ine, ine, ine. Atweba kechi tuji Naji, ine. Mambo, Aye waambile mba, ‘Kulutwe kukeya, bika bikamweka mu moba akapelako: Nakikukuma ne jimi ingi yo Kamba nayo ku baabo bantu, kabiji akwe ko Kukokoloka ko Natongwele,’ monai, Isaya 28:19.” Amba, “Akye—akye Ikyo, anweba—anweba Mukamutambula umvwe. . . Kika, atweba tukayuka byo Akeya. Atweba tukayuka inge Waiya. Atweba tukamuyuka, ‘Mulaye wa ba Taata.’” Akwa bapembejile moba naini. Kabiji pano pa juba ja bu jikumi, “Atweba twajingako.” Bajinga na butekanye, kupembela.

²⁹⁶ Pano, inge uji na yewa musango wa butekanye, panyuma Lesa ya kukupa mulaye kabiji obewa wikimona mu Baibolo, “Ke wami,” nanchi pembelela. Nanchi, inge uji ne yewa musango wa butekanye, bikaipo pa lwitabilo lwenu. Kabiji umone byo ubena kuya peulu? Obewa ubena kuya peulu *papo* pano. Kijitu bulongo. Kakuboko kakoloko kabena kuzhokoloka, ne ako, kechi ibyo nenyi? Kijitu bulongo. Kijitu bulongo. Bikaipo kikyeye ku lwitabilo lobe.

²⁹⁷ Kimye kyonse Aye mubikai kulutwe yobe, kasa muvuluka mba, kyajinga Aye walaile. Kechi kyajinga amiwa, walaile ne. Kechi wajinga kafunga, walaile ne, Mulongo wetu Neville. Kechi kyajinga wamwingilo mukwabo, walaile ne. Kechi kyajinga pulisiti nangwa papa ne. Kechi wajinga muntu wa panopantanda ne. Kyajinga Lesa ye walaile, kabiji Lesa wakonsha kufikizha byonse Aye byoalaile. Kijitu bulongo. Inge uji na yewa musango wa lwitabilo, lwa kuyuka mba Lesa ye wikilaile! Amba, “Mulongo Branham, Amiwa nakolwa. Amiwa nakeba bingi lubuko.” Kiswai. Ke kyabupe kyapewa kwi obewa, ee, mwane, inge wakonsha kwitabila. “Kyawama,” waamba mba, “Amiwa naketekela.” Nanchi kilubekotu. Byo byonka. Kwapwa. Mwamona?

²⁹⁸ Ikalai na butekanye, inge uji na butekanye. Inge kechi uji nabo ne, obewa ubena kupolomokako ku kikyeye Kishimikwa, mwamona. Kikakundula kyonse kyashala, akya kintu kimo. Wafwainwa kwikala nakyo. Kechi wikibikeko ne, mambo, kikonauna kishimikwa kyobe inge kechi uji na butekanye ne, inge kechi uji na bulume bwa kubika ku lwitabilo lobe ne lo wamba mba njinalo. Kabiji inge kechi uji na lwitabilo luji

lonse ne, kabiji waeseka kupikapo bulume pe alo, kikonauna lwitabilo lobe. Mwamona? Anweba mwamba mba, “Kyawama, pano, pembelaiko mineti umo. Kapepo akye ke kilubotu, nangwa byonkabyo. Kapepo Lesa kechi Lesa ne. Kapepo kechi kuji Lesa ne.” Monai, kikonauna kyokya kintu mu bibiji. Mwamona?

²⁹⁹ Pakuuba inge uji na lwitabilo lwakine, nanchi bikapo bulume bwakine kwi akyo, nanchi ke maana a kine, nanchi pano ke kwikanya kwakine, nanchi ke butekanye bwakine. Mwamona? Obewa ubena kwenda kuya peulu mu ndonda. Kijitu bulongo.

³⁰⁰ Kya butanu, bikaipo bulesa. Oo, ami! Bulesa bubikwepo. Nga bulesa kyalumbulula ka? Natajile mu madikishonale foolo nangwa faiwi kabiji kechi nataine mo kyalumbulukila ne. Kyapelako, Najinga ku Mulongo Jeffries kookwa, twikitaine mu—mu dikishonali. *Bulesa* kyalumbulula mba “kupasha Lesa.” Oo, ami! Panyuma yakwikala na lwitabilo, bulume, maana, kwikanya, butekanye, waikala wapasha Lesa. Yii!

³⁰¹ Anweba mwamba mba, “Amiwa kuuba nauba kyokyo ne, Mulongo Branham.” Oo, ee, wakonsha kuuba.

³⁰² Lekai ne mutangilepo Binembelo bicheche papo, pa mineti umo. Mateyo 5:48. Tusa kusenda kikye tumone byo kibena kumvwanika, Mateyo 5:48, tumone kana wafwainwa kupasha Lesa. Anweba mwayuka mba Baibolo waamba mba, “Anweba mwi balesa.” Yesu byo aambile. Kika? Bulume bonse, byonse bintu biji mwi Lesa, biji mwi obewa. Mateyo 5:48, “Ikalai. . .” Yesu ubena kwamba papo, mu ng’ambilo ya mapesho anji.

Byonkabyo ikalai b-a-l-u-m-b-u-l-u-k-a, (Kyo kika?) kulumbuluka, byonka biji Shenu. . . wa mwiulu byo alumbuluka.

³⁰³ Obewa ubena kuya peulu *papo* pano, kasa ukyangye kwipuzhiwa kuuba kyokyo ne. Abye bintu byonse byafwainwa kubikwapo patanshi. Nanchi umvwe wafika peulu papo, Aye wakwipuzha kwikala walumbuluka, bulesa, baana babalume ne babakazhi ba kwa Lesa. Abyo ibyo. Bintu binga byo Nakonsha kwamba muyoyo ndonda!

³⁰⁴ Twayai tuye mu Efisesa 4, tumone biji papo, mu Buuku wa Efisesa, byo aamba pa bibye bintu, ne aye, na mambo a byo twafwainwa—byo twafwainwa kuuba. Efisesa, kyapitala kyabu 4, kabiji kutatwila pa veeleshi wabu 12. Efisesa 4, ne kutatwila pa veeleshi wabu 12. Kijitu bulongo. Twayai tutatwile papo pa veeleshi wabu 11.

Kabiji wapaine kubamo, butumwa; kabiji kubamo, bungauzhi; . . .

³⁰⁵ Mwavuluka bufuku bwapita? Kechi mweseke kutoola ofweshi wa muntu mukwabo ne. Mwamona?

...*kabiji kubamo, busapwishi; kabiji kubamo, bukafunga*...*kabiji kubamo, bufujishi;*

306 “Mambo a kulumbulula Lesa”? Bushe kitangwa byo byo nyi? [Kipwilo kyaamba mba, “Ine.”—Waku.] Kulumbulula bang’anyi? [“Bazhijikwa.”] Bazhijikwa bo bang’anyi? Bonka batokeshiwa. Amena. Bonka batatwila panshi *papo*.

...*kulumbulula bazhijikwa, mambo a kwingila mwingilo* (mwingilo wa Yesu Kilishitu), *mu kukomesha mubiji wakwa Kilishitu* (bekale bakukomesha, Kumushimika kutwalwa peulu, kukomesha): *poso*...

Poso atweba bonse mu kukwatakana mu lwitabilo, ne... maana a kuyuka Mwaana Lesa, kufika ku muntu walumbuluka, wafika mu luketekelo, (oo, ami), mu kipimo kya kimino kyakufikila kwa Kilishitu:

307 “Kulumbuluka,” kisendatu bulesa. Obewa wafwainwa kubikapo pa lwitabilo lobe, bulesa. Monai, watatwila panshi *papo*, na bulume. Bino waya pa maana. Kabiji waya pa kwikanya. Kabiji waya pa butekanye. Pano waya pa bulesa. Bulesa! Oo, ami! Kimye kyetu kibena kupwa. Twayai tumone. Bino mwayuka kyalumbulula bulesa. Anweba mwimba yuwe lwimbo:

Kumupasha Yesu, kumupasha Yesu,
Pano pantanda Nkebesha kwikala nobe Aye;
Lwendo lonse lwa bumi kufuma pantanda
kuya ku Lukumo
Naipuzha kwikala Nanji pamo.

308 Abwe bo bulesa. Kimye Aye kyo bamupumine kulubaji lumo lwa kilungi, Aye waalukijile ne kukwabo. Kimye kyo Bamwambijile byakonsa, Aye kechi waambile ne. Aye kechi wabwehezhe ne. Mwamona? Bulesa, kimye kyonse na kukebatu kintu kimo, “Amiwa kimye kyonse ngubatu kyonka kitokeshu ku muchima wa Bataata.” Mwamona? Ee, mwane. Kimye kyonse. Aabo bo bulesa. Mwamona?

309 Panyuma ya kwiya kufuma *papo*, kwiya *papo*, kwiya *papo*, kwiya *papo*, kwiya *papo*, kwiya *papo*, kwiya *papo*, pano ubena kwiya mu kipimo kya kimino kya mwaana wa Lesa. Pakuuba obewa wafwainwa kwikala na *kikye*, kubikapotu ne byonse *bye*, kabiji kechi wakonsha kutatulako ne kwakubula *kikye*.

310 Pano vulukai ng’onyi ufitu wajinga na mayona a nduba. Kechi mwakonsha kumulubako ne. Mwamona? Kechi wakonsha kwikibikapo ne kana patanshi wasemwa jibiji. Mambo, obewa, kechi kyakonsha kwingila ne, kabiji obewa—obewa kechi wakonsha kwikilengela kwingila ne. Kikeya ku *kikye*, nangwa ku *kikye* *papo*, kikakundukila pantu pamo.

311 Pakuuba umvwe wafika panshi *papo*, nkunda wakine-wasemwa jibiji, nanchi obewa kechi kubikapo kintu nangwa

kimo. Kibikwapo kwi obewa, mwamona, kibena kwiya peulu, kwiya mu kulumbulukapano. Kijitu bulongo.

³¹² Kabiji, kya butanu na kimo, twayai tubikepo, Baibolo waamba papo, bikaipo butemwe bwa balongo. . . butemwe bwa balongo. Pano, akyo ke kintu kyawama, ponkapo, kya butanu na kimo, sebene. Kijitu bulongo. Kubikapo butemwe bwa balongo. Kijitu bulongo. Inge twafika ku kyokyo, butemwe bwa balongo, ibeke obewa mwine mu kifulo kyanji, pa lolo lukatazho. Pano anweba mwaamba. . .

³¹³ “Mulongo wandengele mambo,” byaambile Petelo. “Nkamulekela mambo jinga,” aye waambile mba, “bimye binga pa juba?”

Aye waambile mba, “Sebete eye sebene.” Mwamona?

³¹⁴ Butemwe bwa balongo. Pano, mwamona, inge mulongo wafuma mujishinda, kechi mwikale babula butekanye nanji ne. Mwamona? Ine. Mwamona? Ikalai balusa nanji. Yanga, nangwa byonkabyo.

³¹⁵ Muntu umo waambile mba, kechi papita bimye byabaya ne, mba, “Wakonsha kuketekela byepi bibye bintu nobe byonka byo uba obewa, kabiji kasa ubena kuya ku Assemblies of God, kabiji ne Buumo, ne bonse bashala?” Nachi bikaipo, mwamona, butemwe bwa balongo. Mwamona? Mwamona? Kasa kyaketekelwa, juba jimo, monai; kwikanya; kushipikisha nanji; maana, pakuuba mba akwatakanye byo aketekela, vulukai, kiji mu muchima wangi, abyo byokiji; bulume, mwi obewa mwine, kwikileka kyaya na walusa, bukimote, kwi aye; kwikala na lwitabilo amba Lesa ukamuleta juba jimo. Mwamona?

³¹⁶ Butemwe bwa balongo, kintu kya butanu na bubiji. Wanu, tuu, fiili, foolo, faivi, sikisi, sebene. [Mulongo Branham wapuma pa bondi wamachoko bimye sebene—Waku.] Monai, kintu kya busebeni. Nanchi, pano, obewa ubena kwiya.

³¹⁷ Kikwabo kyalondelapo, kabiji, bikaipo butemwe, abo bo butemwe. Akyo jo jibwe ja jikoka. Juba jimo jibena kwiya, mu kipwilo. . .

³¹⁸ Bino, nasashijila, lekai kiyukanyikwe pa tepu, kabiji ne kukwabotu, Amiwa kechi mbena kufunjisha kikye nobe lufunjisho ne, kyo Mbena kwamba bukatataka. Bino Nasaka kwi mumwasha anweba, na bukwasho bwa Lesa, kine kintu byo kiji, kuuba mba, Baibolo mutanshi wanembelwe na Lesa wajinga Zodiac monka mwiulu. Watatulwa na kisungu. Wapelako na Leo ye bonkwe. Kabiji inge Nafika mukooka kabu Butanu na kamo kabiji ne Katetesho Kabutanu na bubiji, mukatana kuuba mba, aka kakwabo Katetesho byo kashikwilwe, kiyukilo kya kyokya kifulo kya Zodiac kyajinga ke cancer, jisabi jalenga musalabo. Kabiji aya yo nkulo cancer yo tubena kwikalamo kino kimye, yasololwa. Kabiji kintu kikwabo kya nshikwiile Katetesho, Kyasolwele Leo aye bonkwe, ke Kwiya kwa bubiji

kwa Kilishitu. Aye waishile, patanshi, ku kisungu; Aye ukeya jalondelapo, Leo ye bonkwe. Amiwa nsakuleta kikyeye ku . . .

³¹⁹ Bino, kechi Nayuka ne kana Nsakwikala na kimye lukeelo luno. Nsakuuba mo Nakonsha kwikyubila bulongo, pakuuba mba ne mumweshe amba aaye tampulo iji mu mapilamendi, byonkatu byokiji, ye Baibolo wa bubiji ye anembele Lesa. Enoka ye wi anembele, kabiji ne kwi abika mu pilamendi.

³²⁰ Kabiji wa busatu, Lesa kimye kyonse ulumbulukila mu busatu, nishi Aye wilenga Ayemwine bu Kyambo Kyanji.

³²¹ Aapo, pano, vulukai, mu pilamendi. . . Naketekela mba anweba bavula bashilikale ne bintutu bikwabo byajinga mu Ijipita. Aya pilamendi kechi iji na jikooka pe ajo ne. Kechi pakikalapo ne. Aja—aja Jibwe ja Suulwa, kabiji ne bintu byonse byo baji nabyo, bino nangwa byonkabyo . . .

³²² Inge uji na jali ja dollar mu pokochi obe, talaitu pa joja jali ja dollar, kabiji anweba musakutana mba, akwa kulubaji lwa kuboko kwa kilujo, jiji na mpungu uji na mbandela ya kiina America. Kabiji panembwa mba, katetesho “ka United States.” Kulubaji lukwabo, kuji pilamendi, iji na jikooka jikatampe bingi kabiji ne jiso ja muntu. Panembwa kululwe lubaji mba, “Katetesho ka katampe.” Kyawama, inge akye ke kyaalo kikatampe, kika ako katetesho kakatampe kyo kabujila kwikala katetesho ka kyaalo? Lesa wibalengela kushimuna, nangwatu baye kwepi.

³²³ Amiwa nesambilenga na dokotala kimye kimo, kabiji aye wapishishengatu mumujilo, pa lubuko lwa Bulesa. Waimene mukwakwa. Waambile mba, “Mr. Branham, ukatazhatu bantu.” Waambile mba, “Kechi kujipo lubuko ne, kanatu loka lwa mumichi.”

³²⁴ Amiwa naalulukile, ne kutala pa kiyukilo kyanji kiji pa motoka, kyajinga na yewa muloolo uji pa kinchi. Naambile mba, “Obewa kyawama kufumyapo kyokya kiyukilo kiji pa motoka obe, nanchi, mambo kyonka kiyukilo kyobe obewa mwine kibena kupana lushimuno mba Lesa Ubuka.”

³²⁵ Mwine dokotala wakine waketekela kyokyo. Aba ke booba babula kufunjishiwa bulongo. Ee, mwane. Awa muloolo pa kinchi! Mosesa wasutwile muloolo pa kinchi. Aye waambile mba, “Amiwa yami Yehoba ubuka bikola byenu byonse.” Kabiji batajile ku yewa muloolo, mambo a lubuko lwa Bulesa. Kabiji babwela ke bapachike nakyo; bino kiyukilo kyabo abo bene kibena kwibashinawinamo. Yii!

³²⁶ Muno, mu kyaalo kyetu, babena kwamba bintu, kabiji ne kwendeleka bibye bintu, kabiji mali abo bene, jali jabo, jipana lushimuna kubamba katetesho ka ntanda yonse ke Lesa. Monai aja jiso kasa jaimana popa peulu, pa joja jali ja dollar? Aka ko katetesho kakatampe.

327 Kechi kabikilwe peulu ya pilamendi ne. Abo kechi be kiyukile mo kyaila ne. Aja Jibwe ja jikooka ja sujilwe, Mutwe, Kilishitu. Bino Jikeya, juba jimo.

328 Pano, pa kushimika, bulume. . .Kushimika kikye kishimikwa, kushimika kikye kipimo kya kimino, monai, kitatula na jibwe ja kintendekesho; lwitabilo, bulume, maana, kwikanya, butekanye, bulesa, butemwe bwakutemwa balongo. Pano kyuba byepi? Nanchi ke bapembelele Mutwe wajikooka, kiji ke butemwe, mambo Lesa butemwe. Kabiji Aye ye utangijila, kabiji Aye bo bulume bwa byonse bye. Abyo ibyo. Ee, mwane.

329 Monka *muno*, monka *muno*, mwamona Nafika, pakanchi, yonse ye mingilo mumwe, kabiji kukwe ao manyaki acheche abena kwiya. Kyokika kyo? Aye Mupashi Wazhila ubena kwikila, kupita mwi Kilishitu, mwamona. Mupashi Wazhila! Aye Mupashi Wazhila uji peulu ya byonse *bye*, na kulamakanya byonse pamo, na kushimika (kika?) Kipwilo kya lumbuluka, pakuuba mba Jibwe ja jikooka Jibikwe peulu yakyo.

330 Kika kyaubiwa ne jikwabo? Kyasolokela mu ma Nkulo a Bipwilo Bitanu na bibiji, kabiji ne baluwe batanu na biji ba Bipwilo.

331 Kutatwila kunyuma *kukwe*. Kwepi kwatatwijile Kipwilo kintanshi? Kwepi kwatatwijile Kipwilo kya pentekosito? Kupichila mwi Paulo Wazhila, ku Efisesa, kabangabanga ka Nkulo ya Kipwilo kya Efisesa, Efisesa.

332 Nkulo ya bubiji ya Kipwilo yajinga Simulina. “Bulume.” Irenaeus, awa muntu kilobo wa kwachijile Mamboawama akwa Paulo.

333 Yalondelapo nkulo ya Kipwilo yajinga Pelegamuma, awo wajinga Martin. Martin wajinga muntu kilobo waikela. Paulo, Irenaeus, Martin.

334 Pano mu Tiyatila kwaishile Columba. Anweba mwavulukanyi? Kiji pano, kyalengwa *ponkapo*. Columba. Pakupita Columba. . . Aa Mankulo a Fishi atwelelemo.

335 Pano kwaishile Salandisa, kyalumbulula mba *wafwa*. Luther. Aleluya! Kika kikwabo? Kika kyalondejilepo panyuma ya Salandisa, Luther?

336 Pano kwaishile Filadefya. “Bulesa.” Wesley, buzhile! “Baoloka bakekela ku lwitabilo,” byaambile Luther. Kutokeshiwa kupichila mwi Wesley.

337 Pano po kwaishile butemwe bwa balongo, kupita mu Laodikeya. Kabiji twaketekela mu Mbila ikatampe ya kwiya kwakwa Elaija kwa bubiji, mu juba ja kupelako, ikakumbana ntanda yonse.

338 Abyo byokiji, Mankulo Atanu naabiji a Bipwilo, tapulo itanu naibiji. Lesa kushimika Kipwilo Kyanji, kijitu pamo nobe muntu umo uji mu muntu umo, mwi Ayemwine. Alwa lukumo, Ngovu ya

Lesa, kwikila panshi kupichila mu *kikye*, na Kwikinungakanya pamo. Onkao mambo, bantu ba ki Pentekosito bambila bena Luther, bambila bena Wesley ne bintutu bikwabo, kechi bayuka kyo babena kwambapo ne. Mwamona, abo baiklele mu *kikye* kibese kya tepo. Abyo byokiji, bantu bamo bakonsha kuya peulu kabiji bapona. Bino kasa kuji kibese kitutulu kya kyokya, kilengela kya kishimikwa kasa kiyatu na kukoma. “Amiwa kabwezha byo byaji,” byaamba aye Nkambo.

³³⁹ Anweba mwavuluka *Kinchi Kya Bumunsongwa?* Mwavuluka busapwishi pa *Kinchi Kya Bumunsongwa?* Abo be Kijiile, bino Aye wafumisheko byatama. Baiklele na misapi ya ki dinominesheni; Aye wafumisheko yatama. Baimikile kipwilo kikwabo, misapi ya dinominesheni; Aye wafumisheko yatama. Pakuuba muchima wa Kinchi watwajijiletu na kukoma. “Kabiji mu kimye kya mabaanga kikekala ke Kyeya.” Mwamona? Akyo kyo kimye kya kwiya Kilishitu, Mupashi Wazhila. Yesu waiya waikala Ayemwine ke Mutwe wa Kipwilo pano, kabiji Aye ukasangula kikye Kipwilo, byo kiji Mubiji Wanji Mwine. Monka *mwa* muji Mubiji.

³⁴⁰ Kabiji jishinda Lesa jo abena kuketekela atweba pa muntu buke kukoma, jo jishinda jalengwa ja kukomenamo Kipwilo Kyanji. Yonse nkulo ya Kipwilo, Ikala ke Kipwilo kimo kikatampe. Mwamona?

³⁴¹ Abo balongo kechi bakebelwenga kwikala *biji* baabo balongo ne. *Akye* kechi kyakebelwenga kwikala byajinga *bibye* ne. Mwamona? Bino Aye wakomeshe Kipwilo Kyanji mumusangotu umo. Aye wakomeshe Kyanji—Kyanji Kipwilo mu musangotu umo monka mo Abena ku komesheshemo bantu Banji. Nanchi Petelo papo waamba, patanshi, bintu sebeni: lwitabilo, bulume, (monai, kuya kulutwe), maana, kwikanya, butekanye, bulesa, butemwe bwakutemwa balongo, bikaipo butemwe bwakutemwa balongo, kabiji pano ne butemwe bwakwa Lesa. Aye Mupashi Wazhila, Kilishitu mu bumuntu bwa Mupashi Wazhila, wiya pe obewa, mu lubatizhilo lwakine lwa Mupashi Wazhila, kabiji uji na bonse bwe bulume bwabikwa mwi obewa. Nanchi, Lesa wikala mu Tabbanako, watelwa mba Kishimikwa, Tabbanako mumi mwakwikala Lesa mumi.

³⁴² Inge muntu waikala na bibye bintu, nanchi Mupashi Wazhila popo eya pe aye. Kechi oene mambo ne, wakonsha kwamba na jimi ingi, wakonsha kupashang’anya kya bupe kyonse akyo Lesa kyo aji nakyoye. Wakonsha kuuba kyokyo. Bino kanatu abwe bulume *papo* bwaiya mwi obewa, obewa uji kungi na kyakine, kintendekesho kya kine kya lwitabilo. Pakuuba inge abwe bulume bwakoma mwi obewa, kabiji wabikapo kyokyo pa kyokya, nanchi obewa wikishimikwa kyumi. Obewa wi kyumi, kilubi kibena kwenda.

343 Bino, mwayukatu, ba—batunshi, bapona kikuvumene ku meso a kilubi, lesa wakufwanyikizha. Kabiji monka mujishinda ja kufwanyikizha baketekela mba awa lesa wakufwanyikizha wamba nabo. Awa ke musango wabutunshi. Abwa ke bwina Loma. Abo bafukamina misango yonse ya bazhijikwa kabiji ne byonsetu. Kabiji baji na Wazhila Cecelia, lesa wa nzubo, kabiji ne bintu byavula bya musango yewa. Abo bafukamina kyokya, kabiji abo baketekela kyokya mu jishinda ja kufwanyikizha. Ke—ke kipasha kya musango, wa Lesa mumi wa kine.

344 Pakuuba umvwe atweba, kechi mujishinda ja kufwanyikizha ne, waponna kikuvumene atweba bene kwi Lesa mumi, bulume bumi, maana omi, butekanye bumi, bulesa bumi, Ngovu yumi yibena kufuma kwi Lesa mumi, kilengela muntu mumi ke kipasha kyumi kiji mu kipimo kya kimino kya Lesa. Aye ubena kubaka? Bintu bimo byonka byaubilepo Yesu; ng’endelo imo yonka yo a endepepo Aye, na kuuba bintu bimo byonka byo Aubilepo. Mambo, kechi ke kintu kyakufwanyikizha ne. Kuji butuntulu bushinikisha.

345 Mwamona Moombena kutazha nyi? Monai abwe bulume, abye bya kushimikisha, pashang’anyai na baluwe ba Kipwilo, na mankulo a Bipwilo? Bino, juba jimo ja aao moba, tukasenda kimo kimo kya bibye byambo, kabiji ne kwibifunda, kabiji ne kumweshwa mba byakine. Byonse byendela pamo. Kine. Mwamona? Oo, ami! Byo kyaikala kyawama, monai, pa kumona byo—byo kyuba.

346 Pano, ayo yo Nzubo Lesa yo ekalamo; kechi kishimikwa kiji na mbelu mukatampe peulu yakyu, kabiji ne mutenge walepuluka ne. Mwamona? “Pakuuba Mubiji Ye mwanengezhezha Amiwa,” Mubiji awo Lesa ye akonsha kwikalamo, Lesa ye akonsha kwandelamo, Lesa ye akonsha kumwenamo, Lesa ye akonsha kwambilamo, Lesa ye akonsha kwingijilamo. Amena! Byumi bingijisho byakwa Lesa, Lesa kwenda na mauulu abiji, mwi obewa. Lukumo! “Tapulo ya waoloka itangijilwa na Lesa,” Lesa kwenda mwi obewa. “Mambo anweba mwi makalata anembwa, atangwa ku bantu bonse.” Kabiji inge Bumi buji mwi Kilishitu bwaikala mwi obewa, ukekala na Bumi bonka bwajingapo ne Kilishitu.

347 Nobe byonka byo Ng’amba kimye kyonse. Mfumyaimo meema mu kinchi kya mapichi, kabiji inge mwakonsha kwibutwala kungi, kupichila mukutuntulula, kutwala mu kinchi kya maepo, kinchi kya maepo kyakonsha kupanga mapichezi. Kine. Kine kyafwainwa. Kechi mambo ne nangwa misapi imweke musango ka, kiji na meema a kinchi kya maepo mukachi kakyo, monai, nangwa kikaletu ng’anyi musango wa kinchi. Mwamona? Mwafumyamo bumi bwakyo mu kinchi kya maepo, bufumyaimo, kabiji ne kwikipa ku—kutuntulula kwa meema, kabiji mwafumya mu kinchi kya mapichi ne kutwala mu kinchi kya maepo. Kika kimweka? Kechi kikapanga jibiji

mapichezi ne. Mwamona? Ine, mwane. Kechi kikobiwa ne. Inge bumi bwa kinchi kya mapichi bwaiya mu kinchi kya maepo, nangwa byonkabyo, kechi kikapanga jibiji maepo ne. Kikapanga mapichezi, monai, monai, mambo kiji na bumi mukachi kakyo.

³⁴⁸ Kyawama, mwatola atweba, kafwako byo kiji ne ke kya mungyetu, kyakaswa ku mutwe, monai, kabiji kafwako kyo tuji nakyo ne, mambo atweba bonse twafwa mu bundengamambo ne mu mizhilulwila. Atweba bonse tuji mu yekawe musango. Kabiji nanchi atweba, atweba bene, twakonsha kupona kikuvumene atweba bene, ne kwipana atweba bene, posotu Lesa wasenda jitumbo Janji ja kutuntulwilamo meema, Jizhina ja Yesu Kilishitu, mambo, “Kechi kujipo Jizhina jikwabo mushi ya Jiulu ajo muntu jo akonsha kupulukilamo ne,” kabiji ne kusingya Bumi bwa Kilishitu ne kubika mwi atweba. Nanchi popo twikala na *yuwe* musango wa lwitabilo, lwitabilo lwajingapo ne Kilishitu. Kabiji lwitabilo lwa Kilishitu kechi bwajinga pamo na Bafaliseo, nangwa Basaduseya ne, nangwa mu mipika yabo, maketulu, ne mapani, kabiji ne kuwasha kwabo ne. Lwaimejile pa Kyambo kya Lesa, amena, kyabaya bingi, posotu Kilishitu waikala ke Kyambo, Kyambo kyaalukile ke muntu. Kabiji nanchi inge twatuntululwa pabaya na Ngovu Yanji, kyakuuba mba twafwa ku milanguluko yetu, kabiji ne lwitabilo lwetu lwaikala ke lwitabilo lwa itabilwa, aleluya, nanchi Bumi bwa Kilishitu bwatuntululwa mwi atweba. Atweba twikala bilengwa byumi bya kwa Lesa, kifulo kya kwikalamo Mupashi Wazhila amo mo akonsha kutumina kusama Kwanji kwa mapesho, kabiji twaikala ke kipimo kya kimino kya Kilishitu.

³⁴⁹ Yesu waambile mba, “Bushe kechi kyanembwa nenyi? Anweba mu bena kuzhachisha Amiwa, pa kwaamba mba, ‘Amiwa ne Mwaana wa Lesa.’ Kechi kyanembwa nenyi, mba, ‘Anweba mwi balesa.’ Kechi mizhilo yenu yaamba byobyoby nenyi?” Nobe Mosesa, nobe Elaija, nobe booba bangauzhi baikale kipi na Lesa, poso Lesa wituntululatu Ayemwine mwi abo. Kabiji baambilenga, kechi abo bene ne, pakuuba Lesa. “Kechi mulangulukile jimo bya kwamba ne, mambo kechi anweba mwamba ne. Pakuuba ke Bataata bekala mwi anweba; Aye ye wamba.” Byambo Byanji kechi ke byanji ne, mambo, bumi bwanji, bwafwa.

³⁵⁰ Inge wafwa, mwafumyamo mashi mu muntu, mwamukanga. Lukatazho lujipo ke lwa kuuba mba bavula kechi bakangwa ne. Mwafumyamo mashi mu muntu, nishi waya. Nanchi kintutu kyakuuba ke kubikamo mashi akwabo mwi aye; ukekala na bumi jibiji. Anweba mwafumishemo mashi.

³⁵¹ Kabiji pano twabikamo Mashi akwa Yesu Kilishitu, mwamona, kabiji akyo kileta lwitabilo lwa kwa Yesu Kilishitu, bulume bwakwa Yesu Kilishitu, maana akwa Yesu Kilishitu, kwikanya kwakwa Yesu Kilishitu, butekanye bwakwa Yesu Kilishitu, bulesa bwakwa Yesu Kilishitu, butemwe bwa balongo

bwakwa Yesu Kilishitu, kabiji ne butemwe bwakwa Lesa, awo ye Yesu Kilishitu. Aye ye Mutwe ukutangijila. Kabiji maulu obe kyo kintendekesho, lwitabilo. Amena! Kutangijilwa na Mutwe, ufumyamo...?...Abyo byokiji. Awo ye muntu walumbuluka wakwa Lesa, inge waikala na bibye bintu.

³⁵² Nanchi, Lesa, kwimenako Kipwilo Kyanji nobe Musongwa, ke mwanamukazhi. Lesa wimenako Kipwilo Kyanji nobe Musongwa. Kabiji jishinda jo Aletelamo umo umo kwikala mwaana Wanji, kuya mu yewa Musongwa, Aye kabiji waleta Musongwa kupita mu aao mankulo, [Mulongo Branham wakokosha bimye sebeni pa bondi wamachoko—waku.] poso Aye waleta kikye kimo Kipwilo kyapwijijika mu *kikye*.

³⁵³ Maulu ami enda. Kika? Mambo mutwe wami wamba byobyoy. Bino, kechi kwakonsha kwenda nobe kuboko kwami ne, mambo ke kulu kwami. Luther kechi wakonsha kuuba bintu byo tubapo ne, nangwatu ba Methodist, mambo abo bajinga kintu kingi. Mwamona? Kulu kwenda mambo mutwe wamba byobyoy. Kabiji mutwe kechi wamba mba, “Pano, maulu, mwaluke ke kuboko ne. Kutwi, wikale ke meso.” Mwamona?

³⁵⁴ Bino, kila nkulo, Lesa wabika bibye bintu mu Kipwilo Kyanji, kabiji ne kwibimweshwa mba muntu umo uji na bibye, wikala na bibye byakufikilamo. Kabiji *bibye* Byokiji, inge kyapwa, ke Kipwilo kya Lesa kibena kuya mu Lapicha. Kabiji *kikye* byokiji, kabiji kyapwijijika, ke kalume wakwa Lesa, mu Kipwilo kya Lesa, akyo kibena kuya mu Lapicha. Lukumo! Mwamona Moombena kutazha nyi? Abyo byokiji. Akyo kyo kintu kituntulu.

³⁵⁵ *Awe* muntu waiya, Paulo, waala kintendekesho. Irenaeus watwile kubikapo *kikye* peulu yakyo. Walondejilepo wabikapo *kikye*. Walondejilepo wabikapo *kikye*. Walondelapo *kyokya*, ne *kyokya*, ne *kyokya*, kabiji kyayatu kulutwe poso kyafika mu nkulo yapelako. Pano kyookika? Ke Mupashi umotu.

³⁵⁶ Yenkatu Mupashi umo wikala mwi amiwa, waamba mba, “Maboko, fikai kuloolwa lukatazho.” Yenka mupashi umo waamba mba, “Maulu tapukai lutampulo.” Mwamona Moombena kutazha nyi?

³⁵⁷ Nanchi, kipimo kya kimino kyobe kyonse kitangijilwa na bibye bintu, bino kechi kyakonsheka kutangijilwa ne kana kyapwijijika kwikala na bibye byakufikilamo.

³⁵⁸ Mwakyumvwapo kikye nyi? Pano lekai ne mubuule kikye. Kabiji ikalai. . . Bikai kikye ku kutwi kwenu kwa kuteleka. Mwamona? Cheni wikala wakosa bingi ponka po anungakena panekena. Abyo ibyo. Kechi wakosa ne kana ponka po anungakena panekena.

³⁵⁹ Nangwatu *bibye* bilengwe byakosa, *abye* bilengwa; inge kiji na panungakana panekena, ipo po kimokokela. Kabiji kechi kikala kyakosa ne kana ponka po kyanungakana panekena.

[Mulongo Branham ubena kutongola konka ku chokobondi na kulenga—Waku.] Pano inge waikala nabyo, waamba mba uji na *bibye, bibye, bibye*, kasa wabula *bibye*, apo ipo pakumokokela. Inge uji na *kikye*, kabiji wabula kwikala na *kyokya*, ukamokokela ponka pa. Uji na *kikye*, kabiji kasa wabula *kyokya*, kikamokoka. *Akye*, kabiji ufwakyo *kikye*, kikamokoka. *Akye*, kabiji ufwakyo *kikye*, kikamokoka. Mwamona? Kabiji inge ufwakyo. . . Kechi uji na *kikye* kwakubula kwikala na *kikye*.

³⁶⁰ Nanchi inge wapana bu muntu bobo bonse, nanchi Mupashi Wazhila witulwila kupita mwi obewa, mu bibye bintu, nanchi wi tabbanako mumi. Pano bantu bakeketa ne kwamba mba, “Awa ye muntu wayulamo bulume, maana (aye waketekela Kyambo), kwikanya, butekanye, bulesa, butemwe bwa balongo, wayulamo butemwe bwa Mupashi Wazhila. Monai, awo byoaji, ubena kwendauka.” Kyokika? Kipimo kya kimino akyo babula lwitabilo bakonsha kutalako ne kwamba mba, “Awa ye Mwinakilishitu. Awa ye mwanamulume, nangwa mwanamukazhi, wayuka kyo abena kwambapo. Anweba kechi mwakonsha kumonapo walusa, wawama, muntu wabulesa ne.” Obewa wabikwa katetesho. Katetesho kamweshwa mbaji yonse ibiji. Nangwa ubena kuya nangwatu kwiya, wakonsha kumona katetesho kimotu. Abyo byokiji. Mwamona? Inge mwanamulume nangwa mwanamukazhi waikala na *bibye*, apo Jibwe ja jikooka po jiiya ne kwibabika tutetesho twa mu Bufumu bwa Lesa, awo ye Mupashi Wazhila.

³⁶¹ Nanchi Kyambo, kwiya kufuma *Kukwe*, kimweshwa Akyokine kupichila mu kimo kimo kya mu bibye bintu, monai, kabiji kilenga yuwe Muntu ke Tabbanako wa Lesa mumi, ubena kwenda, wakumwenako mumi Mwinakilishitu. Byajinga Kilishitu, byo biji baabo bantu, mambo Bumi Bwanji buji mumwe. Baji mwi Kilishitu. Kabiji bumi bwabo bwafwa ne kufiwa mwi Kilishitu, monka mwi Lesa, kabiji ne kubikwapo katetesho na Mupashi Wazhila. Mutanshi Kolinda 12. Abyo ibyo. Mwamona? Wimona obewa mwine kufwa, nanchi wasemwa ku lwitabilo. Pano bulume ne bibye bikwabo bibikwapo pe obewa poso waikala walumbuluka, kipasha kyumi kya Lesa. Akyo kyawama?

³⁶² Kabiji pano Lesa, kupichila mu kyokyo, ne akyo kyaleta Mankulo Sebeni a Bipwilo, kumweshwa tampulo sebeni yo Ekiletelamo, na kushimika muntu Wanji mu kipasha Kyanji, Aye washimikwa ke Kipwilo kypwijiijika mu kipasha Kyanji. Kabiji palusanguko, awe Mubiji wapwijiijika ukasangulwa ne kwikala Nanji myaka ne myaka, mambo ye Musongwa. Mwamona? Nanchi akyo kyafikizhiwa mu nkulo yonse, mu nkulo yonse iya.

³⁶³ Kabiji kuji byavula bikebewa, vulukai. Mwavulukanyi byaambile Paulo papo mu Bahebelu 11? Lekai tangetu kintu kimo kasa tukyangye kushika papo, pa mineti umo. Kabiji pano obewa. . . Kyakonsha kukulengela kumvwa bwenyi inge

Na . . . kimye kyonse, inge Natanga kikye. Amiwa mbena kutanga Bahebelu 11, kabiji nsakutatwila na veeleshi wabu 32.

Bika bikwabo, Amiwa nsakwamba ka? mambo kimye kyakonsha kukepela kwimubula anweba na mambo akwa Gedeon, . . . akwa Balaka, ne . . . Samisoni, kabiji . . . Yafeti; . . . Davida . . . ne Samwela, . . . bangauzhi:

Aabo kupichila mulwitabilo bashijile bufumu, baubile byaoloka, batambwile mulaye, bashikile tunwa twa babonkwe,

Bazhimine bukaji bwa mujilo, bapulukile ku mpoko, kabiji monka mu kunekena kwabo bakosele, bajinga babilobo ne kunyemesha, baalulwile . . . mazhita abalwanyani babo.

Banabakazhi batambwile bafu baabo ke boomi jibiji: . . . bakwabo bamanyikilwe, ba manyikilwe, kechi baswile kupokololwa ne; pakuuba mba bakatambule lusanguko lwakila mukuwama:

³⁶⁴ Kuya panshi papo. Mwamona? [Mulongo Branham watongola ku chokobondi na kulenga—Waku.] Kijitu bulongo.

Kabiji bakwabo baesekelwe . . . baendelekelwe kkyatama . . . kwendelekwa, ee, nangwa byonkabyo . . . mu fungwa . . . kukaswa mutuleya:

Baashilwe mabwe, bachibilwepo nabaso bipimvwa, abo baesekelwe, abo baipailwe na . . . mampoko: bapitang'enenga kasa bamvuala myai ya mikoko kabiji ne myai ya bambuzhi; kechi bajinga na pakwikala ne, kabiji bamanyikilwe, ne kuyajishiwa;

(Aabo ntanda kechi ibafwainwa ne:) . . .

³⁶⁵ Monai, byachibikwa pabiji papo, mwaji kumona mu Baibolo wenu.

. . . bapitang'enenga mu biselebwa, ne mu mitumba, ne mu bibwe kabiji ne mu makelo apanopantada.

. . . byonse bye, batambwile lushimuno lwawama monka mu lwitabilo, . . .

³⁶⁶ *Papo!* [Mulongo Branham watogola ku chokobondi wani na kulenga—Waku.]

. . . lushimuno lwawama monka mulwitabilo, kechi batambwile mulaye ne: (Mwamona?)

Lesu witunengezhezha bintu byawama atweba, kya kuuba mba abo kwakubula atweba kechi bakonsha kulumbuluka ne.

³⁶⁷ Mwikyumvwa nyi? Abo bantu bafwile, *papo*, bakosela kabiji babena kupembelela pe atweba. Nanchi, *kino* Kipwilo kyafwainwa kufika pa kulumbuluka, pakuuba mba kwikale

lusanguko. Kabiji baji mushi, myeo iji mushi ya kitapisho, na kupembelela kino Kipwilo kufika ku kulumbuluka Kwakyo, apo Kilishitu po akeya.

³⁶⁸ Kabiji kikye Kipwilo, mwamona, kibena kuya nakukepelakotu, mu bacheche. [Mulongo Branham watongola ku chokobondi na kulenga—Waku.] Kyakila bingi mukutwa, bino kijitu pamo nobe kunemba awa musalabo papo, monai. Kyafika pa kutwa kwa nguya. Poso, Kipwilo, mu bucheche, kikafike pa kyokya kifulo poso kyafika mu musango umo wang'ijilo *awa* ye ashile, mambo, inge Mutwe wajikooka wabwela jibiji . . .

³⁶⁹ Kiji nobe-pokochi mucheche *papo*, po kikekala ponkapa, pa pilamendi wa kimye kyonse. Kechi ke kitungutungu kyaikala kukilang'anya peulu ne. Kyasendama pacheche, kabiji kyafwainwa ponkapa, mambo kimvweta meema.

Kabiji umvwe kyaiya, akye Kipwilo kyafwainwa kwikala bujisengo.

³⁷⁰ Byonse bye, mabwe ashala mu pilamendi, aikala bingi bulongo poso kechi wakonsha kupishapo kanezala pakachi kawo ne, kinemenezhi kya matani, aikala popa. Byo beakajizhe peulu, kechi bayuka ne. Bino ashimikilwe.

³⁷¹ Kabiji peulu *papo*, inge Kitungutungu kya pilamendi kyaiya, pilamendi Ayoine, Mubiji wakwa Kilishitu wafwainwa kwikala bujisengo. Kechi lufunjishotu lwa kipwilo nangwa lufunjisho, nangwa kintu kimo kikwabo kyo twapitamo. Nafwainwa kwikala walumbuluka bingi nobe Kilishitu, poso, Aye byo akeya, Aye ne yoya ng'ingijilo binka kwatakana pamo. Mwamona? Apo po pakeya Lapicha, kuya ku Muzhi.

³⁷² Monai kimye kyo tubena kwikalamo kino kimye, mu Laodikeya, amo kipwilo po kyajiga nkulo ya kipwilo ya kila mukutama. Mu Baibolo, twatana kuba mba, yajinga yo yonka nkulo ya kipwilo Lesa mo ajinga pangye ya kipwilo, kasa akokosha, nakweseka kubwela mu kishimikwa Kyanji. Mafunjisho a bipwilo ne madinominesheni bamubikile Aye pangye ya kipwilo Kyanji. "Talai, Naimana pa kibelo kasa nkokaula. Inge muntu waumvwa kilaka ne kushikula kibelo, Amiwa katwela moaji, ne kuja nanji." Mwamona? Byokiji, mu *ino* nkulo ya kipwilo. Bintende bintende Aye bamupangijile pangye, poso *papo* bamutaya Aye yensetu pangye. Abo kechi bajipo na kimo kya kuuba Nanji ne.

³⁷³ Pano mwamona leelo ko tubena kuya. Nangwatu ku mpelo ya Nkulo ya Kipwilo kya Laodikeya kyaalukatu pamo, poso akyo ne Bukatolika, akyo kyaabejilemo ponka *pano*, babena kupwila pamo ne kukwatakana nobe kipwilo kimo kikatampe. Nakubungizhiwa pamo kwa bipwilo, kijitu pamo nobe Bukatolika.

³⁷⁴ Pajitu lupusano lumo, inge bakonsha kuila mumo pa kyokyo, akyo ke kuja kijilo. Akyo kyo kintu kimo kiji mu

bipwilo, akyo—akyo—akyo kikanya Bukatolika ne Bupolotesitati kukana kukwatakana, mu ndonda ya kijilo. Akyo Kipwilo kya Bakatolika kyamba mba, “Ke mubiji.” Kabiji kipwilo kya ba Polotesitati kyamba mba, “Kyaimenako mubiji.” Abo Bakatolika balengamo masi mu kikye. Masi ke, kuuba mba, abo baja kijilo, kasa baketekela mba balekelwa mambo. Abo ba Polotesitati baja na lwitabilo, na kusachila Lesa, mu kijilo, kuuba mba balekelwa mambo. Ba Polotesitati baamba mba, “Atweba twalekelwa mambo.” Ba Katolika baamba mba, “Twaketekela mba twalekelwa mambo.” Masi ne kijilo. Bekitela mba masi; twikitela mba kijilo. Wa masi ubena kuketekela mba kiji byonkabyo. Kijilo kuyuka mba kiji byonkbyo, kabiji ne kumusachila Aye pa kikye. mwamona? Kabiji akyo kyokintu kimo kyalengela kubuula kwiya pamo. Bakekyuba.

³⁷⁵ Oo, kimweka kuwama bingi. Kikalengela kukwatakana, pakuuba mba banyeme... Kikaleta—kikaleta byonse... Kyawama, Baibolo waamb amba, “Kabiji awe lukinyama wapaine bulume ku pite,” monai, bakwatakana bene pamo. Mwamona? Byonka byaamba Baibolo amba bakekyuba, babena kwikyuba ne pano. Kijitu mu lunengezho, yeka uno mulungu. Kechi Njipo na kintu kimo na bantu baki Katolika, pamotu biji ne bantu baki Polotesitati.

³⁷⁶ Anweba ba Methodist ne ba Baptist, kabiji ne bavula anweba ba Pentekosito, bipwilo byenu byaya monka mu kije kya bipwilo, byo bashimikile yewa kishimikwa mukatampe momwa mu New York, kya kije kya bipwilo, kijitu pamo nobe mu United Nations kabiji ne bitu bikwabo. Babena kukeba kukwatakanya bonse babu Polotesitati.

³⁷⁷ Pano, ba Katolika bajimuka mukyokyo, kabiji babena kukeba kuleta yuwe Pope John wabu tweti-fiili, nangwa wabu tweti-tuu, monka moaikela. Aye ubena kweseka, munshi, munkwikepesha, kuleta pamo bonse ba lwitabilo lwaki Polotesitati ne lwitabilo lwa ki Katolika kwiya ku lwitabilo lumo, byonka byaambile Baibolo mba bakekyuba. Abyo byokiji. Kabiji ba Polotesitati babena kuya monka, bakwatwa, ku muzhinge, kabiji babena kutwela.

³⁷⁸ Kika? Kika? Mambo abo kechi baji na *bibye* bintu ne. *Maana*, “Akyo Kyambo kijitu bulongo.” *Butekanye*, “Aba bapembelela pe Nkambo.” Mwamona Moombena kutazha nyi?

³⁷⁹ Nobe byaambile yewa bishopu waki Methodist juba jimo, byo bapishishe kyokya. Kabiji muntu yense wayuka, byokiji, kika kyatundaikile kyokyo, kukeba kwikala na mulombelo umo wa kulomba mu kipwilo, nangwa mu sukuulu. Kabiji bakebele ku... Naketekela wajinga buuku wa milombelo wa ba Presbyterian, nangwa kintu kimo kikwabo, kabiji basemi bamulobejile awa—awa—awa sukuulu mambo kechi baswile awe mulombelo amba ambiwenga mu sukuulu ne. Kabiji awe

bishopu waku Methodist wajinga mulongo mukote wa maana, waimene ne kwamba mba, “Akyo kyatama.” Waambile mba, “Kechi momwaila mizhilo ya kyaalo ne.” Aye wakwachile mwela wakyo. Aye waambile mba, “Nobe mu kipwilo kyetu kya Methodist,” aye waambile mba, “mu kipwilo kyetu kya Methodist,” amba, “bavula bantu betu kimye kyonse bambatu pa bimweka mu Hollywood, kabiji naite-naini peseti ba mwi abo baya na kwibimona nangwa byonkabyo.”

³⁸⁰ Lukatazho lujipi? Bashileko *kikye*. Ibyo kine. Bashileko bimo.

³⁸¹ Naambilenga monka muno mu kibamba, juba jikwabo, ku—ku—ku mukulumpe umo wa kipwilo kimo kyabaisha kya ba Methodist kiji mu Falls City, kimo kya bipwilo bya bumupashi kya ba Methodist biji mu Falls City. Mweshai, nkulo ya ba Methodist ayo yaiya kulondakana na nkulo yetu, ya Pentekosito. Kabiji waambile mba, “Mu St. Louis, Missouri, basendele mpeselo, pepi nobe bang’ondo basatu nangwa foolo, kabiji bataine mba.” Awa muntu wafwainwa kutanwa muno lukeelo luno. Kyawama, aye ke nsendwe ushimika bibye, washimikile kishimikwa kyetu. Main Street Methodist, ko atanwa, ako Mulongo Lum kabiji ne abo ko bajinga ba kafunga. Nanchi twatana kuuba mba, mu kyokyo, Naketekela mba kyajinga nobe sebete-ne bikwabo paseti wa ba Methodist bampeselwe, amba, mpeselo ya mu St. Louis, yamwesheshe mba sebete-nebanapo paseti wa ba Methodist bapepa fwaka, kabiji sikisite-eiti paseti wa mwi abo batoma binyu. Ba Methodist! Kabiji kintu kyenye kyajinga kuuba mba, mpeselo byo yalupukile, nangwa kufwanyikizha babalume ne babakazhika; banabakazhi, bajinga pa sebete, sebete-ne banapo kufika pa fiifite paseti ba mubanabalume. Bavula banabakazhi bapepa ne kutoma kukila biji banabalume. Sebete paseti, Sebete-ne banapo paseti, banabakazhi bavula kukila banabalume.

³⁸² Pano byepi inge twaya ku Lufunjisho lwa mu Baibolo lwa kumvwala tuputula, ne kuntenda suki, ne bintu byamusango yekawa, monai, kwepi na bulesa, banabakazhi bamba pa bulesa ne buzihile? Bijilo bya makandi ne bintutu bikwabo, bamba kyambeambe, balokoto, kechi balama lujimi wabo ne. Lujimi wabo wa kwamba ne bukyambe ambe, kasa baya nakuzhokoloka. Pano nga banabalume? Bijilo bya makandi, byakailo ya golufu, kasa bamvwala-kichika, musango wamvwajilo yakala-ibula kumweka bulongo ne, abo banabakazhi kasa baimana kokwa. Kechi kyakukumya ne!

³⁸³ Monai byubilo byabiko ke biletwe pa musapwishi, basapwila kukaleya, lukeelo luno? Ee, mwane. Amiwa kechi naketekela mba mwanamulume wazhatwa pa kyokya. Pano kyaubile byepi? Awa Mulongo. . . Nakonsha kulanguluka janji. . . [Muntu umo waamba mba, “Dan Gilbert.”—Waku.] Ee. Dan Gilbert, musapwishi wa kukaleya. Kimye mwanamulume watwelele

mukachi na kwipaya Dan, bang'ondo bacheche bapita, kabiji pano mukazhanji ukekala na mwaana. Mambo, Dan wafwa, kechi bakonsha kubika kutuntulula kwa mashi ku mwana pakino kimye ne. Awe waambile mba Dan wamulengele mambo, kabiji awa wanji. . . “Awa ke mwana wakwa Dan.” Abya bya. . . Amiwa kechi naketekela byo byo ne nangwa mba Naketekela mba—mba—kikwangala uji na mayona a katela ne. Ine, mwane. Naketekela mba bubela. Naketekela mba Dan Gilbert wajinga muntu wakwa Lesa. Kabiji Naketekela mba ke tanchikilo yakwa diabola.

³⁸⁴ Kijitu pamo nobe kintu kyakubika yoya milombelo. Awa wakala Methodist—Methodist bishopu wajinga wajimua bulongo kutuluka kyokya. Inge kyaubilwe, inge akya kyapichile, akya kyatundaikilwe na kintu kingi. Abyo ibyo.

³⁸⁵ Kijitu pamo nobe lukatazho lwa kapatululwa kajinga ku Kabeta kabulenge, kintutu kimo. Naketekela mba bantu bafwaunwa kwikala bakasuluka. Amiwa naketekela mba kino kyaalo kyamba pa bwaana bwabene. Amiwa kechi nakonsha kuzhachisha Mr. Kennedy pa kutumako mazhita ne. Nangwatu, Amiwa kechi ne—ne “nyingijilo yakatataka ne,” kabiji Amiwa kechi ne Democrat. Amiwa kechi ne Republican ne. Amiwa ne Mwinakilishitu. Nanchi Amiwa. . . Bino kechi Naketekela mu byo byo ne. Amiwa kechi naketekela mba bachiluluka bafwainwa kupotesha bubeji bwabo kubyobya bintu ne, ne abyo. Kyajinga ba—kyajinga kipanyi kya Republican. Mashi akwa Abraham Lincoln a kasulwile bantu mambo aye wajinga muntu wabu lesa. Naketekela mba bafwainwa kulamachila ku kipanyi kyabo inge basaka ku vota.

³⁸⁶ Bino Ne mubuula kintu kimo, awa nsongwalume kechi waijileko kookwa mambo a kyokya ne, masukuulu abo. Awa nsongwalume wajinga mwina kyaalo. Aye mwina America. Abwe bo bwaana bwabene bwa bonse. Musombelo wa muntu kechi wakonsha kupipula kintu nangwa kimo ne. Atweba bonse. . . “Lesu,” waambile mba, “ku muntu umo, ko alengejile mashi onse, byaalo byonse.” Atweba bonse twi umo. Bino, awa nsongwalume, wajinga mushilikale. Aye wapichile mu makondo. Aye walwijile kintu kiji bulongo. Aye wajinga nasambu ya kuya ku sukuulu. Abyo ibyo. Bino wajinga na masukuulu avula bingi ko afwaijilwe kuya.

³⁸⁷ Kijitu akya kintu byokiji. Inge waikala kunyuma yakyo, ke bibye bijipo-jino juba bya madinominesheni, bibena kutundaika byobya. Kika? Babena kupipula mavoti kufuma ku bachiluluka ba ma Republican kuya ku ma Democrat, kabiji babena kupotesha bubeji bwabo pakuuba kikye. Kine bukine. Aye Mupashi Wazhila kechi uji muno ne. . .

³⁸⁸ “Lekai yewa uji na maana.” “Lekai yewa uji na maana.” Kine. Kijitu pamo nobe kikye kipwilo, ino nkulo yo tujimo, ibena kwipotesha ayoine. Kechi mubena kumona kikamweka ne?

389 Amiwa kechi natako muchima nagwa kyabikwa pa tepu ne. Kino kibena kwiya. Uu-uu. Ee. Lukatazho lwepi? Ba maama bakote baamba mba, “Mupai diabola malipilo anji.”

390 Kwajingatu mwanamulume umo waubile kintu kya kyamaana, awo wajinga Castro kookwa. Ee, mwane. Aye waile kookakwa. Kabiji makapitolisiti bajingana na yonse myenge kabiji ne bintu byonse bya. . . biji pa lupoto lwa kipimo kya golonde, nobe mu United States. Waubile ka? Aye wapotele onse ma bondi. Watambwile mali mujishinda jiji jonse. Kika kyo aubile nanchi? Aye wasombolwele mali, kabiji ne kwi akingya. Ne kwiabwezha. Akyo kyo kyonka kino kyaalo byo kyafwainwa kuuba.

391 Bushe mwaumvwine mu *Life Line* lukeelo lumo? Kika, mwayukatu, kijitu pamo nobe mubena kupotolweshwa ma bondi a golonde. Mabondi asendwa kala. Kabiji yuwe kafulumenden ujipo ubena kutaya mali kuka? Mambo a mali a misonko bakatambulanga pa myaka foote kufuma pa kino kimye. Aye wikyuba. Ayo yo *Life Line* monka mu Washington, DC, ku kumbanya kyaalo kyonse. Misoko yo babena kwingijisha, ne kukeba kupota mali a mubyaalo bingi. Kyawama, babena kwiapanatu mujishinda jiji jonse. Kechi mwikimona nenyi? Abyo kine byo—byo byobakooba. Mwamona? Kyo kika? Pano, inge kino kyaalo bukomo bwako bwapona, kintutu kyakuuba ke kwitabizha mba bukomo bwapona. Kintutu kyakuuba ke kuswisha mba kyaalo mali kifwao.

392 Akyo kyo kintu kyamaana kyafwainwa kubiwa, kupipula mali. Bino kechi bakonsha kwi kyuba ne, mu buno butangi bujipo. Kinaloma kipwilo kya Katolika kyo kiji na golonde wa ntanda. Kabiji byo bakonsha kuuba ke kupotapo bimo, “Aabo bantu banoshi,” kabiji ne bakwabotu, “bapanopantanda,” monka mwaambila Baibolo. Bakooba byepi, kasa bakyangye konauna? The Brown and Williamson Tobacco Company, bajimo na lubaji lukatampe ba Katolika, nangwa byonkabyo. Kabiji byonse bye bintu bikwabo, bakooba byepi? Abo bakaswa kyokyo, kabiji bakatambula mali kufuma ku Rome, kabiji nishi bapotesha bubeji bwabo. Rome ye wimana kulubaji lwanji. Ee, mwane. Aye ukemana kunyuma yanji. Kabiji babena kutambula mizhilo yafwainwa pakino kimye, babena kwikala na bavula mukachi kabo, kuletamo mu yuwe kambineti. Talai bibena kwipuzha ba Mr. Kennedy.

393 Kabiji umvwe mwamona kikye, juba jikwabo, kechi kujipo ku vota jibiji ne. Ku vota mwingilo wako ko kuka? Inge, babika mu mapepala, kabiji kyashininwa ku meso a bantu bavula, kabiji bakana kuuba kiji kyonse pa bibye bintu. Kabiji, baitabizhe mba bamashini mu kyaalo kyonse babikilwe, amba basajile Mr. Kennedy na voti wabubela. Nanchi Baibolo kechi waamba mba ukeya na bujimbijimbi? Kyakine, kwingijisha bubela. Bino, Amiwa kechi nashikwa kipanyi kya Democrat ne,

bino Amiwa mbena kwamba byakishika kufuma mu Baibolo. Nanchi mwingilo wa ku vota ye muka? Bayuka ubena kuya moomwa.

³⁹⁴ Baanga mwi anweba bavuluka mbila yabijikilwe yajinga na banabakazhi babiji baimana? Kabiji umo waamile mba, “Amiwa kavotela Mr. . . .” Nangwa, mwanamukazhi waki Polotesitati waaambile mba, “Amiwa kavotela Mr. Kennedy.”

Baambile mba, “Kika?”

³⁹⁵ Baambile mba, “Mambo Naketekela mba ke muntu wajimuka kukila Mr. Nixon. Aye ukekala Ndamakyaalo wawama.”

³⁹⁶ Kabiji waambile mba, “Awe ke Katolika wa banabakazhi. ‘Ng’anyi ye ukavotela?”

³⁹⁷ Waambile mba, “Amiwa ne Katolika, Katolika mwina Loma, Katolika walukokelo.” Aye waambile mba, “Kabiji Amiwa kavotela Mr. Nixon.”

“Mamboka?”

³⁹⁸ Waambile mba, “Mambo, Amiwa nalanguluka Mr. Nixon waikala Ndamakyaalo wawama mambo aye wapijilwa kuuba bintu. Aye wapijila na komyunizimu.” Awa mwanamukazhi wabuulang’ene bubela.

³⁹⁹ Amiwa njina *Abye* . . . byo batela mba, *Abya Bishika Bya Lwitbilo Lwetu*, buuku wa peulu wa ba Katolika wakupotwa. Kabiji kyaambiwa mukachi, “Inge kuji Katolika pa jichikichi, waima na waki Polotesitati; inge Katolika wavotela Polotesitati, nishi bamupanga kufuma mu lumvwang’ano lwa kipwilo kya ba Katolika.” Ibyo. “Kabiji umvwe kuji ba Katolika babiji baimana mu ofweshi umo, bakatolapo Katolika wipanyisha ku ‘kipwilo ki inabo’ kabiji ne kwibavotela.”

⁴⁰⁰ Monai byokyubiwa, abwa bubela, Bika byo babena kweseka kuuba? Kupana Mali, a kupota. Mamboka? Babena kweseka kwikichibakanya. Kabiji babena kwikyuba, kabiji wabulwa mali. Kabiji kyo kika? Kijitu pa kipimo kya imikwa. Kabiji kipwilo kya Katolika, na ndonda ya butangi, boobaji na golode yantanda yonse. [Muntu waamba mba, “Aduleendi sikisite-eiti billion dollar.”—Waku.] Aduleendi sikisite-eiti billion. Byobyo kiji. Ke kumubwezha jibiji pa kipimo kya golonde, kabiji anweba bantu mwalamatu manzubo enu kabiji ne bintu bikwabo, bino uji kulubaji lwa kipwilo kya ba Katolika. Kyaalo kyonse kiji ku lubaji lwa kipwilo kya ba Katolika. Bintu byonse biji mu kyonka kyo, monka mu mali abo. Bushe Baibolo kechi waambapo bya musango yewo nenyi? Akyo kyo kipikichala Baibolo ko abena kwitutwala.

⁴⁰¹ Kika kyo Mbena kukeba kwamba, mulongo, leelo. Bakamba mba, “Akyo kikalengela kwikala kipwilo kyawama. Kikalengela bu Polotesitanti kukwatakana.” Kibena kumweka kuwama ku

jiso ja butunshi, pakuuba maana a ino ntanda ke bumbulwa maana kwi Lesa.

402 “Kabiji kyatokejile Lesa pa muchima, kupichila mu—mu kusapwila kwabuulamo maana, kuuba mba balubilamo bapuluke,” monka mwaikela ofweshi wa Bulesa, awo Ye atongwejile jimo mu Kipwilo Kyanji, kuuba mba Kipwilo kishimikwe mwaila bibye byakufikilamo bya bumupashi kabiji kechi mwaila abya byubiwa panopantanda ne.

403 Petelo waambile mba, “Kabiji mwanyema bubole bwa inontanda bwiya na lukumbwa lwa mali, kabiji lukumbwa lwa bimye byawama, kabiji ne kinemenezhi kya bwikalo, ne kuja, ne kutoma kabiji ne lukumbwa lo tuji nalo. Anweba mwapuluka kubibye. Kabiji pano mwalengwa mu bwikalo bwa bumi. Amiwa mbeni kwamba bibye ku Kipwilo,” byo aambile. Byobyoby kiji. Mwatangapo papo? Mwikyumuwa? Mwakwikyumuwa byotwaji kutanga kunyuma mu Petelo wa Kibiji? Umvwaitu byo abena kwamba papo, byo kyanembwa bulongo papo, byo a—abena kwikyamba. Kijitu bulongo. Telekai kwi aye pano byo abena kwamba. Kijitu bulongo.

Petelo, *Shimona Petelo, kalume ne mutumwa wa Nkambo Yesu Kilishitu, kwi abo . . . batambula lwitabilo lwa buneme pamo ne lwetu lwa monka mu bololoke bwa Lesa ne Mupulushi wetu Yesu Kilishitu:*

. . . mutende bi—bimuvujile anweba mu maana a kuyuka Lesa, kabiji ne Yesu Kilishitu Nkambo yetu,

Monka mwa—mwaikela bulume bwanji bwa bulesu bwi bwitupa bintu byonse . . .

404 Ing’anyi ukaswana ntanda kabiji ne bintu byonse? [Muntu umo waamba mba, “Bazhijikwa.”—Waku.] Kine. “Kwitukwasha . . .” Ee. Kijitu bulongo.

. . . bya kwitukwasha mu bumi ne mu bulesu, monka mu maana a kumuyuka aye wi twichile mu lukumo lwanji mwine ku lukumo:

Mo monka mo etupejile yanji ikatampe . . . ne ya munema milaye: amba monka mu ino anweba bonse mwikale ke bakutambulako muchima wa bulesu, byo mwapuluka ku bubole (Telekai ko kyokyo.) buji panopantanda na mambo a lwiso.

405 Lwiso lwa mali, lwiso lwa bintu bikatampe, lwiso lwa kuyukanyikwa, abye bintu bikala byafwa ku waitabila. Atweba kechi tutako muchima ne. Tete nangwa kafufutu, mambo ka Amiwa kwikala wasakamana; bumi nangwa lufu, kutwela panshi nangwa kutomena mu meema? Akye kyo kintu Amiwa kyonatako muchima, ke Bufumu bwa Lesa. Nangwatu Nawamisha nzubo yami, nangwa Nawamisha kisemi

kyami, nangwa Nawamisha kiji kyonse, kwawama nawamisha Kilishitu, luketekelo lwetu lwa Lukumo.

⁴⁰⁶ Nkomeshai amiwa, Anweba Nkambo, mu *Kikye*. Lekai Kilishitu ekale ke Mutwe wami, abya kasa bingila mwi amiwa. Ponka pa kintendekesho, lwitabilo lwami luji mwi Aye, lekai bulume, maana, kwikanya, butekanye, bulesa, kabiji ne butemwe bwa balongo, kwingila mwi amiwa, Anweba Nkambo, yo milombelo yanji. Amiwa kechi natako muchima ne; bumi nangwa lufu, kutwela panshi nangwa kutomena mu meema; dinomineshi, nangwa kubulwa dinominesheni; mulunda nangwa kubulwa mulunda. Lekai Kyokyo kiingile mwi amiwa, lekai bulume bwa Kilishitu, maana Anji, bilupuke mwi amiwa, pakuuba mba Amiwa nkonshe kufunjisha byobyoy.

⁴⁰⁷ “Mambo Lesa watuma mu Kipwilo, batumwa, bangauzhi, bafujishi, bakafunga, ne basapwishi, byonse bye ke bya kulumbulula kabiji ne kuleta byonse bye bya kufikilamo, mambo a kulumbulula Kwiya kwa Mwaana wakwa Lesa.” Jimojimo ja *aao* mabwe ke bintu byafuma ku yewa Umo. *Akye* ke kintu kya ku Kikye. Abye byonse byakufikilamo byo bya lubaji Lwanji, kabiji bibena kwitulwilwa kufuma mwi Aye, kuyatu mu byonse bye. Amena.

⁴⁰⁸ Ke twelufu koloko. Byonse bye bibena kuya kwepi? Amena. Bushe mwamutemwa Aye nyi? [Kipwilo kyaamba, “Amena.”—Waku.] Mwaketekela kyokyo nyi? [“Amena.”] Telekai, ku kikyeye kicheche.

⁴⁰⁹ Nyema Kidd waji kwamba mba, lukeelo luno, “Mulongo Bill, Amiwa kechi nayuka ne kana kyakonsheka Amiwa kukumona jikwabo.” Akyo kyaubiletu nobe kya ngipayaya. Mwamona? Aye ubena kulanguluka mba wakota, kabiji aye byoaji. Nalombele kwi Lesa amba ebashepo aye ne Mulongo Kidd, kimye kyakala.

⁴¹⁰ Lekai ne mubuule, kechi twayuka ne kana bimye byalepa byepi bya kwikala na umo ne mukwabo. Amiwa kechi nayuka bimye binga Amiwa byokekala nenu. Lesa wakonsha kungita amiwa kufuma panopantanda. Aye wakosha kungita mu mwingilo kuntu kukwabo. Aye wakonsha kwimwita kuya kuntu kukwabo. Atweba kechi twayuka ne. Bino, twayai—twayai tutambule. Kechi tuleke kikyeye kintu kitupite ne. Twayai tutole kyokya.

⁴¹¹ Abyo byokiji, mu Baibolo. Kiji bino, bintu byonse bikwatakana na bikwabo. Kabiji inge Najinga na kimye kya kwikyuba! Kuuba wikyuba mu juba jimo ne. Mwayuka kyokyo. Bino, nakonsha kwibikasa pamo bintu byonse!

⁴¹² Talai, byo twapwishishe na yoya mbila kokwa, mwamona byauble Mupashi Wazhila popa pa lubumbulu, kechi ibyo nyi? Baanga bajinga muno? [Kipwilo kyaamb amba, “Amena.”—Waku.] Mwamona? Kine! Kwiyatu kufika ne panshi, ne kwikilenga musango umotu, ku yewa Malaika wa Nkambo.

413 Mwamona, kyakine. Kechi muleke kimufume ne. Kikwachijilaitu, baana. Kwachijilaitu kyokyo. Vulukai, shimikaipo pa lwitabilo lwenu, bulume, maana, butekanye!

414 Pano, pano, Nalanguluka mba Najinga na kipepala papo, inge kechi Nekiponesha kuntu kukwabo ne kimye kyo Nabasapwijilenga. Kiji ponkapano. Nakusachila, mulongo. Nakusachila, pabaya bingi. Inge ubena kukeba ku—kotalapo, kabiji ne kumona kana pajipo kintu kimo papo kya kuba mba wakonsha ku. . . Kapepo ke mutachi wawamako pacheche kukila biji popa, pakuuba mba mwakonsha kukopololapo bintu bimo. Amiwa nsakwikipopela papo, kabiji kine mwakonsha kotalapo ne—ne kwibitaipa.

415 Kabiji Nakeba mba anweba mwi kitole kabiji ne kwikifunda, ne kwikyesakanya, kabiji ne kwingijilapo. Kechi kwi kifundatu ne, kyesakanyai, ne kwingijilapo inge mwakonsha. Kisendai nabukishika kwi anweba bene. Kechi mwambe mba, “Kyawama, Naumvwine bulongo kwikiteleka.” Ne kyubile, ne amiwa. Bino kutelekako, kabiji ne kwibitambula, ke kyapusanako. Mwamona? Mwamona? Kyaikala kyapusanako. Mwamona?

416 Abyo byo bintu sebeni byakufikilamo pakuuba mba ulenge kipimo kya kimino kya Lesa. Kuji Mankulo Atanu na abiji a Bipwilo, pakuuba mba Lesa alete kipwilo pa kukwe kufikilamo. Kabiji Aye wajinga na baluwe batanu na babiji pakuuba mba kyubiwe. Kuji sebeni, sebeni, sebeni. Mwamona? Sebeni ke—ke nambala ya kwa Lesa ya kupwijijika, kabiji fiili ke nambala yakwa Lesa ya kulumbuluka. Nanchi, kuji mafili, kabiji ne masebeni fiili. Nanchi, mwaila samu, bumupashi, monka mwaila Kyambo, na bukamonyi bwa Mupashi Wazhila, byonse bye byapwisha kintu pamo. Twayai twikifunde.

417 Twayai tubikepo pa lwitabilo lwetu bibye bintu, nanchi, pakuuba mba tufike ku kipimo kya kimino kya Kilishitu; nungakanai pamo na butemwe bwa bulesa, moyo wa kwakamwa Lesa, muneema mu michima yetu umo ku mukwabo, kwikala na mushingi umo ne mukwabo, butemwe bwa balongo ne banyenga, kwakubula myendeleko, kafwako kintu kikwabo ne kanashi buwame bwa Mupashi Wazhila. Mwamona? Ikalai pamo, ikala Mwinakilishitu. Endai na lwitabilo. Lekai bulume bwakwa Lesa bupitenga mwi anweba; lekai maana a kwa Lesa, inge kyafika pa kyawama ne kyatama. Inge diabola waleta kintu kimo kyabula kwikala mwaila Binembelo, mfumaiko ku kyokyo kintu. Abyo ibyo.

418 Nakonsha kulanguluka mba abo batumwa kechi baubanga nobe byotuba ne. Abo bapitang’ananga, kapepo bantu ba byambo bicheche, poso bafika mu pulupiti. Abo batwelele kabiji ne kuuba bintu byo bafwaijilwe kuuba, kabiji balupukamo. Ee, mwane. Bajinga na ngovu. Bajinga na bulume. Abo kechi bajigapo na byakupachika na bantu ne. Abo bayukile po

baimene. Byo byonka. Bayukile ye baitabijile. Abo batwajijiletu na kwenda mu Mupashi. Na kuubatu byonka . . .

419 Nobe byonka byo Naambile bufuku bukwapo. Kwitabizhatu kumo kucheche, kyo kyonka Lesa kyo akonsha kuuba, nanchi kechi pajipo kya kwibalekesha ne. Abo kechi baipwizhenga kabiji ne kufunda ne, kabiji ne kusona-kwapela byakumvwala ne kusakamana nobe byo tuba atweba ne, nangwa kana bafwainwa kuuba *kikye* nangwa *kyokya*. Abo bailetu kulutwe na kwikyuba, nangwa byonkabyo. Kuswishatu kumo kucheche kufuma kwi Lesa, akya kyaubiwa, bukiji bukijitu. Kika? Twakonsha kuyuka byepi kana kyajinga kuswisha kwa kufuma kwi Lesa? Bajinga na byonse bya kwifikilamo papo, byonse bye byakufikilamo. Kabiji kuswisha kucheche kutanshi kwa Lesa kwesakanya na byonse *bye*, kabiji ne na Kyambo Kyanji. Bayukile mba kyajinga Kyambo kya Lesa, kabiji byobyo bailenga. Kechi bajinga na bya kusakamana kintu kiji kyonse ne. Inge Lesa waamba, abo baile. Atweba twamba . . .

420 Lesa wamba kwi atweba, kabiji twamba mba, “Kyawama, tukaya. Tukamona kana twakonsha kwikala bunu Bumi.” Kintu kitanshi mwayukatu, muntu umo wakulubakanya. Kyawama, kine, awa ke diabola.

421 Mwakufwainwa kumumona lukeelo luno byo abaesekenga kukanya amba mbule kutanwako ku ino mbung’eno. Mwafwainwa kwikala na kyokya kimye kimo. Oo, lusatu! Amiwa ndwisha kimye kyonse kyo Ntongola mbung’eno. Kabiji Amiwa inge nsakulombelelanga bakolwa, kabiji muntu umo ke afwe wabula kupuluka, kwakonsha kwikala mafoni makumi asatu atumwa mu mamineti teni, inge bakonsha kwikyuba lubilo, pakuuba mba bakanye ku kikye. “Oo, Mulongo Branham, wafwainwa kuuba *kikye*.” Bino kasa kuji mweo wakatazhiwa. Kine. Ee.

422 Bufuku bukwapo, Naichilwe ku mpuzha ino. Mwanamulume wa kyanyike, Naambile nanji kuno mu-kyo-mutela-mba, supamalikechi, myaka icheche yapita kunyuma. Aye waikela ke kitomi. Namuyukile awa nsongwalume, nsongwalume wawama, bino wajinga ndengamambo. Kabiji nanchi ba inanzi bamwichile. Naketekela mba aye waichile Doko bimye byavula. Amiwa . . . Naichilwe, kabiji baichile Billy, kabiji—kabiji pa kupezhako Natambwile mawi. Kabiji byo Natambwile jiwi, bukishika bwa buwame, Amiwa kechi na kilwapo nkondo yabaya mu bumi bwami, pakuuba mba fike ku yewa nsongwalume ne.

423 Kabiji byo Nafikile kokwa, awa mulunda kamulanda wapichile pa kipimo kyakungyuka. Wajinga popa, kasa alala popa, kwakubula kusakana ne, kabiji watwajijiletu. Ba shanji kasa bamupukuta, ne kwamba mba, “Mutemwe.” Kabiji awa mwanamulume wajinga pa fifite, pepi nobe myaka fifite-wanu.

Kabiji baambilenga mba, “Mutemwe,” *akye*, kabiji “walajiletu popa.” Kabiji waesekelenga kuuba mba abuuke. Minkoko yanji icheche yabaya *byobya* kubulung’ana. Nsongwalume wajinga na kaasa wabaya bingi kyakuuba mba kafwapo byo kyajinga ne kanatu kaasa wakosa. Byonse bibese bya mubiji byajinga na kaasa. Ne mumashi anji mwajingatu kaasa, bintu byonse. Kabiji wajinga popa, na kweseka kwimana, kabiji ne kutwajijila mu yekawa musango.

⁴²⁴ Namukwachile ku kuboko, Naambile mba, “Woodrow, Woodrow, uno Mulongo Branham.”

⁴²⁵ Bashanji baambile mba, “Kechi wayuka nenyi? Awe Mulongo Bill. Woodrow, awe Mulongo Bill.”

Aye waambile mba, “Uu. Uu. Uu-uu-uu.” Nobe byonka *byo*.

⁴²⁶ Kabiji bashanji batajile ne kwamba mba, “Billy, waiya kimye kyapwako pacheche.”

Naambile mba, “Kechi kimye kyapwa ne. Aye ujipano.” Najinga na nkondo.

⁴²⁷ Kabiji nanchi bansongwalume bakwabo, bansongwalume bavula, bandengamambo, baimene byobya, ne bamo ba mukisemi kyanji. Naambile mba, “Mwamona, bansongwalume, inengezhai, mambo ne obewa ukafika ku kino kifulo. Obewa wafwainwa kwiya ponkapano. Mwamona? Kapepo kechi nauno—nauno kaasa ne. Obewa kape ukeya na kintu kikwabo, monka mwa mu mukwakwa wamukatampe, kufuma mashi kuya ne kulufu, nangwa kintutu kikwabo. Obewa wafwainwa kwiya ku kikyeye.” Twisambile nabo.

⁴²⁸ Amiwa napembejilenga kumona kyakonsha kwamba Mupashi mba ngube. Kupembelela. Kintu kitanshi mwayukatu, Naumvwine kakwitabizha kacheche. “Bikapo maboko obe pe aye.”

⁴²⁹ Naendaukile kuzhokoloka, naambile mba, “Anweba bonse kunyikai mitwe yenu.” Bonse bakunyikile mitwe yabo, babiji nangwa basatu banyike balunda mukachi.

⁴³⁰ Nabikile maboko ami pe aye. Naambile mba, “Nkambo Lesa, lekai nsongwalume ayuke kyoasakuba, kasa akyangye kukumanya kikyeye kintu ne. Aye ubena kufwa. Awe diabola wa mupombapomba, kabiji uben kuya. Kabiji witoma aye mwine kufika ne kulufu, kabiji papo uji mu yuwe musango. Nalomba namba Anweba mu mubileko lusa.” Kabiji byo Namulombejile, lukeelo lwalondejilepo waikele mwine, na kwamba ku bashanji.

⁴³¹ Busty Rogers, awo...Bangichile kokwa ku kipatala, kechi papita kimye kyabaya ne. Najinga konkakwa aja juba, panyuma Yakusapwila kokwa ku Milltown konka Georgie Carter wamucheche koatambwijile lubuko. Anweba bonse mwikivuluka. Kabiji kokwa kimye Mulongo Smith, musapwishi waku Methodist, waambile mba, “Inge kuji muntu umo

wabatizhilwe, mu Jizhina ja Yesu Kilishitu, mfuma muno mu tente wami,” byonkabyotu. Akwa konka ku Totten Ford, naikele na yoya mbung’eno kookwa. Kabiji, oo, wazhachishe pa kintu kiji kyonse kyo wakonsha kulanguluka. Amiwa kechi naambilepo kyambo ne; na twajijiletu. Najinga na mwingilo. Aye Nkambo wamwesheshe kimwesho. Kwajinga mwanamukoko konkakwa, wapombwa kuntu kumo mungyetu. Anweba bonse mwavuluka kimwesho, anweba bonse. Naketekela byokiji. Mwikivuluka nyi? [Kipwilo kyaamba mba, “Amena.”—Waku.] Kine. Kijitu bulongo. Nanchi Nailenga na kupita mungye konkakwa, na kumukeba.

⁴³² Naile ku Totten Ford. Mulongo Wright kokwa wayuka. Twaile konka, kechi twayukile kya kuuba ne. Napotele ka kibokoshi ka kacheche ka kubikamo sopo, mu kimye kya kuja. Nailenga konkakwa, naimene kokwa kabiji ne kusapwila kasaji pa tapulo. Aye waambile mba mbena kuya peulu, peulu ya katumba, na kuuba busulu. Naile Nanji. Akwa kwajinga kipwilo kya ba Baptist kikatampe kyakala, mwabula bantu. Aye Nkambo waambile kwi amiwa, “Imana ponkapo.”

⁴³³ Naambile mba, “Ndekai konka kuno, Mulongo Wright.” Naimene. Aye waile peulu kabiji wabwela.

⁴³⁴ Naile konka, kabiji kechi nashikwile kizhilo ne. Naambile mba, “Nkambo, inge Anweba muji mu kikyeye, Anweba mubena nkukeba mba ngye mu kipwilo, nshikwilai kizhilo.” Naikele konka kwa na kulanguluka.

⁴³⁵ Naumvwine muntu umo kasa abena kwiya; waendeleko, kabiji waambile mba, “Muji byepi? Amiwa nsakwimubuula,” waambile mb, “mubena kukeba mu kipwilo?”

Naambile mba, “Ee, mwane.”

Aye waambile mba, “Amiwa yami nji na bakii pano.”

⁴³⁶ Natatwile mbung’eno. Mulungu mutanshi, kafwako nangwa umo ne. Bufuku butanshi, Najinga na kipwilo, Mulongo Wright ne kisemi kyanji. Kintu kitanshi mwayukatu, ku mpelo ya mulungu, kechi pajingapo ne pa kwimana bantu mu lubaza ne. Awa mukoko kechi wakishile ne. Mulongo Hall wapulukile mu kyonkakya kimye, kafunga ujiko pakino kimye, bonsetu. Amiwa kechi na mwene kwajinga uno mwanamukoko ne. Pakupita kimy, kufuma mu kipwilo kya Kilishitu, mushi ya katumba, awa nsongwakazhi mucheche wa myaka naini ne bang’ondo eiti kechi waendelepo ne, kulalatu byobya. Wajinga iye. Anweba bonse mwayuka jishimikila. Ee, mwane.

⁴³⁷ Kabiji awa mute kimye Busty Rogers, mukatampe wabaya wazama wakala waimene byobya. . .Naile konkakwa. Kabiji popa paimene kipwilo kya Mulongo Smith na kuseka, na kundetela bisela, mambo a kubatizha mu Jizhina ja Yesu. Amiwa na endele mu meema amateshi a mu Totten Ford, kobajinga na. . .[Kafwapo kiji pa tepu ne—Waku]. . .konka ku kakola,

kabiji kaubilenga pota yabaya. Bavula madikoni baile pamo ne amiwa.

⁴³⁸ Naambile mba, “Naimana pano mute uno kwimenako Binembelo Byzahila bya kwa Lesa.” Naambile mba, “Mbeni kutanga papo mu Baibolo apo Petelo po aambile mba, ‘Lapilai, anweba bonse, ne kubatizhiwa mu Jizhina ja Yesu Kilishitu mu lulekelo lwa mambo enu.’” Naalulukile, ne kupana Buuku ku umo wa madikoni.

⁴³⁹ Naendele kuya konka, kabiji Naambile mba, “Yense wakonsha kuswa, awa walapila ku bubi bwanji, wakasuluka kwiya.” Naendele kuya monka mu meema. Naambile mba, “Kyamweka kwi amiwa mba Bamalaika baikala ku misapi yonse ponkapano, na kutamba.” Oo, ami! Pa kyoka kya kimye kyo Nabatizhe pepi nobe babiji nangwa basatu, kipwilo kyanji kyonse, aba banabakazhi bamvwajile madeleshi awama a siuuku, batwelele mu oa meema, kasa babijika na mawi akatampe bingi. Amiwa na batizhe kipwilo kyanji kyonse mu Jizhina ja Yesu Kilishitu. Anweba mwi kiyuka. Amiwa ni na kipikichala kyakyo. Abyo byokyajinga.

⁴⁴⁰ Kyajinga kika? Kubikapo pa bulume bobo. Mwamona? Kilekaitu buke bwakyo. Lesa wayuka bya kwikyuba. Lesa wayuka kufikizha bibye bintu. Balekai bambe kyonse kyo babena kukeba kwamba. Kechi kijipo na lupusano ne. Twajijilaitu na kuya kulutwe.

⁴⁴¹ Busty Rogers kasa aimana byobya, byo amwene byobya, waambile mba, “Nanchi Amiwa ne kiketekela na muchima wami yense.” Kabiji wakukulukile kwiya mu meema, na bya kumwala byawama, kabiji wabatizhiwe mu Jizhina ja Yesu Kilishitu.

⁴⁴² Pepi nobe isatu nangwa foolo myaka yapita, bangichile kuno konka ku kipatela ku New Albany. Wajinga momwa, wafwilenga, na kaasa, wamujile bingi. Badokotala bakakelwe bamupeletu kwikala na bumi kufika, lukeelo lwalondejilepo. Baambile mba, “Pano ubena kufwa.” Baambile mba, “Iyatu bukiji.”

⁴⁴³ Naile mu lumu, byo Naubile byobyoy, kwimana momwa na kulomba. Aye waambile mba, “Billy, muji kakongolo kabena kuzhokoloka mu yewa koono.”

⁴⁴⁴ Kabiji Naalulukile, namba mone. Naaambile mba, “Busty, ke lulayang’ano. Obewa kechi ubena kufwa ne. Lulayang’ano lwa Mashi lwa kupulusha.”

⁴⁴⁵ Amiwa na bika maboko ami pe aye, naambile mba, “Nkambo Lesa, akya kimwesho popa kyaitabizha mba Anweba muji muno. Lulayang’ano lweni luji, bino, ‘Konka ku bipumo Byanji ko twabukilwa.’” Nabikilepo maboko pe aye, kabiji ponkapa wakosele. Bamutumine ku nzubo.

446 Kabiji pepi foolo nangwa myaka faivi, pepi nobe myaka faivi, na kuloba kunundu-ne-kushi ya mukola kabiji ne bintu byonse, na kuba byonkabya. Kabiji apa pajinga kaasa kufuma pa kikolomeno kuya munda, kyajinga kyakosa, pajinga kizhokoto kyakosa. Madokotala, bakulumpe ba mu kipatela, bamubujile mba baji na muchi wajibwe ja komboti wakonsha kololapo, ne kuswisha kajo kavula kupita pa kimye kimo. Aye wajinga na lukatazho lwabaya kuja kajo kavula, aye wajangatu bitende. Aye waile mba bakengijilepo. Amiwa kechi nayukile mba uji monka ne.

447 Kimye kyo bamutwajile na kumutumbula, kyamuletejile kusunyauka, kabiji waikele na kalepu. Wajinga na kalepu lubaji lumo byobya. Kabiji kintu kimo kyo aubangatu ke kujilapacheche. Kabiji wajinga na pezulu, nobe *byobya*, kabiji ne kuya, “uu, uu, uu.” Kabiji waesekanga kunemba, kasa abena kuzakama nobe *byobya*, na kuboko kwanji kwajinga bulongo. Lubaji lwanji lwa kipiko, lwa lepukile. Kabiji aye wanembele, na kuboko kwanji: “Yesu upulusha, 1900 ne ikwabotu.” Abo kechi bekyumvwine ne.

448 Nanchi pano mukazhi wani waambile mba, “Mulongo Branham, Amiwa kechi nayuka mo ekitazha ne.”

449 Naambile mba, “Mrs. Rogers, mo ekitazha ke muno, kyajinga 1900 ne ikwabopo, aye po apulukile ne ku batizhiwa mwi Yesu mu Jizhina konkakwa. Akyo kyo kibena kupana fweto pakino kimye. Aye kechi uji na moyo wa kufwa ne.”

450 Naambile mba, “Nkambo Lesa, pulushai bumi bwanji. Amiwa ne kilomba, mwi Yesu mu Jizhina, amba Anweba musakupulusha bumi bwanji.” Nabikile maboko pe aye. Kalepu kafumine pe aye. Kusunyauka kwapwile. Kabiji aye wabukile kufuma pa mwanya. Kabiji ujitu pakino kimye, ubena kupanatu lushimuno.

451 Bikaipo pa lwitabilo lwenu, bulume; bikaipo pa bulume, maana; ku maana enu, kwikanya; ku kwikanya kwenu, butekanye; ku butekanye bwenu, bulesa; ku bulesa bwenu, butemwe bwa balongo; ku butemwe bwa balongo bwenu, Mupashi Wazhila, kabiji Kilishitu ukeya. Mambo, ke mushi Yanji. . . Aye Mupashi Wazhila ye Mupashi wa Yesu Kilishitu mu Kipwilo, na kusolola byobyo byubilo. Oo, ami!

Kiji bino, kota pasiti twelufu.

Namutemwa . . . Namutemwa Aye
Mambo Ye mutanshi nkutemwa,

Kwine kunyuma *kukwe*, kasa ukyangye kwikala kintu nangwa kimo ne.

Kabiji wapo- . . . (Kika kyo aubile?) . . .
lupulukilo lwami
Pakinchi kya ku Kalvali.

Kika Amiwa kyo naikela *bibye*? Mambo Ye watemenwe, mutanshi.

Namutemwa Aye, Namutemwa Aye
Mambo Ye mutanshi kutemwa... (Ao oene mambo.)
Ne kupota lupulukilo lwami
Pakinchi kya ku Kalvali.

⁴⁵² Nasashijila, lukeelo luno, kwi Aye, na muchima wami yense, amba, monka mu bukwasho Bwanji ne lusa Lwanji, Nalomba mba Amiwa ke mukeba pajuba pajuba, kwakubulwa kuleka ne, poso Naumvwa byonse bikebewa kasa bipita mu kino kipimo kya kimino kyami kyakala, poso Naikala kusololwa kwa Kilishitu mumi. Mambo, Aye waalukile ke bundengamambo nobe amiwa, pakuuba mba Amiwa ngikale... kwikala bololoke bwa Lesa, nobe Aye. “Aye watolele kifulo kyami; Nkambo, lekai amiwa ntole Kyanji pano.” Mambo, kyo kine kintu Aye kyo afwijile. Baanga basakusashijila mu jishinda jimo, monka mu lusa lwa Lesa? [Kipwilo kyaamba mba, “Amena.”—Waku.] Na mitwe yetu ya kunama, kabiji ne maboko etu asutulwa peulu.

Ami . . .

⁴⁵³ Ne kisashijila, Nkambo, kino kipwilo kyasashijila, “Kipimo kya kimino kya Yesu Kilishitu!”

Mambo Ye mutanshi kutemwa
Ne kupota lupulukilo lwami
Pakinchi kya ku Kalvali.



KIPIMO KYA KIMINO KYA MUNTU WALUMBULUKA KDE62-1014M
(The Stature Of A Perfect Man)

Ino Mbila na Mulongo William Marrion Branham, yalupwilwe patanshi mu Kizungu pa Mulungu lukeelo, Ntundwe 14, 1962, pa Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org